

O LE EKALEZIA A IESU KERISO O LE AU PAIA O ASO E GATA AI • MATI 2015

# O Le Liahona



**O Le Ala na  
Faamanuiaina ai e  
le Faola Tamaitai  
Faatuatua, i. 32**

**Aisea ma Auala e Puipuia ai le  
Sa'olotoga Tau Tapuaiga, i 16**

**O Le Ala Sa'o e Tali ai Fesili, i. 38**



*“Ona fetalai atu ai lea  
o Iesu ia te i latou,  
Ona o lo outou le  
faatuatua; aua e moni,  
ou te fai atu ia te  
outou, afai e tusa lo  
outou faatuatua ma  
le fua o le sinapi, e  
fai atu outou i lenei  
mauga, Alu atu ia oe  
i le la mea; ona alu  
atu ai lea; e leai foi se  
mea tou te le mafaia.”*

Mataio 17:20

O fatu sinapi nei, ia e ola  
i totonu o pusa o fatu, o  
le ituiga lea o loo maua  
i Isaraelu. O le pine sa'o, lea  
e na o le tasi le inisi (3cm) le  
umi, o loo faaaofia ai e faaali  
atu ai le fua.





O SAVALI

- 4 **Savali a le Au Peresitene Sili: Siomia i Ona Aao Malu**  
Saunia e Peresitene Dieter F. Uchtdorf
- 7 **Savali a Faiaoga Asiasi: O Uiga o Iesu Keriso—Talitiga ma Onosai**

TALA FAAALIA

- 16 **Laulaututu e Fai ma Molimau a le Atua**  
Saunia e Elder Dallin H. Oaks  
*I se lalolagi ua luitauina ai o tatou talitonuga e sili ona faigo-fie, e tatau ona tatou tutu faatasi e finafinau pea mo o tatou aia tatau e faaoga saoloto ai la tatou tapuaiga.*

**I LE FAAVAA**  
Luma: *Rabboni*, Saunia e Michael Malm. I totonu o le faavaa pito i luma: Ata na pueina e David Stoker. I totonu o le faavaa pito i tua: Ata pue na saunia e Cody Bell.

- 24 **O Le Fouvale o Satani**  
Saunia e Mark A. Mathews  
*O le malamalama i le fouvale o Satani i le muai olaga e mafai ona fesoasoani tatou te iloa manino ai le matafaioi o tiute, tulaga faatonuina, ma tulafono i le fuafuaga a le Tama Faalelagi.*

- 28 **Pipii Mau i le Ai Uamea**  
Saunia e Elder Ulisses Soares  
*E mafai faapefea ona tatou taofimau i le ai uamea ma aua le faamaamulu, e ui lava i le puao o le pogisa?*

- 32 **O Le Faaaloalo o le Faaola mo Tamaitai**  
Saunia e Robert ma Marie Lund  
*E mafai ona tatou aoao atili e uiga ia Keriso mai Ana fegalegaleaiga ma nei tamaitai e toafa.*

- 38 **Pe a Alia'e Masalosaloga ma Fesili**  
Saunia e Adam Kotter  
*O le i ai o fesili e uiga i le talalelei e le o le faafitauli lena—o le mea tatou te faia i ai e taua.*

MATAGALUEGA

- 8 **Tusigāmanatu o le Konafesi o Oketopa 2014**
- 10 **O Tatou Aiga, O Tatou Auaiga: Talanoa e uiga i Autu Faigata**  
Saunia e Sheree Lyn Clarke
- 13 **Ataata: Tamamatua, Tama**  
Saunia e Aaron L. West
- 14 **Tatou te Talanoa ia Keriso: O Tofotofoga Uma e Mafai ona Aumaia ai le Faatuatua Faateleina**  
Saunia e Giorgia Murgia
- 42 **O Leo o le Au Paia o Aso e Gata Ai**
- 80 **Seia Tatou Toe Feiloai: Atinae i luga o le Papa**  
Saunia e Elder Orson F. Whitney



46

**46 O Mea na Tatou Aoaoina mai i o Tatou Matua**

*O le faiga o galuega, tatalo, ma le faalagolago i le Tama Faalelagi-ua na o ni nai lesona ua aoaoina mai e le autalavou matutua mai o latou matua.*

**50 O Se Taunuuga Fou**

Saunia e Amancay Kotecka-Miño  
*Ona o la'u molimau, ua ou mala-malama ai nei e le o tuua na o a'u, e tusa lava po o a taunuuga e sosoo ai e aumai e le olaga.*



*Vaai pe mafai ona e mauaina le Liahona o loo natia i le lomiga lenei. Faaitete: Pe o lava lau malolo i taeao o Aso Sa?*

**52 Malosi e sili atu nai lo lo Tatou Lava [Malosi]**

Saunia e Elder David A. Bednar  
*O le mana gafatia o le Togiola a Keriso e fesoasoani ia i latou o e mananao ia avea atili ma ni tagata lelei ma auauna atu ma le faamaoni sili atu.*

**56 Aua le Faamasino i Le Ua Saunia**

Saunia e Randall L. Ridd  
*E le mafai ona e iloa po o ai ua ono saunia e talia le talalelei.*

**58 Ia Maua le Lototele e Faasoa Atu ai le Talalelei**


*O auala e tolu e mafai ona faatoilalo ai lo tatou fefe e faasoa atu le Talalelei*

**60 Ia Manatua o le Latou Filifiliga Lena**

*O le manuia i le faasoaina atu o le talalelei e faalagolago lea i mea e te faia—ae le o mea e fai e isi.*

**62 Tuu Atu le Valaaulia ma Toe Tulitatao**

*O auala e sefulutasi e mafai ona e "tuu" atu ai i au uo se avanoa e o mai ai ia Keriso.*



52



77

**66 Faamatalaina o Mealilo**

Saunia e David Dickson  
*O nisi mealilo e taua tele mo le nanaina*

**68 O Afea e Tatau ona Ou Ta'uina Ai?**

Saunia e Jan Pinborough  
*E mafai faapefea ona ou iloa pe tatau ona ou nanaina pe faamatala atu se mealilo?*

**69 Molimau Faapitoa: Aisea e tatau ai ona tatou faalogologo i le konafesi aoao?**

Saunia e Elder Robert D. Hales

**70 Sauniuni mo le Eseta**

*Faaaoga le gaoioga lenei i le vaiaso a'o humanai le Eseta e sauniuni ai e faamanatu le Toetu o Keriso*

**72 Malamalama Vave**

Saunia e Richard M. Romney  
*Faitau i le ala na fesoasoani ai Magnolia i lana uo fou o Mia ia lagona le taliaina i le Peraimeri.*

**74 Taimi o Tusitusiga Paia: O le Tala i le Tagata Poto ma le Tagata Valea**

Saunia e Jean Bingham

**76 Itulau e Valivali**

**77 Tusitusiga Paia i lalo o Fetu**

Saunia e Bonnie L. Oscarson

**78 Mo Tamaiti Laiti: Moe i le Aso Toonai ma 'Ataata i le Aso Sa**

Saunia e Miche Barbosa



**MATI 2015 VOL. 39 NU. 3**  
**O LE LIAHONA 12563 890**

O Le Lomiga Faamaonia Faa-Samoa a le Ekalesia  
a lesu Keriso o le Au Paia o Aso e Gata Ai

**Susuga a le Au Peresitene Sili:** Thomas S. Monson,  
Henry B. Eyring, Dieter F. Uchtdorf

**O Le Korama a Aposeolo e Toasefululua:**

Boyd K. Packer, L. Tom Perry, Russell M. Nelson,  
Dallin H. Oaks, M. Russell Ballard, Richard G. Scott,  
Robert D. Hales, Jeffrey R. Holland, David A. Bednar,  
Quentin L. Cook, D. Todd Christofferson, Neil L. Andersen

**Faatonu:** Craig A. Cardon

**Fautua:** Mervyn B. Arnold, Christoffel Golden,  
Larry R. Lawrence, James B. Martino, Joseph W. Sitati

**Pule Faatonusili:** David T. Warner

**Faatonusili o le Lagolago mo Aiga ma**

**Tagata o le Ekalesia:** Vincent A. Vaughn

**Faatonusili o Mekasini a le Ekalesia:** Allan R. Loyborg

**Pule o Mea Tau Pisinisi:** Garff Cannon

**Pule Faatonutonu:** R. Val Johnson

**Pule Faatonutonu Lagolago:** Ryan Carr

**Lagolago o Lomiga:** Lisa C. López

**Au Tusitusi ma Faatonutonu:** Brittany Beattie,  
David Dickson, David A. Edwards, Matthew D. Flitton,  
Lori Fuller, Garrett H. Garff, LaRene Porter Gaunt, Mindy  
Anne Leavitt, Michael R. Morris, Sally Johnson Odekirk,  
Joshua J. Perkey, Jan Pinborough, Richard M. Romney,  
Paul VanDenBerghe, Marissa Widdison

**Pule Faatonusili Tusiatu:** J. Scott Knudsen

**Faatonusili Tusiatu:** Tadd R. Peterson

**Au Mamanu:** Jeanette Andrews, Fay P. Andrus,  
Mandie M. Bentley, C. Kimball Bott, Tom Child, Nate  
Gines, Colleen Hincley, Eric P. Johnsen, Susan Loggren,  
Scott M. Mooy, Mark W. Robison, Brad Teare, K. Nicole  
Walkenhorst

**Faatonu o le Puletaofia ma Fatufatuga:**

Collette Nebeker Aune

**Pule i le Gaosiga:** Jane Ann Peters

**Au Gaosi:** Connie Bowthorpe Bridge, Julie Burdett,  
Katie Duncan, Bryan W. Gygi, Denise Kirby, Ginny J.

Nilson, Gayle Tate Rafferty

**Tailolomi:** Jeff L. Martin

**Faatonusili Lolomiga:** Craig K. Sedgwick

**Faatonusili o le Tufatufaga:** Stephen R. Christiansen

Mo le okaina o mekasini, alu i le store.lds.org po o le  
Falelusi Tutotonu i Pesega. Telefoni 64127. Totogi o le  
Mekasini: \$0.55 (Samoa) i le kopi. Totogi mo le Tausaga  
Atoa \$6.60 (Samoa).

**Auina atu tusitusiga ma faafesili i luga o le**

**initoneti** i le liahona.lds.org: pe meli mai i le *Liahona*,  
Rm. 2420, 50 E. North Temple, Salt Lake City, UT 84150-  
0024, USA; po o le i-meli: liahona@ldschurch.org.

O Le *Liahona* (o lona uiga i le Tusi a Mamona o le  
"tapasa" po o se "faatonuala") e lomia i le faa-Alepania,  
Aminia (Sasae), Pisilama, Palekeria, Kemupotia, Sepuano,  
Saina, Kalaotia, Siekisolovakia, Tenimaka, Take, Igilisi,  
Esitonua, Fiti, Finelani, Farani, Siamani, Eleni, Hanikeri,  
Initu, Iselani, Initonesia, Italia, Iapani, Kiripati, Korea,  
Lativia, Litunia, Malakasa, Masela, Monokolia, Nouei,  
Polani, Potukale, Romania, Rusia, Samoa, Saina  
(ua faafaigofieina), Silovenia, Sipaniolo, Suetena,  
Swahili Tagaloka, Tahiti, Tai, Toga, lukureini, Urutu,  
ma Viatename. (E eseesee lava gagana.)

© 2015 Puletaofia e le Intellectual Reserve, Inc. Ua taofia  
aia tatau uma. Lomia i le lunaita Setete o Amerika.

E mafai ona kopi tala ma ata o le *Liahona* mo le toe  
faaogaina i lotu po o le aiga ae ia le faia ai ni pisinisi. E  
le tatau ona kopi ni tala po o ni ata pe afai o faasa mai i  
le laina o loo ta'ua ai le e ona lea faatufugaga. Auina atu  
fesili e uiga i le puletaofia i le Intellectual Property Office,  
50 East North Temple Street, Salt Lake City, UT 84150,  
USA; i-meli: cor-intellectualproperty@ldschurch.org.

**For Readers in the United States and Canada:**

March 2015 Vol. 39 No. 3. O LE LIAHONA (USPS 311)  
Samoa (ISSN 1045-0947) is published monthly by The  
Church of Jesus Christ of Latter-day Saints, 50 East North  
Temple, Salt Lake City, UT 84150. USA subscription price  
is \$10.00 per year; Canada, \$12.00 plus applicable taxes.  
Periodicals Postage Paid at Salt Lake City, Utah. Sixty days'  
notice required for change of address. Include address  
label from a recent issue; old and new address *must* be  
included. Send USA and Canadian subscriptions to Salt  
Lake Distribution Center at address below. Subscription  
help line: 1-800-537-5971. Credit card orders (Visa,  
MasterCard, American Express) may be taken by phone.  
(Canada Poste Information: Publication Agreement  
#40017431)

POSTMASTER: Send all UAA to CFS (see DMM 707.4.12.5).  
NONPOSTAL AND MILITARY FACILITIES: Send address  
changes to Distribution Services, Church Magazines,  
P.O. Box 26368, Salt Lake City, UT 84126-0368, USA.

# Manatu Mo Afiafi Faaleaiga

*O leni lomiga e aofia ai tusiga ma gaoioiga e mafai ona faaoga mo afiafi faaleaiga.  
O ni manatu nei se lua.*



## **"Pe a Alia'e Masalosologa ma Fesili,"**

itulau e 38: A uma ona faitau le tusiga,  
mafaufau e talanoa o se aiga i le eseesega i  
le va o fesili ma masalosologa. Faitau i tala e  
uiga i tagata o loo i tusitusiga paia o e na i ai  
ni fesili ma mea na latou faia e uiga i ai (mo  
se faaitaiga, 1 Nifae 11; Eteru 2:19–3:16;  
Iosefa Samita—Talafaasolopito 1:10–19; po  
o mau faasino o loo i lalo ifo o le vaefaama-  
talaga 1 o le tusiga).

E mafai ona e fai atu i nai tagata o le  
aiga e faailoa mai ni nai a latou fesili o i ai.  
Ona faaoga lea o tusitusiga paia, lds.org/  
topics, po o aafiaga patino e su'e ai tali. O  
le atinaeina o se siosiomaga o le talanoa e  
le tau taofiofia ma le faamaoni i totonu o  
le aiga, o le a fesoasoani i tagata o le aiga  
ia lagona le lagona lelei i le faaleoina mai o  
fesili pe a tulai mai.

## **"Sauni mo le Eseta,"**

itulau e 70: A'o le'i  
faia le afiafi faaleaiga, atonu e te manao  
e tusi ni luitau o aso taitasi i luga o ni  
fasipepa. Mo se faaitaiga, "Ua amata  
ona e lagona le ita ina ua le faasoa atu e  
lou uso ana meataalo ia te oe," po o le  
"Ua e matauina le faanoanoa o tama i le  
taimi na oo mai ai i le fale mai le galuega  
i se tasi o po." Fai atu i lau fanau e auuai  
ona filifili se fasipepa, faitau le mea o  
loo tupu, ma fautua atu ni auala e mafai  
ona aveai ai i latou e pei o le Faola i lena  
tulaga. Faailoa atu le gaoioiga o le Eseta o  
loo i le tusiga lenei ma valaaulia lau fanau  
taitoatasi e talia le luitau o le fitu aso e  
aao ai e uiga ia lesu Keriso ma mulimuli  
i Ana faaitaiga.

## I LAU GAGANA

O loo maua le *Liahona* ma isi tusi a le Ekalesia i le tele o gagana i le [languages.lds.org](http://languages.lds.org).

## AUTU I LENEI LOMIGA

*E ta'u mai e numera le itulau muamua o le tusiga.*

**Aiga, 10, 14, 46**

**Alofa, 44**

**Alofa tunoa, 52**

**Aso Sapatu, 78**

**Auauna atu, 44, 72**

**Eseta, 32, 70**

**Faaliga, 38, 69, 80**

**Faamafanafana, 4, 14**

**Faatuatua, 14, 32, 38**

**Fauoga, 66, 72**

**Faitalia, 24, 60**

**Galuega faafaifeautalai,**

50, 52, 56, 58, 60, 62

**Iesu Keriso, 4, 7, 32, 52,**

70, 74

**Konafesi aoao, 45, 69**

**Liua, 50**

**Mealilo, 66, 68**

**Molimau, 38, 50, 74, 77**

**O le Tofi, 13**

**Onosai, 7**

**Perofeta, 45, 80**

**Salamo, 28, 50**

**Saolotoga, 16**

**Suesue i tusitusiga paia,**

43, 77, 74

**Tamaitai, 32**

**Tatalo, 16, 42**

**Toefuataiga, 80**

**Tofotofoga, 14, 42**

**Togiola, 4, 52, 70**

**Tulaga faamatua, 10, 46**

**Tusi a Mamona, 16, 77**

**Usiusitai, 16, 24, 28,**

38, 45



**Saunia e  
Peresitene  
Dieter F. Uchtdorf**

Fesoasoani Lua  
i le Au Peresitene Sili

# SIOMIAINA I Ona Aao Malu

**E**pei o le toatele o isi, e masani ona faagaetiaina a'u i galuega matagofie o faatufugaga ma musika. O se tasi o na aafiaga o le aso lea na ou tutu ai i luma o se atavali mataina na fatuina e le tufuga Tanisi o Frans Schwarz na faaigoaina *O Tiga i le Faatoaga*.<sup>1</sup>

O lenei atavali tiga matagofie o loo faaalai ai le Faaola o tootuli i le Faatoaga o Ketesemane. A o tatalo o Ia, o loo tutu se agelu i Ona tafatafa, o loo siomia o Ia i aao malu, tuuina atu le faamafanafanaga, fesoasoani faalelagi, ma le lagolagosua.

O le umi lava na ou manatunatu ai i lenei atavali, o le atili tumu foi lea o lo'u loto ma lo'u mafaufau i lagona le mafaamatalaina o le lotoalofa ma le agaga faafetai. E mafai ona ou lagona, i se vaega itiiti, pe na faapei le i ai a'o amata e le Faaola Lana galuega tupito i le olaga nei e ala i le tauaveina i Ona luga o agasala a le lalolagi. Ou te maofa i le alofa e le faatuaioia ma le agalelei o le Tama mo Lana fanau. Ua lofituina a'u i le agaga faafetai o'oo'o mo le mea na faia e le Alo e leai se agasala mo le fanauga uma a tagata ma mo a'u.

## **O le Taulaga a le Alo o le Atua**

O tausaga taitasi i lenei vaitaimi tatou te faamanatu ma mafaufau loloto ai i le taulaga na faia e Iesu Keriso mo le fanauga uma a tagata.

O le mea na faia e le Faaola mai Ketesemane agai i Korokota e fai ma sui mo i tatou, e matuai le mafai ona

ou malamalama i ai. Na Ia tauaveina i Ona luga le avega o a tatou agasala ma totogi se tau e faavavau ma e le matatalaina, e le gata mo le uluai solitulafono a Atamu, ae faapea foi mo agasala ma solitulafono o le piliona ma le piliona o tagata na soifua. O lenei taulaga e faavavau ma paia na mafua ai e, “le Atua, le silisili ese i mea uma, ona o le tiga, ma na maligi ai le toto mai pu laiti uma lava o le tino, ma na tiga le tino atoa ma le agaga” (MF&F 19:18).

Na tigaina o Ia mo au.

Na puapuagatia o Ia mo oe.

Ua taumasuasua lo'u agaga i le loto faafetai pe a ou mafaufau i le uiga taua o lenei osigataulaga. E faalotomaulaloina a'u i le iloa, o i latou uma o e talia lenei meaalofa ma lilifa atu o latou loto ia te Ia e mafai ona faamagaloina ma faamamaina i a latou agasala, e tusa lava pe o le a le uliuli o o latou pisia pe o le a foi le mamafatu o a latou avega.

E mafai ona tatou toe mama ma atoatoa. E mafai ona togiloina i tatou e le taulaga e faavavau a lo tatou Faaola peleina.

## **O Ai o le A Faamafanafanaina i Tatou?**

E ui e leai se tasi o i tatou o le a oo i le loloto o mea na tigaina ai lo tatou Alii, o le a taitoatasi i tatou ma maua o tatou lava taimi pogisa ma oona--o taimi ia o le a foliga ai





O le a sili atu nai lo o se agelu o Ia ia i tatou.

O le a Ia aumaia ia i tatou le mafanafana faamanuiaina, faamalologa, faamoemoe, ma le faamagaloga.

Aua o Ia o lo tatou Togiola.

O lo tatou Laveai.

O lo tatou Faaola alofa mutimutivale ma lo tatou Atua faamanuiaina. ■

#### FAAMATALAGA

1. Fai mai le faifeau na saunoa i le maliu o Frans Schwarz, “o lana faatufugaga na faaeina mai le lagi ma na foliga sili atu le agavaa nai lo le tele o lauga” (Emmilie Buchanan-Whitlock, “History of Artists’ Lives Gives Greater Context for Exhibit,” *Deseret News*, 29 Sept. 2013, [deseretnews.com](http://deseretnews.com)).

o tatou faanoanoaga ma faavauvauga e sili atu le tetele nai lo mea e mafai ona tatou onosaia. O le a i ai taimi e taomia faalealofa ai i tatou i le mamafa ma le faalumaina o a tatou agasala.

E ui a o lea, afai o le a tatou sii ae o tatou loto i le Alii i na taimi, e mautinoa lava o le a Ia silafia ma malamalama i ai. O Ia o le na puapugatia ma le le manatu faapitomo i tatou i le faatoaga ma luga o le satauro, o le a le tuua i tatou e aunoa ma le faamafanafanaga i le taimi nei.

O le a Ia faamalosia, faamalosiau, ma faamanuia i tatou. O le a ia siomiaina i tatou i Ona aao malu.

#### AOAO ATU MAI LENEI SAVALI

**A**e e te le’i aoao atu, saili atu i le taitaiga a le Agaga e fesoasoani ia e malamalama i manaoga faapitoo o i latou o loo e faiaoga ai. A o e faa-soa atu fuaitau mai le savali a Peresitene Uchtdorf, molimau atu i le Faola ma Lana taulaga togiola. Mafaufau e fesili ia i latou o loo e faiaoga ai po o le a le uiga o Lana Togiola ia i latou, ma o a foi ni auala ua latou lagonaina ai le faamafanafanaga a le Alii i o latou “taimi pogisa ma le oona.”

## Manumalo e ala ia Iesu Keriso

### Taofia le igoa

**S**a i ai so’u faafitauli o le soona tausami. O le oso faafaama’i o lo’u ai soo na iu ai i se tulaga leaga tele o le tausalaina, ita, ma le faanoanoa. Sa ou lagona le matuai vaivai lava ina ua ou taumafai e faatoilalo lo’u faafitauli.

Mo se taimi umi, sa ou le amanaiaina ai le mea moni e faapea, o le Togiola a le Faola e le gata ina laveai ai i tatou



ae faapea foi ona faolaina ai i tatou ma faatoatoaina ai i tatou, ma faapea o lenei mea e faatatau foi i lo’u mausa na iloa lelei lava le le atoatoa o le soona ai.


Sa ou filifili e tuu atu a’u lava i lo’u Faola. Sa ou tatalo. Sa ou ioeina ma le faamaoni lo’u vaivaiga ma lo’u manaomia o le alofa tunoa, ona ou ole atu lea i le Tama Faalelagi e faamanuia a’u i Lana fesoasoani faalelagi i le aso na sosoo ai. O lena po sa ou lagonaina ai le faamautinoaga a se Tama agalelei e faapea, e i ai Lona naunau lemafuatia e fesoasoani i Lona atalii ma le mana lemafesiligia e faataunuu ai Lona finagalo.

Talu mai lena po, ua le toe i ai se faatosinaga lofituina a meaai ia te a’u. Ou te iloa, o Iesu Keriso o le mafuaaga lea o lo’u faamanuiaina. E pei lava o Paulo, ua ou aoaoina “Ou te mafaia mea uma lava i le faamalosi mai o Keriso ia te a’u” (Filipi 4:13). Ma o loo o’u taumafai ia aua ne’i galo ia te a’u se isi lesona mai ia Paulo: “Faafetai i le Atua, o le na te foaiina mai le manumalo ia te i tatou talu lo tatou Alii o Iesu Keriso” (1 Korinito 15:57).

## TAMAITI

### O Le a Faamafanafanaina Oe e le Faola

**F**esili atu i se tagata o le aiga po o se uo e uiga i se taimi na ia lagonaina ai le faamafanafanaina o ia e le Faola. Taumafai e mafaufau i se taimi na faamafanafanaina ai oe e le Faola. E mafai ona e tusia se ata o le aafiaga ma tautau i autafa o lou moega e faamanatu atu ai ia te oe, o le a i ai iina Iesu Keriso i taimi uma e faamafanafana ia te oe.





Ia suesue ma le agaga tatalo lenei savali ma saili ia iloa mea e faasoa atu. O le a mafai faapefea e le malamalama i le soifuaga ma matafaioi a le Faaola ona faateleina lou faatuatua ia te Ia ma faamanuaina ai i latou o loo e tausia e ala i le faiaoga asiasi? Mo nisi faamatalaga, alu i le [reliefsociety.lds.org](http://reliefsociety.lds.org).

## O Uiga o Iesu Keriso: e Talitiga ma Onosai

*O se vaega lenei o se faasologa o Savali a Faiaoga Asiasi e faaautu i uiga o le Faaola.*

O le onosai e masani ona manatu i ai o se amio filemu, uiga o le tali atu, ae e pei ona saunoa Peresitene Dieter F. Uchtdorf, Fesoasoani Lua i le Au Peresitene Sili, “O le onosai e le o le taliaina ma le ususitai, pe o le toilalo foi e galue ona o o tatou atuatuvalega. O le onosai o lona uiga o le faatalitali ma le tumau. O lona uiga o le tumau ai i se mea . . . e tusa lava pe tolopoina manaoga o o tatou loto. O le onosai e le na o le tumau, ae o le tumau lelei ai!”

I lo tatou muai olaga, sa saunia ai e lo tatou Tama Faalelagi se fuafuaga mo i tatou—o Ana fanau agaga—ma sa tatou alalaga fiafia i le avanoa e o mai ai i le lalolagi (tagai i le Iopu 38:7). A o tatou filifili e faaogatasi o tatou loto ma Lona finagalo i le taimi o lo tatou olaga i le lalolagi, o le a Ia “faia i [tatou] ma se mea faigaluega i [Ona] lima mo le olagata o agaga e toatele” (Alema 17:11).

### **Maufau i le Mea Lenei**

Mai le tala i le Luka e 8, na faapefea ona tauia le tele o tausaga o onosai lenei fafine ma lona faatuatua ia Iesu Keriso?



Sa faaauau le saunoaga a Peresitene Uchtdorf, “O le onosai o lona uiga o le taliaina o le mea e le mafai ona suia ma le faafetaiaia i le lototele, faatamalii ma le faatuatua. O lona uiga o le “fia gauai i mea uma ua silafia e le Atua e tatau ona faatiga ai [tatou], e pei lava ona gauai le tamaitiiti i lona tama” [Mosaea 3:19]. Ma le mea mulimuli, o le onosai o lona uiga o le ‘mausali ma le le mafaagaetia i le tausiga o poloaiga a le Atua’ [1 Nifae 2:10] i itula uma o aso taitasi, e tusa lava pe faigata ona fai.”<sup>1</sup>

### **Mau Faapoopo**

Salamo 40:1; Kalatia 5:22–23;  
2 Peteru 1:6; Alema 17:11

#### FAAMATALAGA

1. Dieter F. Uchtdorf, “Faaauau i le Onosai,” *Liahona*, Me 2010, 57, 59.



### Faatuatua, Aiga, Toomaga

#### **Mai Tusitusiga Paia**

Ua ta’u mai e tusitusiga paia ia i tatou e faapea, i lo tatou olaga i le lalolagi, e tatau ona tatou “onosai i puapuaga, ona o le a tele [o le a] oo mai ia [i tatou].” Ona tuuina mai lea e le Atua ia i tatou le folafolaga faamafanafana lenei, “Onosaia i latou, aua faauta, ua ou faatasi ma oe, e oo lava i le faaiuga o ou aso” (MF&F 24:8).

O le tala faale-Tusi Paia leni o se faaitaiga o le onosai ma le faatuatua.

“O le fafine sa ia te ia le puna toto i tausaga e sefulu ma le lua . . . na pa’i ane i le tuupao o le ofu [o Keriso]: ona [uma ai] lea o lona puna toto.

“Ona fetalai ane lea o Iesu, . . . Na pa’i mai lava se tasi ia te a’u: aua ua ou iloa ua alu atu le mana nai ia te a’u.

“Ua iloa e le fafine ua le lilo o ia, ona alu atu lea o ia ma le gatete, ua faapau mai i ona luma, ma faamatala mai ia te ia i luma o le nuu uma le mea na pa’i atu ai o ia ia te ia, ma le faamaloloina loa o ia.

“Ona fetalai atu lea o ia ia te ia, Lo’u afafine, ina faalototeleina ia oe: ua e ola i lou faatuatua; ina alu ia oe ma le manuia” (Luka 8:43–48).

E pei foi o le [fafine], e mafai ona tatou maua faamanuiaga ma le faamafanafanaga, faapea foi i le faamalologa, a’o tatou aapa atu ia Iesu Keriso—o Lana Togiola e mafai ona faamalolo ai i tatou.

# TUSIGĀMANATU O LE KONAFESI O OKETOPA 2014

“O le mea ua fai atu ai A’u o le Alii ua Ou fai atu ai; . . . pe i lo’u lava leo po o i le leo o au auauna, ua tutusa lava” (MF&F 1:38).

A o e suesueina le konafesi aoao ia Oketopa 2014, e mafai ona e faaaogaina nei itulau (ma Tusigāmanatu o le Konafesi i lomiga i le lumanai) e fesoasoani ai ia te oe e suesue ma faaoga aoaoga talu ai nei a perofeta soifua ma aposetolo ma isi taitai o le Ekalesia.

## MEA NA FAAMAMAFI I AOAOGA FAAVAE



## Tausiga o e Matitiva ma e le Tagolima

“Sa fesiligia e se failipoti i se tasi taimi Mother Teresa o Kalakata e uiga i lana galuega faigata o le laveai o e matitiva i lena aai. Fai mai a ia, pe a fua i faamaumauga faafuainumera, e matuai leai lava se mea o ia ausiaina. Sa tali malosi lenei tamaitai faatinoiti ma ofoofogia e faapea o lana galuega e faatatau i le alofa, ae le o fuainumera. . . . Sa ia fai mai e mafai ona ia tausia le poloaiga o le alofa i le Atua ma tuaoi i le auauna atu ia i latou e oo i ai lana fesoasoani ma soo se punaoa na te maua. . . . Ma le faanoanoa, na faaiuina e le failipoti e faapea o le FaaKerisiano

ua manino lava e le o se taumafaiga e fua i fuainumera. . . .

“E faapefea la ona tatou ‘faia le mea ua tatou mafai?’ . . .

“. . . Ou te tuuina atu ai se faamamaluga patino ia Peresitene Thomas Spencer Monson. . . . O le ata o ia o le a ou faatauaina pea seia ou oti o le taimi na lele ai mai lena—Siamani Sasae ua faatamaia le tamaoiga e foi atu i le fale i ona seevae tosotoso ona e le gata sa ia foai atu lona suti lona lua ma isi ona ofutino ae o seevae na talai mai i ona vae sa see ai.

Elder Jeffrey R. Holland o le Korama a Aposetolo e Toasefululua, “Pe Le o i Tatou Uma Ea o Ni Tagata Aisi?” *Liahona*, Nov. 2014, 40, 41, 42.

## FOLAFOLAGA FAAPEROFETA



## O Faamanuiaga Faalelagi

“Masalo i ni [taimi faigata], atonu tatou te oo ai ina fesiligia i tatou lava, ‘E manaomia moni ea ona tatou ususitai i poloaiga uma a le Atua?’

“O la’u tali i le fesili lenei e faigofie lava:

“Ou te manatu e silafia e le Atua se mea tatou te le iloaina—o mea e sili atu ma lo tatou tomā e malamalama i ai! O lo tatou Tama i le Lagi o se tagata e faavavau, o lona silafia, poto, ma le atamai e le mafuatia le maoae i lo tatou. [Tagai Isaia 55:9.] . . .

“Ou te manatu, o se vaega o lo tatou luitau o lo tatou mafaufau lea o loo lokaina e le Atua Ana faamanuiaga uma i se ao tele i luga i le lagi, ma e musu e aumai ia i tatou sei vagana ai ua tatou tausisia nisi o tulafono mamafa e leai se tuusaoloto ua la faatulagaina. Ae e leai ma se tulaga faapena o i ai i poloaiga. O le mea moni, o loo liligi mai e le aunoa e le Tama Faalelagi faamanuiaga i o tatou luga. O lo tatou fefefe, masalosalo, ma le agasala, ua pei ai o se faamalu le polokaina o nei faamanuiaga mai le oo mai ia i tatou.

“O Ana poloaiga o ni faatonuga agaalofa ma o se fesoasoaniga faalelagi e faamoe ai le faamalu, ina ia mafai ai ona tatou taele e le aunoa i faamanuiaga faalelagi.”

Peresitene Dieter F. Uchtdorf, Fesoasoani Lua i le Au Peresitene Sili, “Ola Fiafia i le Talalelei,” *Liahona*, Nov. 2014, 121–22.



# Faatumu le Avanoa

1. "Pe a tatou faia ni \_\_\_\_\_ mo ni filifiliga sese, tetele pe laiti, ia e le ogatusa ma le talalelei toefua-taiina, o le a tatou maumau faa-manuiaga ma puipuiga tatou te manaomiaina." (Quentin L. Cook, "Filifili ma le Atamai," 47–48.)
2. "E tusa ai ma tulaga faatonu-ina o le lalolagi, o le mulimuli i le perofeta e ono inosiaina, le

- sa'o i manatu faaupufai, po o le le taliaina faaleagafesootai. Ae o le mulimuli i le perofeta e \_\_\_\_\_ i taimi uma lava." (Carol F. McConkie, "Ola e Tusa ma Upu a Perofeta," 78.)
3. "O le tuuina i lalo o tulaga faa-tonuina a le Alii i le tulaga o i ai amioga le talafeagai o malo o le \_\_\_\_\_." (Lynn G. Robbins,

- "O Fea le Itu o E Faasaga I Ai?" 10.)
4. "O loo i ai \_\_\_\_\_ a'ia'i i se lalolagi ua faateteleina ona faaleagaina ma aveesea mataupu autu. I se aso o lumanai, e 'tootuli [ai] tulivae uma lava' ma 'ta'uta'u atu e laulaufaiva uma lava o Iesu Keriso o le Alii lava ia (Filipi 2:10–11)." (David A. Bednar, "O Mai la Ina Matamata," 110.)

# O Se Pusa o Meafaigaluega mo Lou Aiga

Iloilo "lou faaogaina patino o mea-faigaluega taitasi; ona saili lea o le taitaiga a le Alii e fuafua ai pe mafai faapefea ona e faaogaina lelei atu

ia meafaigaluega taitasi." —Elder Richard G. Scott, "Ia Avea le Faaogaina o le Faatuatua ma Mea E te Faamua-muaina," 93.

1. Tatalo
2. Suesueina o Tusitusiga Paia
3. Afiafi Faaleaiga
4. Auai i le Malumalu



Ina ia faitau, matamata, pe faalogologo foi i lauga o le konafesi aoao, asiasi ane i le [conference.lds.org](https://www.conference.lds.org).

Tali: 1. fetuunai; 2. sa'o; 3. Ilii; 4. upumoni

# TALANOA E UIGA I AUTU FAIGATA

Saunia e Sheree Lyn Clarke

Tagata faapitoa i le suesueina o le faiai, Tautua a le AAG mo Aiga

*A feagai lau fanau ma luitau, e taua le talanoa ia i latou i auala o le a faamalosi ai lau mafutaga ma i latou.*

I le avea ai ma se matua, ua e iloa le taua o luitau ma tofotofoga i le tuputupu a'e o lau fanau, ae e faigata lava le vaai atu o tautiga mai lau fanau. Ae peitai, o nei tauiviga, e mafai ona avea ma se avanoa mo oe e atinae ai se sootaga mautu ma lau fanau a'o e faafaileleina se siosiomaga o le alofa i le aiga. Na uunaia e Peresitene Gordon B. Hinckley (1910–2008) matua ia tuuina atu se siosiomaga faapena: “O la'u talosaga—ma mai-mau pe ana ou lelei tele i le faaleoina atu—o se talosaga ia laveai le fanau. Ua toatele nua i latou o loo savavali ma le tiga ma le fefe, i le tuua toatasi ma le atuavale. E manaomia le susulu o le la. Latou te manaomia le fiafia. Latou te manaomia le alofa ma le tausiga.”<sup>1</sup>

E tele faafitauli faigata e mafai ona fetai ai ma lau fanau, e pei o le faasauonoa, gagana le lelei, kopi i le aoga, tosina atu i le itupa e tasi, faafitauli i le soona ai, atuavale, ma mafaufauga pule i le ola, o ni faaitaiga ia. I le avea ai ma se matua o le Au Paia o Aso e Gata Ai, ua e silafia ua “i ai sou tiute paia o le tausia o lau fanau i le

alofa ma le amiotonu,”<sup>2</sup> ae e faapefea ona e faia lena mea pe afai o tauivi lau fanau ma faafitauli faigata, po o i o latou lava olaga po o i olaga o a latou uo? O nisi nei o taiala:

**Fai atu ni fesili e valaaulia ai se talanoaga.** E mafai ona e fai atu se fesili e pei o lenei: “E foliga mai o loo iai se mea o faatalatala ia te oe. E te fia talanoa e uiga i ai?” O le fesili lenei e le gata ina faailoa atu ai ua e matauina se mea o faatalatala i lau tama, ae e tatalaina ai foi se faitotoa mo lau tama e faasoa mai po o le a lava le tele (po o le laititi) e pule ai lava o ia.


A uma ona faasoa mai e lau tama nisi o manatu e uiga i le faafitauli, o lau tali atu e mafai ona faapea: “Faa-fetai lava i lou faasoa mai ia te a'u, ma faafetai mo lou talitonuina o a'u i lenei faamatalaga. Ou te iloa lelei lava le lagona i lena mea. E mafai faapefea ona ou fesoasoani atu?”

O nei ituaiga o tali e tele ina matala ai le faitotoa i se talanoaga faifaipea. E taua le iloa e tamaiti o lou faamaoni. O se opo po o se pupula agalelei e mafai foi ona fesoasoani e faailoa atu ai le popole moni, ma mai i le loto.

## **Faalogo ia malamalama.**

Na saunoa mai Elder Russell M. Nelson o le Korama a Aposetolo e Toasefululua: O tamaiti ua masani lava i le mananao e faasoa atu o latou aafiaga. . . . Afai latou te taumafai e faailoa atu lo latou le fiafia, pe mata e mafai ona tatou faalogo lelei atu i se aafiaga e le talitonuina e aunoa ma le tatou oo foi i se tulaga o le le talitonu? Pe mafai ona tatou faalogo e aunoa ma le faasalaveiina ma e aunoa ma le vave faia o ni faamasinoga lea e tapunia ai le faitotoa o le talanoaga? E mafai ona matala pea i le faamautinoaga malu tatou te talitonu ia i latou ma malamalama i o latou lagona. E le tatau i tagata matutua ona faafoliga e le'i tupu se mea ona e ese se mea e ono mananao i ai.”<sup>3</sup>

**Faali atu le faaaloalo.** Ua tuuina mai e tusitusiga paia ni taiala sili







ona lelei i le auala e fatufatu ai se siosiomaga o le alofa ma le faaaloalo. Matau nisi o upu autu i le Mataupu Faavae ma Feagaiga 121:41–42: *faa-tauanau* (e le o le fai faamalosi), *tali-tiga* (e le o le taimi lava lea, usitai faamalosi po o le le onosai), *agamaualalo* (ae le o le avaavau, soona fai, leo malosi), *agamalu* (e le o le faamaualuga po o tali faafiapule), *agalelei* (e le o le faiga faalealofa), ma le *alofa faamaoni* (faalia moni ma faamaoni o le alofa). A o faalolotoina

lo tatou liua, “o le auala tatou te faia ai isi e oo ina faateleina le faatumulia i le onosai, agalelei, ma se taliaina agavaivai, ma se manao ia faia se saofaga lelei i o latou olaga.”<sup>4</sup>

**Aloese mai le faitio.** O matua o le Au Paia o Aso e Gata Ai e taumafai e faataitai o latou olaga i le Faola. O Ana fegalegaleaiga sa tumu i le alofa, agaga malamalama, ma le popole moni. E ui lava ina soli e tagata ia agasala matuia, sa Ia valaau atu e salamo ae sa le'i tausalaina (tagai i le Ioane

8:3–11). O le aloese mai le faitioina o lau fanau, lea e mafai ona oo atu ai i le leai o se taua o le tagata lava ia, ma le leai o se talitonu ia te ia lava; nai lo o le lena, ia sue ma faamamafa atu itu lelei o lau fanau taitoatasi.

**Pulea lou ita.** “E sili ona lelei o le ua gesegese i le ita i le ua malosi” (Faataoto 16:32), ma “o le agaga o finauga . . . ua mai le tiapolo ia, o le o le tama o le finauga, ma ua faaoso e ia loto o tagata ia fefinauai ma le ita” (3 Nifae 11:29). O le ita e tuli ese ai

le Agaga ma e i ai le gafatia e faatamaia ai sootaga maaleale a le matua ma le tamaitiiti. I le konafesi aoao, na saunoa ai Peresitene Hinckley e faapea, “Ou te augani atu ia te outou ia pulea lo outou ita, ia tuu se ataata i o outou foliga, lea o le a tineia ese ai le ita; tautala atu i upu o le alofa ma le filemu, talisapaia ma le faaaloalo. Afai tou te faia lenei mea, o le a leai se faanoanoa i o outou olaga. O le a faasaoina a outou faaiipoipoga ma sootaga faaleaiga. O le a sili atu ona outou fiafia.”<sup>5</sup>

**Faamalosia le sootaga.** O nei fautuaga uma e mafai ona aoga, ae afai e le mafai ona e manatua i latou pe a e i ai i le ogatotonu o se talanoaga faigata ma lau tama, ia e fesili ifo ia te oe lava, “E mafai faapefea ona ou faaaogaina lenei tulaga i la’u tama o se avanoa e faamalosia ai le ma sootaga?” Ona faalogologo lea i le, ma mulimuli i le musumusuga e te maua.



**Taumafai pea.** O le tulaga faamatua e mafai ona faigata tele, ae e mafai ona e faamanuiaina pe afai e te taumafai pea. Na fofogaina mai e Peresitene Howard W. Hunter (1907–95) upu nei o le faamalosiauga: “O se matua faamanuiaina o se tasi lea na alofaina, o se tasi lea na ositaulagaina, ma o se tasi na tausia, aoaoina, ma tali atu i manaoga o se tamaitiiti. Afai ua e faia nei mea uma ae o loo faalogogata pe faalelalogi pea lau tama, e ui i lea o oe lava o se matua faamanuiaina.”<sup>6</sup> ■

*E alala le tusitala i Aferika i Saute.*

#### FAAMATALAGA

1. Gordon B. Hinckley, “Save the Children,” *Ensign*, Nov. 1994, 54.
2. “O Le Aiga: O Se Folafolaga i le Lalolagi,” *Liahona*, Nov. 2010, 129.
3. Russell M. Nelson, “Faalogo e Aoao,” *Liahona*, Me 1991, 25.
4. Marvin J. Ashton, “E Mafai ona Avea le Lauaufaiva ma Pelu Maai,” *Liahona*, Iulai 1992, 20.
5. Gordon B. Hinckley, “Ia Faagesegese ona Ita,” *Liahona*, Nov. 2007, 62.
6. Howard W. Hunter, “Parents’ Concern for Children,” *Ensign*, Nov. 1983, 65.

## TALANOA I LE TUPULAGA

O le talanoa e uiga i luitau e faigata tele ae e sili atu ona faigata pe a talanoaina ma le tupulaga, o e o loo tauivi e atinae o latou lava faasinomaga—tutoatasi mai o latou matua. O le tulaga faamatuatagata e nafa ma atuatuvalega tetele o le faaleakatemia, faalelagona, ma le faaleagafesootai. O lo tatou talitonuga ma faatulagaga o tulaga faatauaina o nisi taimi e fesiligia ai e uo ma a latou tupulaga. O a latou sootaga ma o latou matua e mafai ona maaleale i lenei vaega o lo tatou tuputupu a’e, ma e le o se mea e le masani ai i le tupulaga ona iu ane i le lagonaina o le le mautonu, tuua toatasi, popolevale, le mautinoa, tuulafoaia, ma faaesea, faapea foi ma le atuatuvaale.

O matua o e malamalama ma magafagafa i nei luitau faaletuputupu a’e, e mafai ona lelei atu le latou fesoasoani i o latou tupulaga talavou i se taimi e sili atu ona latou manaomia ai o latou matua.



# TAMAMATUA, TAMA

Saunia e Aaron L. West

Tautua o Lomiga a le Ekalesia

*Vaai faalemafaufau i ni faifeautalai e 3,000 o faapotopoto i totonu o se potu tele. O le lua afe ivaselau ivasefulu ma le iva o i latou o loo talanoa fiafia ma tilotilo atu i le itu e tasi o le potu. O nisi o loo tutu tetee i o latou tamatamaivae. O nisi o loo tulioso i luga ia maua sina vaaiga vave i luga a'e o i latou o loo tutu tetee. O nisi o loo tutu i luga o nofoa faamomoe. E toatasi le faifeautalai o loo saofai i luga o se nofoa faamomoe, o loo tuu ona tulilima i luga o ona tulivae, tuufaatasi ona lima, ma punou lona ulu.*

Atonu e le o le mea tonu lena na tupu, ae o le tulaga lena o loo o'u manatuaina ai. O le tulaga lena na ou lagonaina. O a'u lena o le faifeautalai e toatasi.

A'o e vaai faalemafaufau i le vaaiga, atonu e te manatu sa tuua na o a'u pe sa faanoanoa foi. O le mea moni, sa ou oo i se tasi o taimi na sili ona fiafia o lo'u olaga—o se taimi na ou fiafia e toe manatua pea i le tele o taimi talu mai lena aso.

Sa ou i ai i le nofoaga autu e aoao ai faifeautalai i Provo, Iuta, e sauniuni ai e auauna atu o se faifeautalai faamisiona i le Misiona a Ekuatoa Quinto. Sa susu mai Peresitene Gordon B. Hinckley (1910–2008),



o le sa avea ma Fesoasoani Muamua i le Au Peresitene Sili, e saunoa mai i faifeautalai uma i le NAF.

O le maea o le fonotaga lea na amata ai le vavao. Sa ou matauina sa le'i lolofi atu tagata i faitotoa, o lea na ou fesili ai i le isi alii faifeautalai po o le a le mea na tupu.

“O le atalii o le atalii o Peresitene Hinckley o loo iinei i le NAF,” o lana tala mai lea, “ma faatoa tuua lava e Peresitene Hinckley le tulaga ina ia fusi atu ia te ia!”

Faatasi ai ma lena faamalamalamaga, na tu ai le alii faifeautalai i luga o lona nofoa ina ia iloa lelei atu ai, ma sa alaga faapea, “Oka! Pe e le o se

mea matagofie ea le avea o Peresitene Hinckley ma [sou] tamamatua?

Ou te alofa ma faaaloalo ia Peresitene Hinckley, ma sa musuia a'u i lana savali i lena aso. Ae i lena taimi, sa taia a'u i se manatu lea na oo ai ina ou saofai i luga o lo'u nofoa nai lo o le tu ai luga. I le ogatotonu o lena tiotioga fiafia, sa ou saofai filemu ai ma mafau-fau, “Ou te mautinoa o le a matuai manaia le avea o Peresitene Hinckley ma [sou] tamamatua. Ae o le a ou le faafesuia'ia lo'u Tamamatua o Felt po o lo'u Tamamatua o West mo ia.” Sa ea a'e lo'u ulu ma lagonaina le lagona mafanafana o le agaga faafetai a'o ou tomanatu i lo'u tupuaga, lo'u aiga.

Ona oo mai lea o se isi manatu, e sili atu le malosai nai lo o le muamua: “Ma le isi mea, o a'u o le atalii o le Atua.” Sa ou iloaina, o le atalii o se atalii o se fa'inifo ma se supavaisa i se falegaosi oloa, na tutusa lava le taua ma le avea o se atalii o se atalii o se perofeta. Aisea? Aua o i ma'ua e toalua e tasi lava lo ma Tama oi le Lagi.

Mulimuli ane, na savavali atu ai isi faifeautalai e 2,999 agai i faitotoa o lena potu tele. Sa ou auai atu faatasi ma i latou, ua sili atu ona saunia e auauna atu i le Alii nai lo o le mea sa ou i ai i ni nai minute na muamua atu. ■

# O TOFOTOFOGA UMA E MAFAI ONA AUMAIA AI LE FAATUATUA FAATELEINA

Saunia e Giorgia Murgia

*I le avea ai ma se tamaitiiti e fitu tausaga, ma ina ua ou iloina na maliu lo'u tama i se faalavelave, sa ou tatalo ai mo se vavega.*

A'o o'u laitiiti, o se tasi o vaega e sili ona ou fiafia i ai o le aso o le faatalitali lea mo le fo'i mai o lo'u tama i le fale mai le galuega. Ou te tilotilo atu i fafo o le faamalama ma iloa atu o ia o sau, ona ou faitauina lea o ana laa taitasi e agai mai i le fale, ma tulimata'i atu i le olioli na te aumaia. Ou te le'i mafauina lava o le a ou ola e aunoa ma lena lagona.

O se tasi o aso a'o fitu o'u tausaga, i le tulaga o lo'u tama sa sau ai se tamaloa ma ni foliga pau ma sa tu i le faitotoa ma ta'u mai ia i matou ua maliu lo'u tama i se faalavelave.

O lena aso sa ou sao. Sa ou tilotilo atu i lo'u tuagane e fa tausaga ma lo'u tina, sa talavou ma tuua toatasi, ma ou te le'i tagi. Ou te le'i manatu e ono mo'i, o lea sa ou alu ai i le faamalama

ma sioa atu i le alatele. Sa amata ona ou lagonaina se mamafa tiga na tamomia ai i lalo o'u tauau, o se avega sa le mafai ai ona ou manava e pei ona masani ai, o se avega na faapuapuagatiaina ai a'u.

E le'i leva ona uma le maliu o lo'u tama, sa ou alu atu toatasi i lo'u potu a'o mou malie atu le malamalama o le lagoto ma, e pei ona sa aoaoina ai a'u, sa ou tatalo atu i lo'u Tama Faalelagi. Sa ou augani atu ia te Ia ina ia ou toe vaai atu i lo'u tama peleina, tau lava ona ou fusi atu ia te ia. I totonu o lo'u loto, sa ou mautinoa e mafai ona tuuina mai e le Tama Faalelagi lenei vavega ia te a'u.

O lena aso, ou te le'i vaai i lo'u tama pe fusi atu foi ia te ia, ae na tele atu ni mea na tuuina mai ia te a'u. Sa pei na ou lagonaina aao o le Faaola i luga o o'u tauau. Sa pei uma lava na vaai Lona i ai a'o Ia aveese atu le avega na mamafa mai i lo'u fatafata.

O le taimi nei, ua silia ma le 20 tausaga mulimuli ane, e le'i aluese lava lena mapusaga ma a'u. E i ai taimi ou te lagonaina ai le faanoaoa ae sa le'o le leai o se faamoemoe i le maliu o lo'u tama. E mafai ona ou toe



## E MAFAI E LE FAAOLA ONA FAAMALOLO MA FAAMALOSIA

"Ona o Lana taulaga le iu ma faavavau (tagai i le Alema 34:14), ua i ai i le [Faaola] le tiga-alofa atoatoa ma e mafai ona ia faaloaloa mai Lona aao o le alofa mutimutivale ia i tatou. E mafai ona ia aapa mai, pa'i mai, fesoasoani, faamalolo, ma faamalosia i tatou ina ia sili

atu nai lo le mea e mafai ona tatou faia ma fesoasoani ai ia i tatou e faia le mea e le mafai ona tatou faia i le na o lo tatou faalagolago atu i lo tatou lava malosi. . . .

"O avega tulagaese i o tatou olaga taitoatasi ua fesoasoani lea ia i tatou e faalagolago atu ai i le amiotonu, alofa mutimutivale, ma le alofa tunoa o le Mesia Paia (tagai i le 2 Nifae 2:8). Ou te molimau atu ma folafola atu o le a fesoasoani mai le Faaola ia i tatou e tauave a tatou avega ma le faigofie (tagai i le Mosaea 24:15)."

Elder David A. Bednar o le Korama a Aposetolo e Toasefululua, "Tauave ma le Faigofie a Latou Avega," *Liahona*, Me 2014, 90.





***O le taimi nei, ua silia ma le 20 tausaga mulimuli ane, e le'i aluese lava le mapusaga na tuuina mai e le Faaola ia te a'u. E tele taimi ua oo mai ai le Agaga e faamafanafana a'u, fesoasoani ia te a'u, ma faaali mai ia te a'u le ala.***

tepa i tua ma iloa ai le tele o taimi na oo mai ai le Agaga e faamafanafana a'u, fesoasoani ia te a'u, ma faaali mai ia te a'u le ala e mulimuli ai i tulaga aao taua o le Faaola. E mafai ona ou lagona Lona i ai i lo'u olaga, e faafetai ai i lena tofotofoga muamua, lea ua fesoasoani ou te vaai atu ai i tofotofoga o aso uma i se vaaiga e faavavau. Ou te iloa o le talalelei i o tatou olaga ua mafai ai ona tatou lagona le milimili le vaaia o le aao o le Faaola.

Ua ou faaipoipo mo le faavavau, ma o le taimi nei ua ma maua ma lo'u toalua se fanau teine laiti e toatolu, o e e aumaia se tofo o le lagi i totonu o lo matou aiga. Pe a ou vaai atu ia i latou, ou te olioli i le filemu ma le malamalama e faapea, o faanoanoa uma, tofotofoga, ma luitau i o latou

olaga e mafai ona aumaia faatasi ai ma le faatuatua faateleina, molimau fou, ma vavega matagofie. Ou te olioli i le mautinoa loloto e faapea, pe a latou manaomia se mea i tua atu o mea

e mafai ona ma tuuina atu ma lo'u toalua ia i latou, o le a puipuia i latou, faamafanafanaina, ma faasaoina, e pei lava ona sa faia ia te a'u. ■  
*E alala le tusitala i Sardinia, Italia.*

### **AOAO MAI TOFOTOFOGA**

E ui ina taua le tatalo mo le malosi ma le fesoasoani i tofotofoga, ae e taua foi le tatalo ia aoao mai tofotofoga. E mafai ona e tatalo mo "mata e vaai, ma taliga e faalogo" (Teuteronome 29:4) o le alofa mutimutivale ma le alofa tunoa o le Alii i lou olaga (tagai i le Eteru 6:12).

Mafaufau e tusi i lau api talaaga nisi o lesona ua e aoaoina ma nisi o faamaoniga o le alofa o le Tama Faalelagi ua e molimauina i se taimi faigata o lou olaga.





# LAULAUTUTU E FAI MA Molimau A LE ATUA

*I le avea ai ma “masima o le lalolagi,” o i tatou o le Au Paia o Aso e Gata Ai e tatau ona faatumauina lo latou tofo e ala i le ola i la tatou tapuaiga ma ia tautino atu i tatou lava o ni molimau a le Atua.*

**U**a tatou ola i se lalolagi e toatele ua teena le i ai o le Atua po o le taua o Ana poloaiga. Ou te faamoemoe o sa’u faamatalaga o le a fesoasoani ia outou mataalia atili ai i lo outou tiute e molimau i le Atua ma ia galulue mo le upumoni ma le amiotonu.

## I.

Ou te amata i Mataupu Faavae o le Faatuatua e tolu muamua.

“Matou te talitonu i le Atua, le Tamā Faavavau, ma Lona Alo, o Iesu Keriso, ma le Agaga Paia.

Matou te talitonu o le a faasalaina tagata ona o a latou lava agasala, ae lē ona o le solitulafono a Atamu.


“Matou te talitonu e ala i le Togiola a Keriso, e mafai ai ona faaolaina tagata uma, e ala i le usiusitai i tulafono ma sauniga o le Talalelei” (Mataupu Faavae o le Faatuatua 1:1–3).

Na aoao mai e se perofeta maoae o le Tusi a Mamona ia nei lava upumoni e tasi:

“Ia talitonu i le Atua; ia talitonu o loo soifua o ia, ma o ia na foafoaina mea uma, i le lagi ma le lalolagi; ia talitonu ua ia te ia le poto uma, ma le mana uma, i le lagi ma le lalolagi; ia talitonu e lē mafai e le tagata ona malamalama i mea uma e mafai ona malamalama i ai le Alii.

Ma ou te toe fai atu, ia talitonu e ao ina outou salamo ia outou agasala ma lafoai i ai, ma outou faamauualalo outou lava i luma o le Atua; ma ole atu ma le faamaoni o le loto ia faamagaloina e ia outou” (Mosaea 4:9–10).

O le eseese, o aso nei e toatele ua teena pe masalosalo i le i ai o le Atua ma finau mai o tulafono uma mo amioga ua faia e tagata ma e mafai ona taliaina pe teenaina pe a loto i ai.



**Saunia e Elder  
Dallin H. Oaks**

O Le Korama  
a Aposetolo e  
Toasefululua



Aisea ua ou talanoa atu ai e uiga i na upumoni autu i le i ai o le Atua ma le moni o tulafono o le sa’o ma le sese e taitai ai a tatou amioga. O nisi taimi o mea e sili ona manaomia e mafai ona tatou aoaoina atu o mea ia e matele ina tatou le talisapaiaina. E mafai ona tatou tuulafoaia upumoni autu faigofie ona tatou te faapea ua malamalama i ai tagata uma, ae leai. E ao ona tatou faamamafa atu upumoni taua ua faavae ai o tatou talitonuga. I le faaiuga, o nei mea e aofia ai le i ai o le Atua ma le moni e faavavau o upumoni ma le faauigaina o le sa’o ma le sese i Ana aoaga ma Ana poloaiga.

## II.

O le faafitia o le Atua po o le ta’ufaatauvaaina o Lona matafaioi i fuafuaga a le tagata lea na amataina i le Renaissance ua faapea ona aafia ai le lalolagi aoao i aso nei. O le viia o manatu o le tagata na i ai ona aafiaga lelei ma aafiaga leaga. O galuega o faasaienisi ua faia ai le tele o atinae i o tatou olaga, ae o le teena o le mana faalelagi mai le avea ma faavae tupito o le sa’o ma le sese e i latou o e ua suitulagaina le faasaienisi mo le Atua ua toatele ai tagata lotu ua fesiligia le fesili lenei: “Aisea [ua] sili atu ai le taua o manatu o soo se faitofa atamai i faiga saoloto [po o le finagalo foi o soo se lala o le Faamasinoga Maua luga a le Iunaite Setete] . . . i le faia o faaiuga lelei nai lo o le finagalo o le Atua?”<sup>1</sup>

O i latou ua faaaogaina manatu o tagata e suitulaga i aafiaga faalelagi i o latou olaga ua faaititia i latou lava ma taufaatauvaaina tagata i lenei faatinoga.

Ou te faafetai ua ou iloa o loo i ai auala e lua e maua ai le poto—o le auala faasaienisi ma le auala faaleagaga, lea e amata i le faatuatua i le Atua ma le faalagolago i tusitusiga paia, aoaga musuia, ma faaaliga faaletagata lava ia. E le o i ai se eseese tele i le va o le poto e maua mai i nei auala eseese ona o le Atua, lo tatou Tama Faavavau pule aoao, e silafia mea moni uma ma valaaulia i tatou ia aoao e ala i ia auala uma e lua.

O valoaga o aso e gata ai na muai valoia mai ai le tetee tele i upumoni ma faatinoga musuia. O nisi o nei valoaga e faatatau i aneti-Keriso, ae o isi e faatatau i le lotu tele ma le inosia.

### **Aneti-Keriso**

O loo faaaoga e le Aposetolo o Ioane le upu aneti-Keriso e faamatala ai le tagata ua “faafiti i le Tama atoa ma le Alo” (1 Ioane 2:22). O aso nei o i latou o e teena le i ai

o le Atua e ta’u o tagata faapaupau. O nisi o i latou nei e tauemu i le faatuatua o i latou o e talitonu i mea e le mafai ona faamaonia, a’o latou matua teenaina le i ai o le faale-atua lea e le mafai ona latou faamaonia e sese.

Ua saunia i tatou mo na ituaiga faafitiga o le Atua e ala i le tala o le Tusi a Mamona e uiga i se tagata e igoa ia Korioa. I faaupuga e tai pei lava o tusitusiga e sili ona faapaupau o o tatou vaitaimi, na aoao atu ai Korioa o le na faalua ona ta’ua o se “Aneti-Keriso” (Alema 30:6, 12):

Faauta, e le mafai ona outou iloa e uiga i ni mea tou te le vaai atu i ai; o lea e le mafai ona outou iloa o le a i ai se Keriso.

Ua outou tulimatai i luma ma fai mai ua outou vaai i se faamagaloga o a outou agasala. Ae faauta o se fua lea o se mafaufau valea; ma o lenei faavaleaina o o outou mafau-fau ua oo mai ona o uputuu a o outou tamā, ia ua taitai ese atu ai outou i se talitonuga i mea ua le moni” (Alema 30:15–16).

Na folafola atu foi e Korioa “e le mafai ona faia o se togiola mo agasala a tagata.” O lana faamatalaga o le tau-nuga o lona faafitia o le manatu o le agasala ma se Faaola e tai tutusa lelei lava ma le talitonuga o le toatele i o tatou vaitaimi: “Ae e lelei a tagata taitoatasi ia i le olaga lenei e tusa ma le pulea e le tagata o ia lava; o lea e faamanuiaina tagata taitoatasi e tusa ma lona lava atamai, ma e manu-malo tagata taitoatasi e tusa ma lona lava malosia; ma o soo se mea sa fai e le tagata e le o se solitulafono” (Alema 30:17; ua faaopoopo le faamamafa).

### **Manatu e Le A’ia’i le Sa’o ma le Sese**

O aso nei ua tatou faaupuina ai le filosofia a Korioa e le a’ia’i le sa’o ma le sese. Ua faamatalaina faapenei e ni tagata fai manatu se toalua lena filosofia e faapea: “A oo mai i faafitauli e faatatau i amioga sa’o ma sese, e leai ni tali sa’o lele pe sese, leai ni faamasinoga le talafeagai pe talafeagai, ma leai ni auala tatau pe lelei e mafai ona faia ai ni faatusatusaga lelei e faaaoga i taimi uma, i nofoaga uma, ma i tagata uma.”<sup>2</sup>

O le talitonuga lenei o loo faaaoga e le toatele i auala masani o faasalaluga ma i tali i faatosinaga a tupulaga. “O ese mai tulafono ua leva. Fai le mea e te lagona e lelei. E leai se faamasinoga i tua atu o le tulafono a le tagata po o le faamalosi o le le fiafia o tagata lautele ia i latou ua maua.” I tua atu o na ituaiga manatu o loo i ai taumatega e faapea e le o i ai se Atua po o le, afai e i ai, Na te le’i



“O le filosofia e faamamafa ai tulaga faatonuina ma faitalia o tagata, e faia ai se tagata ma atua, o le tagata maualuga, ae o le tagata poto e avea ma fautua o mea uma e moni, lelei ma matagofie.”

tuuina mai ni poloaiga e faatatau ia i tatou i aso nei.

### **Faalelalogi o Manatu o le Tagata**

O le faafitia o se Atua e le o mafai ona faamaonia ma le teena o le sa’o ma le sese, e sili ona malosi i le lalolagi o aoaoga maualuluga atu. O le filosofia faalelalogi e faamamafa ai tulaga faatonuina ma faitalia o tagata, o se lala o le tulaga o le tagata, ma atonu ua faaupuina faapea ona o le malosi o le ogatasi ma le faalelalogi, ua faaaofia ai ma le iloa lelei pe faafuasei foi i aoaoga a faiaoga i le tele o kolisi ma iunivesite.

Mo tagata lolotu, o le elemene e teena i filosofia eseese a tagata e faatauaina gaio-oiga ma le tulaga manuia o tagata, o lo latou taliaina lea o le i ai o le Atua ma lo latou teenaina o amioga lelei atoatoa ua faavaeina i Ana poloaiga. O lea, na teena ai e le Humanist Manifesto i le 1973 “aiaiga masani o amioga lelei” ma “uiga masani e faavae i tala

e le faamaonia ma valea po o tapuaiga e faatonu malosi e tuuina faaaliga, Atua, sauniga, po o le matape’ape’a e sili atu nai lo o manaoga ma aafiaga o tagata.” Na faapea mai foi, “E mafai ona tatou iloaitino le leai o se faamoemoega faalelagi mo le tagata. . . . O tagata e nafa ma tulaga ua tatou i ai po o tulaga o le a avea ai i tatou. E leai se atua o le a laveaia i tatou; e tatau ona tatou laveaia i tatou lava.”<sup>3</sup>

Ioe, o e opogiina le filosofia o le faamamafaina o tulaga faatonuina ma faitalia o tagata soifua, ua latou faia ni saofaga lelei se tele. Mo se faataitaiga, ua latou lagolagoina le faatemokarasi, aia tatau o tagata soifua, aoga, ma le alualu i luma i mea o le olaga. Pau lava le mea a le vavaeesea e nei atinaega ia tagata talitonu, o le tatou atugaluga i tagata mo tagata [humanists], o le latou teenaina o le pule ma tulaga faatonuina faalelagi.

E pei ona tusia e le sa avea ma se polofesa o le filosofia i le BYU o Chauncey Riddle,



**Na tau atu ia Nifae e ala i se faaaliga, e na o le “lua lava ekalesia”: “o le ekalesia a le Tamai Mamoe a le Atua” ma le “ekalesia a le tiapolo.”**

“O le filosofia e faamamafa ai tulaga faatonuina ma faitalia o tagata, e faia ai se tagata ma atua, o le tagata maualuga, ae o le tagata pototo e avea ma fautua o mea uma e moni, lelei ma matagofie.” Ua ia faamanatu mai foi ia i tatou, o le filosofia e faamamafaina tulaga faatonuina ma faitalia o tagata “e fiafia i faasalalauga lelei i le lalolagi i aso nei, aua o le toatele o le au tusitala, faatonu, ma le au faitofa ma tagata i ala o faasalalauga, e a lenei fegalegaleaiga.”<sup>4</sup>

O le toatele o e teena pe masalomia le i ai o le Atua atonu o le a le aveesea lea filosofia o le sa’o ma le sese e le o ni tulaga faatonuina mama. O le a latou vaai ia i latou lava ua i ai ni tulaga faatonuina o le sa’o ma le sese i tua atu, e ui o tulaga faatonuina atoatoa e le faavaea i le talitonuga i le Atua, e faigata ona faamalamalama. O tagata o le lalolagi o e aloaia le teenaina o “amioga faalelotu masani” ma folafola atu lo latou faalagolago i “suesuega o faamaoniga faasaïenisi,”<sup>5</sup> e foliga mai ua faataunuu ai se valoaga o le Tusi a Mamona e uiga ia i latou “sa ola e aunoa ma le Atua i le lalolagi” (Mosaea 27:31).

**O le Ekalesia Tele ma le Inosia ma Isi “Ekalesia”**

Ua faamatalaina e valoaga o le Tusi a Mamona le “ekalesia tele ma le inosia lea o le lalolagi atoa, o lona faavae o le tiapolo” (1 Nifae 14:17). O lenei “ekalesia” ua valoaina e “pule i luga o le lalolagi atoa, i totonu o atunuu uma, ituaiga gagana ma nuu” (1 Nifae 14:11). Ua ta’ua “ua sili ona inosia i isi ekalesia uma,” o lenei foi ekalesia ua faapea mai e galue “mo viiga o le lalolagi” i le aumaia “o le au paia a le Atua . . . i lalo i le faatagataotauaina” (1 Nifae 13:5, 9).

Talu ai e leai se aulotu—Kerisiano pe e le Kerisiano—na “pule” i atunuu uma o le lalolagi po o le gafatia foi e aumai ai le au paia a le Atua i lalo i le “faatagataotauaina,” o lenei ekalesia tele ma le inosia o se mea e sili atu ona taatele ma salalau solo nai lo o se “ekalesia” e tasi e pei ona tatou malamalama ai i lena upu i aso nei. Atonu la o soo se filosofia po o se faalapopotogaga e tete e le talitonuga i le Atua. Ma o le “faatagataotauaina” lea e taumafai lenei “ekalesia” e aumai i ai le au paia, o le a le tele foi se taofiofiga faaletino e pei o le faatagataotauaina o manatu sese.



Na tau atu ia Nifae e ala i se faaaliga, e na o le “lua lava ekalesia”: “o le ekalesia a le Tamai Mamoe a le Atua” ma le “ekalesia a le tiapolo” (1 Nifae 14:10; tagai foi i le 13:4–6). O lenei faamatalaga ua ta’u mai ai le eseesea i le va o i latou o e talitonu i le Atua ma saili e auauna atu ia te Ia e tusa ai ma le lelei o lo latou malamalamaaga, ma i latou o e teena le i ai o le Atua (tagai i le 1 Nifae 14:10).

O isi aoaoga i le Tusi a Mamona o loo faaaoaga ai foi le upu *ekalesia* e faailoa ai le talitonu po o le le talitonu i le Atua. O mataupu mulimuli o le 2 Nifae o loo valoia mai ai e faapea, i aso e gata ai o le a faatutu a’e e Nuuese “ekalesia e tele” o le a “tuu i lalo le mana ma vavega a le Atua, ma ua latou talai a’e mo i latou lava lo latou lava potu ma a latou lava aoaoga, ina ia mafai ona latou maua ai oloa” (2 Nifae 26:20). Ua latou ta’u mai e uiga i “ekalesia ua ati a’e a ua le ati a’e i le Alii” (2 Nifae 28:3), o le a “aoao atu e tusa ma lo latou potu” ma “teena le mana o le Atua” (2 Nifae 28:4, 5). O le a latou “fai atu i tagata: Faalogo mai ia te i matou, ma ia outou faalogo mai ia matou mataupu; aua faauta, ua leai se Atua i aso nei” (2 Nifae 28:5).

I le galuega a le Faaola i sa Nifae, sa Ia lapatai atu e uiga i se ekalesia e le o “ataie i luga o la’u talalelei, [ae] ua atiae i luga o galuega a tagata, po o luga o galuega a le tiapolo” (3 Nifae 27:11; tagai foi i le aoaoga e uiga i le “fale tele ma le ateatea” i le 1 Nifae 8:26–33; 11:35; ma le 12:18). E le o faatapulaaina nei lapataiga i faalapotopotoga faalelotu. I tulaga o o tatou aso, o loo aofia ai le tele o filosofia ma gaoioiga faalelalolagi.

### III.

E toatele tagata e talitonu i le Atua ma le sa’o ma le sese o loo i ai ona o le aafia o Ana poloaiga i faalumuluma ma taufaifaiga mai aoaoga a le lalolagi ma le teenaina o le Atua lea e tupu i le tele o faalapotopotoga, e aofia ai faalapotopotoga faaleaoaoga ma ala o faasalalauaga. O na luitau na valoiaina o loo fetaii ma se numera faaitiitia o tagata e matatau i le Atua, o e tutusa o tatou talitonuga i le Atua ma le i ai o le sa’o ma le sese ona o Ana poloaiga. O lenei mea ua toe tupu ai foi le mea na i ai i le taimi o le Faaola.

E tusa lava pe o tatou “puapuagatia i mea uma,” ae “e le faaatuavaleina” (2 Korinito 4:8). Ua tatou iloa o lo tatou tuputupu ae faaleagaga e manaomia ai “se faafeagai o mea uma” (2 Nifae 2:11). Ua tatou iloa foi o le Alii, “ua silafia ua tatau ona aoai i lona nuu; ioe, na te tofotofoina lo latou

onosai ma lo latou faatuatua’ (Mosaea 23:21).” Ae ua aoao mai foi tusitusiga paia, o le a Ia laveai i latou o e faalagolago ia te Ia (tagai i le 1 Samuelu 17:37, 45–46; Salamo 34:22; Faataoto 3:5–6; Alema 36:27; 38:5).

O le a ou fautuaina atu ni mea se tolu e mafai ona tatou faia e tali atu ai i tulaga o i ai nei, e amata atu i le mea e sili ona faigofie. O nei mea uma e tali atu ai i se aoaoga maoae o le Tusi a Mamona e faapea, e tatau ona tatou “tutu o ni molimau a le Atua i taimi uma ma i mea uma, ma i nofoaga uma atonu [tatou te] i ai, seia oo lava i le oti” (Mosaea 18:9).

#### **Ava i le Suafa ma Musumusuga a le Atua**

Ua aoaoina i tatou ia “talitonu ia Keriso, ma le teena o ia” (2 Nifae 25:29); ia “vaai atu ia [Keriso] i mafaufauga uma; aua le masalosalo, aua le fefefe” (MF&F 6:36); ma ia “tautalatala e uiga ia Keriso,” “olioli ia Keriso,” ma “talai atu Keriso” (2 Nifae 25:26). O auala e lua e mafai ona tatou faia ai lenei mea o a tatou tatalo patino ma i a tatou faafeiloaiga faaletagata lava ia.

I a tatou tatalo faaletagata lava ia ma faaleaiga, e tatau ona tatou ole atu i le Atua e fesoasoani ia i tatou ma o tatou tuaoi ma taitai ia iloa le Atua lo tatou Fofoa ma le sa’o ma le sese ua faavaeina e Ana poloaiga. E tatau ona tatou faia lenei mea mo le manuia o Ana fanau i soo se mea.

E tatau foi ona tatou tetee atu i le sitaili o aso nei, o le taofia o le talanoa i mea faalelotu e oo lava i talanoaga patino. I tausaga e le’i mamao atu, ua toetoe lava a mou atu le aofia ai o faailoga ma upu faaloalo i feofofoaiga o le Kerisimasi ma kata o faamaisega. A tatou faia filifiliga e uiga i nei ituaiga o fesootaiga, e le tatau ona tatou auai i le titinaeseina o faamanatu paia mai a tatou fesootaiga patino. I le aveai ai ma ni tagata talitonu, ua i ai sa tatou tiute e faasao-sao le suafa ma musumusuga a le Atua ma Keriso i a tatou talanoaga, o tatou olaga, ma la tatou aganuu.

#### **Faailoaga Faalauaitele o Faamanuiaga a le Atua**

Lagolago faailoaga faalauaitele o faamanuiaga a le Atua. O lenei faiga e taumafai ai e tetee i le faaitiitia o le ta’uaina o talitonuga faalelotu ma le faatautu atu i le Atua ma Ana faamanuiaga i a tatou aoaoga faalauaitele. Mo se faaitaiga, faatusatusa ia pepa o faamatalaga lautele o loo i ai nei ma gagana faatauana ae faaoleole a taitai o le malo a le Lunoite Setete ma pepa o faamatalaga talitutusa ma upu a taitai i le vaitaimi o seneturi muamua e lua a Amerika. I lona faatusatusaga o le a e maua ai le faamaoniga o tau-mafaiga iloa lelei e aveese i fafo faatauga i le Atua ma le

faatosinga a tapuaiga i le faavaeina ma le faasaosaoina o Amerika.

O le a la se mea e mafai ona tatou faia i ai? Muamua, e mafai ona tatou faia le faataitaiga sa’o i aoaoga i o tatou aiga ma le Ekalesia e ala i le faailoaina o faamanuiaga a le Alii i o tatou olaga ma i o tatou atunuu. Ina ia faia lenei mea “i le potu ma le faatulagaga lelei” (Mosaea 4:27), e le tatau ona pei tatou te teena o o tatou atunuu o loo aofia ai ma ua faamanuiaina i tagatanuu o Iutaia, Mosalemi, ma isi faama-losiauga e le Kerisiano, faapea foi mai le au faapaupau. Ae e tatau ona tatou tautatala ma le sa’o e uiga i le mea moni e faapea, mo se faataitaiga, o le Iunaite Setete o Amerika sa faavaeina e tagata ma taitai o e sa avea o ni Kerisiano malolosi ma o e na faavaeina mataupu faavae o o latou faatuatua i le Faavae, tulafono, ma le aganuu a le malo.<sup>6</sup>

O se tala lata mai nei na tusia e Brother Clayton Christensen, o le polofesa i le Aoga Faapisinisi a Harvard ma sa avea ma Fitugafulu Eria, o loo tautino mai ai o tapuaiga o le faavae o le faatemokalasi ma le faamanuiaina. Ua ia faamanatu mai o le faatemolakasi ma le faaletupe e faalagolago uma i se fua-tele o le usiusitai i le le mafaamalosia ma o lenei tulaga manaomia e faalagolago i tapuaiga e aoao ai mea taua e pei o le “tutusa o tagata, o le taua o le faaaloaloga o meatotino a isi, ma le faamaoni ma le amiosa’o o le tagata lava ia. O le faalelalolagi, lea e tausinio e aveese tapuaiga e talitonu i se Atua o le foafoa, e leai sona paoa po o se polokalama e tuuina mai ai le mea ua ta’u e Brother Christensen “o le faavae manaomia o le usiusitai tele i le le mafaamalosia.”<sup>7</sup>

#### **Finau mo le Faatinoina Saoloto o Tapuaiga**

Finau mo le faatinoina saoloto o tapuaiga. E faigata atu le tulaga lenei ona e manaomia ai se faatinoga tuufaatasi a tagata talitonu o tapuaiga eseese. O nofoaga e mautinoa o i ai le faatagaga a le malo e saoloto ai le faia o tapuaiga, e tatau ona tatou finafinau malosi i taitai o malo e faamamalu na faamautinoaga. O i o le a ou faamamafa atu ai na o ni faataitaiga se lua o atugaluga o loo i ai nei.

O le muamua e aafia ai tatalo i nofoaga faitele. O tatalo e fai pe a ta’ua e tagata le Atua Paia, po o le a lava lo latou aoaoga e uiga i le Atua ma pe faapefea foi ona latou filifili faatatau atu ia te Ia. E tusa lava po o le a le faiga o se tatalo, lea o le a eseese e tusa ai ma le talitonuga o le tagata o loo tatalo, a faia se tatalo i se nofoaga faitele, e taua i le avea ma se tautinoga po o se faailoga o le faalagolago uma o

se vaega i le, ma faaaloalo mo le Atua. O le natura lenei o tatalo e faia i le amataga o fono faitulafono po o fonotaga faamaopoopo ma i tautoga e faia e taimua ai molimau i faamasinoga po o faatautoga aloaia. Po o le a lava le manatu ua filifilia mo tatalo i le Atua ma po o le a foi ona uunaiga faalelotu po o le gagana o le tatalo, ou te faamoe-moe o le a tatou molimauina lo tatou talitonuga i le Atua e ala i le faailoga o le tatalo, na faia ma le potu ma le onosai. O le mea lena e aoga ona finau i ai.

Lona lua, e tatau ona tatou mataala e tetee i taitai o malo ma faufautua i aiaiga mo le lautele, o e fautuaina atu o le faatinoina saoloto o tapuaiga e tapulaa i le “saolotoga o tapuaiga.” Mo se faataitaiga, i le Iunaite Setee, o le faamautinoaga o le “faatinoga saoloto” e puipui ai aia tatau e o mai ai i fafo mai o tatou nofoaga patino, e aofia ai falesa, sunako, ma malumalu, ina ia faatino o talitonuga, e faatatau lea i le aoga o malosiaga faalemalo e manaomia e puipuia ai le soifua maloloina, saogalemu ma le manuia lautele. O le faatino saoloto e mautinoa lava e puipuia ai tagatanuu lolotu i le galueaina o o latou talitonuga i le finauina o aiaiga lautele ma i palota e faia i le avea ai ma tagatanuu po o au faitulafono.

E pei ona saunoa ai Elder Jeffrey R. Holland o le Korama a Aposetolo e Toasefululua, i se saunoaga matagofie i se au faafofoga i le atunuu atoa o taitai Kerisiano, o i matou o le Au Paia o Aso e Gata Ai e “naunau lava ia tatou uulima faatasi . . . ia faamautinoa le saolotoga o tapuaiga o le a mafai ai e i tatou uma ona tautatala atu [ma faataunuuina] ia mataupu faavae faaKerisiano e faatatau i faafitauli faale-agafesootai o o tatou aso.”<sup>8</sup>

E manaomia ona tatou lagolagoina le soofaatasi o taitai faalelotu ma tagata e matatau i le Atua, o e ua o mai faatasi e puipuia aganuu masani o le talitonu i le Atua ma le faailoaina atu o Ana faamanuiaga.

#### **IV.**

I le faaiuga, ou te fautuaina tagata talitonu uma i soo se mea lava, ua i ai sa tatou tiute paia faalelotu ia avea ma molimau o le Atua. E tatau ona tatou faamautuina o tatou talitonuga faalelotu, tutufaatasi e finafinau atu i luga o a tatou aia tatau i le faaaogaina saoloto o a tatou tapuaiga, ma faamamalu o latou tiute taua i le faavaeina ma le faasaosaoina ma le faamanuiaina o malo.

Ou te faamanatu atu o’u uso a Kerisiano i le aoaoga mamalu a le Aposetolo o Paulo:



E manaomia ona tatou lagolagoina le soofaatasi o taitai faalelotu ma tagata e matatau i le Atua, o e ua o mai faatasi e puipuia aganuu masani o le tali-tonu i le Atua ma le faailoaina atu o Ana faamanuiaga.

“A’o agaga uma o e e le tautino ua maliu mai Iesu Keriso i le tino e le mai le Atua i latou: o lo le anetikeriso lava lenei, ua outou faalogo i ai o le a sau; o loo i ai nei lava i le lalolagi” (1 Ioane 4:3).

O le taunuuga o lo tatou le tautatala atu o ni molimau o le Atua, o loo manino lava i le aoaoga a le Faaola e uiga i le masima ua mai. O le faafefiloi ma isi mea—e pei lava ona mafai ona faavaivaia i tatou e tulaga faatonuina o le lalolagi—e aveese ai le faatosinaga tulaga ese i tagata eseese e toatele. E pei ona aoao mai le Faaola, “E leai se mea e toe aoga ai, na o le lafoaiina i fafo, ma soliga e tagata” (Mataio 5:13).

I le avea ai ma “masima o le lalolagi” (Mataio 5:13), o i tatou o le Au Paia o Aso e Gata Ai e tatau ona faatumauina lo latou tofo e ala i le ola i la tatou tapuaiga ma ia tautino atu i tatou lava o ni molimau a le Atua. A tatou faia faapea, ua tatou fegalegaleai ma i latou o e o la e fiafia i le manumalo mulimuli


o le upumoni ma le amiotonu, i le taimi e “tootuli . . . tulivae uma lava, e ta’uta’u mai foi o laulaufaiva uma lava i le Atua” (Roma 14:11) ma i le Alii o Iesu Keriso, o le tatou te tapuai i ai ma o ana auauna i tatou. ■

*Mai se saunoaga i le faigalotu, “Molimau a le Atua,” na tuuina atu i le lunivesite o Polika laga-Idaho i le aso 25 o Fepuari, 2014. Mo le tusiga atoa i le gagana Peretania, alu i le [www2.byui.edu/DevotionalsandSpeeches](http://www2.byui.edu/DevotionalsandSpeeches).*

#### FAAMATALAGA

1. Stephen L. Carter, *The Culture of Disbelief: How American Law and Politics Trivialize Religious Devotion* (1993), 226; see chapter 11 generally.
2. Francis J. Beckwith and Gregory Koukl, *Relativism: Feet Firmly Planted in Mid-Air* (1998), 12–13.
3. I le Paul Kurtz, ed., *Humanist Manifestos I and II* (1973), 14, 15–16.
4. Chauncey Riddle, *Think Independently: How to Think in This World but Not Think with It* (2009), 120, 121.
5. I le Kurtz, *Humanist Manifestos I and II*, 16.
6. Tagai i le John A. Howard, *Christianity: Lifeblood of America’s Free Society, 1620–1945* (2008), 51.
7. Clayton Christensen, “Religion Is the Foundation of Democracy and Prosperity,” see [mormonperspectives.com/2011/02/08/religion-is-the-foundation-of-democracy-and-prosperity](http://mormonperspectives.com/2011/02/08/religion-is-the-foundation-of-democracy-and-prosperity).
8. Tagai i le Jeffrey R. Holland, “Tutu Faatasi mo le Faamoemoe o Keriso,” *Liahona*, Aok. 2012, 26.





# O Le Fouvale o Satani

*O le a le aano tonu o le manatu na faaalua e Satani i le fono i le muai olaga?*

**Saunia e Mark A. Mathews**

Seminare ma Inisitituti

**A**'o o'u talavou, sa amata ona ou matauina ai se matele o le fiailoa sa i ai i nisi o tagata o le Ekalesia. Pe a latou vaai se tulaga na faaaogaina ai tulafono na malilie i ai ma taunuuga mo le le usiusitai (mo se faaitaitaiga, i aoaiga faale-Ekalesia, aoaiga faalematua, po o le faamallosia o tulafono o le misiona po o tulaga faatonuina o amioga i a'oga a le Ekalesia), e masani ona latou faapea mai, "Ae pe le o le auala ea lena a Satani? Pe latou te le o faamallosia ea tagata ia amiotonu?"

O lenei tali sa faateia ai a'u i le taimi muamua—e mafai faapefea e se tagata ona mafaufau e faapea, o auala ua faamaoniaina mai e le Alii ma Lana Ekalesia e mafai ona avea ma se vaega o le "fuafuaga a Satani?" Talu mai lena mea ua ou iloa ai o malamalamaaga sese faapenei e uiga i le fouvale o Satani ma le Taua i le Lagi o le mea moni ua fai si taatele, e pei foi o le nanati o tuuaiga o le mea e foliga mai i lena fuafuaga i aso nei. O le mea e faanoanoa ai, o nei malamalamaaga sese i aoaiga faavae e mafai ona taitai atu ai i taunuuga faataumaioia.

Mo se faaitaitaiga, o nei malamalamaaga sese e mafai ona taitai atu ai nisi o matua e manatu e le mafai ona latou uunaia a latou fanau e auai i le lotu. E mafai ona taitai atu ai tagata o le Ekalesia ia lagolago le faamaonia o agasala matuia o le ola mama. Ma o nei lava malamalamaaga sese e mafai foi ona taitai atu ai nisi tagata o le Ekalesia e mafaufau faapea, o le osia ma le tausia o feagaiga ma tautinoga o le usiusitai e fai si feteenai ma le fuafuaga a le Atua, ae, o le mea e ese ai, o le usiusitai faapena i feagaiga e totonugalemu i le ata moni o le faaolataga a le Atua.

## **O Mea ua Ta'u Mai e Tusitusiga Paia**

O nisi o manatu e uiga i le mea na folasia mai e Satani i le muai olaga e foliga mai e tele ina sau mai faiga anamua

nai lo faaaliga moni e uiga i le mataupu. O le taunuuga, e aoga le toe foi i tusitusiga paia lava ia e saili mai ai mea na faaali moni mai e le Alii e uiga i lenei mataupu taua. I tusitusiga paia, o le vaega autu e uiga i le mea na folasia mai e Satani o loo i fuaiupu muamua o le mataupu e fa o Mose:

"Ma o A'u, o le Alii le Atua, na fai atu ia Mose, ua faapea atu: O Satani lena, o lē na e faatonu i le suafa o la'u Toatasi na Fanaua, o ia lava lea sa i ai mai le amataga, ma sa sau o ia i o'u luma, ma fai mai—Faauta, o a'u lenei, auina atu a'u, o le a avea a'u mo ou atalii, ma o le a ou laveaiina tagata uma, ina ia leai se agaga e toatasi e se ese, ma e moni lava o le a ou faia lena mea; o le mea lea, ia tuu mai ia te a'u lou mamalu.

"Ae, faauta, o lo'u Atalii Pele, o lē o la'u Pele ma la'u Fili-filia mai le amataga, na fai mai ia te a'u—Le Tamā e, ia faia lou finagalo, ma e a oe pea le mamalu e faavavau.

"O le mea lea, ona sa fouvale Satani ia te au, ma saili e faaumatia le faitalia a le tagata, lea na tuu atu e Au, o le Alii le Atua ia te ia, ma le tasi foi, ia Ou avatu ia te ia lou lava mana; i le mana o lau Toatasi na Fanaua, na Ou faia ai ia lafoina o ia i lalo;

"Ma sa avea o ia ma Satani, ioe, o le tiapolo lava lea, o le tamā o pepelo uma lava, e faasese ma faatauasog tagata, ma ta'ita'i faatagataotaua i lona lotu, le toatele lava lea o i latou o e e le faalogo i lo'u leo" (Mose 4:1–4).

## **O le Tama o Pepelo Uma**

Mai nei fuaiupu o loo manino ai sa le'i talosaga mai lo tatou Tama Faalelagi mo ni volenitia e fatufatuai ma fiailoa mai ni fuafuaga eseese ma faatautava o le faaolataga, e pei ona manatu ai nisi. Ae, o le fuafuaga a lo tatou Tama Faalelagi, ma na Ia faailoa mai i Ana fanau agaga o e sa faapotopoto i le Fono Tele i le Lagi. O Iesu Keriso, o le sa "filifilia

mai le amataga” e avea ma Faaola i lena fuafuaga, na tuuina mai ma le lotomauualalo ina ia lagolagoina le fuafuaga a le Tama Faalelagi, i lana fetalaiga “Le Tama e, ia faia lou finagalo [o lona uiga, o le fuafuaga].” O le tulaga lea na faia ai e Satani se fautuaga sa le taliaina ma manatu faapito ina ia sui le fuafuaga a le Tama Faalelagi ia tuuina mai le faaolataga atoa mo tagata uma (tagai i le Mose 4:1). Ae tatou te le’i talanoaina le auala sa ia tautino mai e ausia ai lenei mea, e taua le iloa o Satani o loo ta’ua i nei fuaiupu “o le tama o pepelo uma” (Mose

4:4). I se isi taimi o loo ta’ua o ia “o se pepelo mai le amataga” (MF&F 93:25). O le a tatou matuai vaea pe a [tatou] manatu na ta’u mai e Satani le mea sa’o ina ua ia faia lenei tautinoga soonafai e uiga i le faaolaina o le lalolagi uma.

Afai tatou te malamalama i le ituiga tagata ma le talaaga o Satani, o le a sili atu le talafeagai o le vaai atu ia te ia o le uluai tagata taufaavalea o loo taumafai e faatau mai ia i tatou se oloa na ia iloa e le taitai mafai ona ia tuuina mai. Sa ia manatu e mafai ona ia tuuina mai ia i tatou uma le faaolataga pe afai o le a tatou mulimuli atu ia te ia nai lo o le fuafuaga na foafoaina e lo tatou Tama Faalelagi mo lo tatou faaolataga, ma sa lagolagoina e lo tatou Faaola o Iesu Keriso.

O le mea na folasia mai e Satani o se pepelo. E le mafai ona faatinoina. Sa le o se sui aoga i le fuafuaga ua atoatoa a le Tama Faalelagi, ae nai lo o lena, sa o se mailei na tatao e maileia ma faaseseina ai tagata ia mulimuli atu ia Satani. I le faaiuga, sa o se fuafuaga o le faasalaga, ae le o se fuafuaga o le faaolataga.

### Faatamaiaina o le Faitalia

O le mea taua, o nei fuaitau o mau e le o ta’ua manino mai ai *pe na faapefea* ona fuafua Satani e faataunuu lenei pepelo. Na pau lava le mea o loo ta’ua i tusitusiga paia o le, o le a “faaumatia le faitalia a le tagata” (Mose 4:3). Na fautuaina mai e Peresitene J. Reuben Clark (1871–1961), Fesoasoani Muamua i le Au Peresitene Sili, ni auala taua se lua mo le mea na faailoa mai e Satani e fai, ma faamanatu mai ia i tatou e leai se tasi o ia mea e lua na ono aoga. Sa



***O Satani ua faatau atu i ai  
“o le tamā o pepelo uma”  
(Mose 4:4). Sa ia manatu e  
mafai ona ia tuuina mai ia i  
tatou uma le faaolataga pe  
afai tatou te mulimuli atu ia  
te ia. O le mea na folasia  
mai e Satani o se pepelo.  
E le mafai ona faatinoina.***

ia faamalamalama mai: “A’o o’u faitau i tusitusiga paia, sa manaomia i le fuafuaga a Satani se tasi o ni mea se lua: A le o le faamalosia o le . . . tagata, po o le faasaoina o tagata i le agasala. Ou te fesiligia pe mata e mafai ona faamalosia le atamai o le tagata. E mautinoa lava e le mafai ona faasaoina tagata i le agasala” (i le Conference Report, Oct. 1949, 193; siiina mai i le *Doctrines of the Gospel Student Manual* [2010], 15).

E ui e leai se tasi o nei auala e aoga, ae ua tatou vaaia elemene o taumafaiga ma auala taitasi a Satani i aso nei. Mo se faataitaiga, ua faaogaina le faifaamalosia ma le fosi i aso nei e tagata sau e sailia

le pule i malo, ma o tagata faiupufai tetee o e ua saili ia faatapulaaina le saolotoga o mea tau tapuaiga ma faamalosia tagata e talia amioga leaga. Ua matuai tausilaina e le Alii le faaogaina o le “pule po o le puleaga po o le faamalosi i luga o agaga o le fanauga a tagata, i soo se tikeri o le amioletonu” (MF&F 121:37).

Ae peitai, ua faamalamalama mai foi e le Alii e faapea, o le mana ma le aafiaga e mafai ona faaogaina e faamalosiaina ai le amiotonu e ala i le faatauanau ma le alofa, aoga amiotonu, ma taunuuga talafeagai (tagai i le MF&F 121:41–43). O lenei faamaninoga taua ua faaalai ai o le faataunuuina o aoga e tata ai faale-Ekalesia ma faalematua, faamalosia o tulafono ma tulaga faatonuina i misiona ma aoga a le Ekalesia, ma le faavaeina o tulafono amiotonu i faalapotopotoga, o faiga uma ia ua faamaoniaina e le Alii ma e le o se vaega o le “fuafuaga a Satani.” O le faamama-luina o le faitalia e le o lona uiga o le taliaina o le leai o ni tulafono.

O le auala lona lua o le faiga na faailoa mai e Satani e faasaoina ai tagata uma o loo faamatalaina i le Lomifefiloi o le Tusi Paia: “Sa mananao Lusifelo ma e na mulimuli ia te ia ia otometi le oo mai o le faaolataga ia i latou uma o e o mai i le olaga nei, e aunoa ma le manatu i le mea e manao i ai le tagata lava ia, faitalia, po o le tuuto e ofofuaina mai” (“Taua i le Lagi”). I se isi faaupuga, o le isi faaliliuga, na faailoa mai e Satani ia faasaoina i tatou uma, e le afaina po o a mea na tatou faia. O lenei mea o le a faatamaia ai le faitalia e ala i le faia o se mea e leai se aoga. Ana faapea



e aveeseina uma ia taunuuga o a tatou filifiliga ma maua e tagata uma le tau tutusa, o lona uiga o a tatou filifiliga o le a leai se aoga ma faatamaiaina ai lo tatou faitalia.

O lenei faaliliuga o le auala na fuafua Satani e faasaoina ai i tatou, ua faapea foi ona vaaia i le tele o ana taumafaiga ma auala ua tatou masani ai i aso nei. E le o aunoa ona folafola mai e Satani i tagata e mafai ona latou ola i se olaga o le agasala ae o le a faasaoina lava, po o le, e mafai ona latou maua le fiafia i le amioleaga. O lenei savali faatosina o le faigofie ona faaolaina ma o se olaga i le agasala ua matuai taatele i aso nei, e pei ona sa i ai le folasaga a Satani i le Taua i le Lagi lea “e toatele na mulimuli atu ia te ia” (Aperaamo 3:28).

Ua mafai ona tatou iloa e ala i nei faataitaiga, o le folasaga a Satani e le'i tele lava sona suiga talu mai lava le muai olaga. O loo faaauau pea ona pepelo Satani i tagata e ala i le folafola atu ia i latou, afai latou te mulimuli atu ia te ia, o le a faaolaina i latou, po o le a fiafia, po o a lava isi mea latou te fia faalogo i ai. O loo faaauau foi ona ia faaogaina le fai faamalosi e taumafai ai e fosi ona manatu ma faiga amioletonu i luga o isi. O le mea lea, “o loo faaauau pea le taua i le olaga nei . . . o loo tau pea lava ia faafitauli, ma o loo lamatia pea lea lava faaolataga” (Lomifefiloi o le Tusi Paia, “Taua i le Lagi”).

### **O Se Fuafuaga o le Fouvale**

Atonu o le auala aupito faigofie e faamatala ai le fuafuaga a Satani, e le faavae lea i faamatalaga o masalosologa e uiga i le mea na folasia mai e Satani e fai, ae e faatatau i le mea na taitai atu ai e lana fuafuaga o ia ma e na mulimuli ia te ia e fai moni—o le, fouvale. O loo ta'u faafia mai e tusitusiga paia sa fouvale ma le iloa ia Satani i le Atua. Mo se faataitaiga, na tautino mai e le Alii e faapea “sa fouvale Satani ia te a'u” (Mose 4:3); o “se agelu a le Atua o le sa i le pule i luma o le Atua, o le sa fouvale i le Alo e Toatasi na Fanaua” (MF&F 76:25); ma le “sa fouvale o ia faasaga mai ia te a'u, fai mai, Tuu mai ia te a'u lou mamalu, o lo'u mana lea” (MF&F 29:36).

Mai nei fuaiupu ua manino ai o le folasaga a Satani sa le o se fautuaga mama ia sui ai le fuafuaga a le Atua. Sa o se fouvalega, o se teteega, o se taumafaiga tete e faatoilalo le Atua ae ona pulea le lagi. O i latou o e na mulimuli ia Satani na alagaina le taua i le lagi ma faia i latou lava ma fili i le Atua. Sa faatamaia lo latou faitalia ona na latou mumusu e

filifili le “saolotoga ma le ola e faavavau, e ala i le Puluvaiga sili,” ae na latou filifilia le “faatagataotauaina ma le oti, e tusa ma le faatagataotauaina ma le mana o le tiapolo; ona ua saili o ia ia pagatia tagata uma e pei o ia lava” (2 Nifae 2:27). O le taunuuga, “sa faaliliu ese foi e ia mai [le Atua] le tasi vaetolu o au o le lagi ona o la latou faitalia” (MF&F 29:36).

I se isi faaupuga, o le auala aupito faigofie e iloa ai le fuafuaga a Satani o le, o se fuafuaga o le fouvalega ma le le usiusitai i le Atua. O le eseese, na aoteleina e le Atua ia Lana fuafuaga i upu nei: “Ma o le a tatou tofotofoina ai i latou, e vaai pe latou te faia mea uma o soo se mea e poloaiina ai i latou e le Alii lo latou Atua” (Aperaamo 3:25). Ma le isi, “Matou te talitonu e ala i le Togiola a Keriso, e mafai ai ona faaolaina tagata uma, e ala i le usiusitai i tulafono ma sauniga o le Talalelei” (Mataupu Faavae o le Faatuatua 1:3). O lea la, o le fuafuaga a le Atua o se fuafuaga o le usiusitai ma le amiotonu, ae o le fuafuaga a Satani o le fuafuaga o le le usiusitai ma le fouvale.

### **Iloaina o le Fuafuaga**

O le malamalama lelei i le eseese i le va o le fuafuaga a le Atua ma sini a Satani o le a fesoasoani tatou te atili iloaitino lelei ai po o ai o loo ma o ai foi e le o mulimuli moni ia Satani. O le a fesoasoani tatou te aloese ai i le tuuaia o i latou o e uunaia le amiotonu ma faalauiloa atu le usiusitai i le mulimuli atu i le fuafuaga a Satani ae o le mea moni o loo mulimuli i le fuafuaga a le Atua. O le a faaalua ai foi i latou o loo mulimuli moni i le fuafuaga a Satani i aso nei.


O i latou o e tete ma fouvale faasaga i le Atua ma Ana perofeta, o i latou o e saili e sui le fuafuaga a le Atua, o i latou o e poloaiina le tuu maualalo o tulaga faatonuina o le amiotonu ma saili e faamalosi isi e talia amioga le mama, ma i latou o e saili e faasese tagata i le faatalitonuina o le amioleaga o le fiafia lea, ma e mafai ona tatou maua le faaolataga i le agasala, ua latou lagolagoina uma ni elemene eseese o le fuafuaga o le fouvalega a Satani.

Talosisa ia tatou mulimuli i le fuafuaga moni a le Tama Faalelagi, o se fuafuaga o le faaolataga “e ala i le Togiola a Keriso, ma e ala i le “usiusitai i tulafono ma sauniga o le Talalelei” (Mataupu Faavae o le Faatuatua 1:3). ■

*E alala le tusitala i Iuta, ISA.*

*Ina ia auina mai finagalo faaalua e uiga i le tusiga lenei poo se isi lava tusiga i le Liahona, faamolemole imeli i le liahona@ldschurch.org.*





**Saunia e Elder  
Ulisses Soares**  
O Le Au Peresitene  
o Fitugafulu

# PIPII MAU I LE AI UAMEA

*Afai e faaaoga o tatou faatuatua ma usitai ma le maelega i poloaiga a le Alii, o le a faigofie atu ona tatou filifilia le mea sa'o.*

**A**o aoga se tagata lelei o le Ekalesia ou te masani ai i le kolisi, sa valaaulia o ia i se pati i le po o se Aso Toonai i le fale o se tasi sa la vasega. Sa valaaulia ai foi ma polofesa o le kolisi a la'u uo, ae maise o i latou sa fiafia i tagata aoga. O le pati sa foliga manaia ma saogalemu.

Ae peitai, ina ua taunuu atu la'u uo, sa vave ona ia iloaina, e le o le siosiomaga lea sa ia faamoemoeina. O tagata aoga sa inupia, ulaula, faaaoga fualaa oona, ma fai ni mea leaga i tulimanu uma o le fale. Sa popole o ia ma tonu ai loa e tuumuli, ae peitai sa mamao le mea na fai ai le pati mai lona fale. Sa maua mai lana lifi i ana uo, o lea sa leai ai se auala e toe foi atu ai na o ia.

O le taimi lena na tatalo lemu ai i le Alii, ma ole atu mo se fesoasoani. Ina ua uma ona mafaufau loloto, sa ia lagonaina e tatau ona alu i fafo. Sa ia mulimuli i ona lagona ma nofo ai i fafo o le fale seia oo ina uma le pati.

A'o malaga atu i le fale, sa talanoa ana uo e uiga i mea leaga na tutupu i le taimi o le pati. Sa le lagolelei lagona o la'u uo i lea tulaga. Sa le faigofie ona ia onosaia.

Ae peitai, Ina ua ai ma inu o ia i le faamanatuga i le aso na sosoo ai i le lotu, sa ia

lagona le toafimalie, filemu, ma le mautinoa sa ia faia le faaiuga sa'o. Sa ia iloaina le uiga o le uumau i le ai uamea ma aua ne'i faamamulua, e tusa lava pe a i ai i le puao o le pogisa. Sa ia malamalama lelei i le mea na aoao atu e Nifae i ona uso ina ua ia fai atu, "ma ai se e faalogo i le afioga a le Atua; ma pipiimau i ai, e lē fano lava i latou; pe mafai foi e faaososoga ma ufanafana mu a le fili ona faatoilaloina i latou i le faatauasoina, e taitai ese atu ai i latou i le faafanoga" (1 Nifae 15:24).

Maufaufau i le mea e ono tupu, pe ana faapea na matamuli lena alii talavou, ma le lava ai lona malosia e pipii mau ai i le ai uamea. O se taunuuga o lena isi filifiliga i lona olaga, ua faaipoipo atu ai i se tamaitai talavou i le malumalu, atinae se aiga amiotonu, ma avea ma se tagata faamanuiaina. O loo auauna atu o ia ma le faamaoni i le Ekalesia i le taimi nei ma taumafai lava ia avea ma se faataitaiga lelei mo lana fanau.

## **O Le Tagata Natura**

E le faigofie le fetiaia ma tofotofoga i aso uma. Tatou te i ai uma i se siosiomaga e le fiafia i le talalelei a Iesu Keriso. Ua tatou ola



i se lalolagi ua faaitiitia ma osofaia ai le mama. Ua valaaulia i tatou e ala i faasalalauga ma le tekinolosi e auai i gaoioiga faataumaoui ma faatafuna olaga ia e tetee i o tatou talitonuga ma tulaga faatonuina o le talalelei a Iesu Keriso. O faatosinaga mai uo o e le tutusa o tatou tulaga faatonuina, po o e tutusa o tatou tulaga faatonuina ae e vaivai i lo latou faatuatua, e uunaia ai i tatou e auai i amioga faatufanua. E le gata i lea, e tatau ona tatou feagai ma le tagata o le lalolagi lea e i totonu o i tatou taitoatasi.

O Taiala i Tusitusiga Paia o loo faauigaina ai le tagata natura “o se tagata e filifili ina ia faatosinaina e tuinanau, mana, ma mea e faame-melo i ai le tino nai lo o uunaiga a le Agaga Paia. O se tagata faapena e malamalama i mea faaletino ae le o mea faaleagaga. . . . E ao i tagata taitoatasi ona toe fanaufouina e ala i le togiola a Iesu Keriso ina ia tuu ai le ave ma se tagata o le lalolagi.”<sup>1</sup>

E masani ona sii mai e Peresitene Thomas S. Monson se agaga faigofie e fesoasoani tatou te aloese ai i faasalaveiga o faaosoosoga ma faatumau ai pea ona tatou o i le ala sa’o: “E le mafai ona e sa’o i le faia o le mea sese, e le mafai ona e sese i le faia o le mea sa’o.”<sup>2</sup>

Afai e faaaoga o tatou faatuatua ma usitai ma le maelega i poloaiga a le Alii, o le a faigofie atu ona tatou filifilia le mea sa’o.

### O Le Malamalama o Keriso

Na aoao e le Perofeta o Mamona lona nuu:

O le mea lea, ou te faaali atu ai ia te outou le ala e faamasino ai; ona o mea uma e valaau mai ia fai le lelei, ma faatauanau mai ia talitonu ia Keriso, ua auina mai i le mana ma le meaalofa a Keriso; o le mea lea e mafai ai ona outou iloa ma le malamalama atoatoa ua mai le Atua.



**N**a lagona e la’u uo e tatau ona ia tuua le pati ae nofonofo i fafo seia oo ina uma. Sa ia iloa ina le uiga o le uumau i le ai uamea ma aua ne’i faamamulua, e tusa lava pe i ai i le puao o le pogisa.

“Ae o soo se mea e faatauanauina tagata ia latou faia le leaga, ma ia le talitonu ia Keriso, ma faafiti o ia, ma ia le auauna i le Atua, ona outou iloa lea ma le malamalama atoatoa ua mai le tiapolo; ona o le ala lea e galue ai le tiapolo, aua e le faatauanauina e ia se tagata ia faia le lelei, e leai, e leai lava se tasi; pe faia foi e ana agelu; pe faia foi e i latou o e latou te tuu atu i latou lava ia te ia” (Moronae 7:16–17).

Ua tuuina mai e lo tatou Tama Faalelagi ia i tatou le Malamalama o Keriso, o le “malosiaga faalelagi, mana, po o le uunaiga e mai le Atua e ala ia Keriso ma e tuuina mai le ola ma le malamalama i mea uma.”<sup>3</sup> E fesoasoani i se tagata e filifili i le va o le sa’o ma le sese. O le meaalofa, e o faatasi ma le mafutaga a le Agaga Paia, e fesoasoani ia i tatou e iloilo ai po o se filifiliga e tuu ai i tatou i le teritori a le Alii po o tua i le autau a le fili. Afai e lelei la tatou amio, o loo musuia i tatou e le Atua. Afai e leaga la tatou amio, o loo faatosina i tatou e le fili.

Na faaaoga e la’u uo i le kolisi ia nei meaalofa e lua. O le Malamalama o Keriso na fesoasoani ia te ia e iloa ai le mea sa’o, ae o le Agaga Paia

na taialaina lana filifiliga po o le fea le ala e mulimuli ai. O nei meaalofa e lua e avanoa mo i latou o e pipii mau i le ai uamea.

### O Le Meaalofa o le Salamo

Sei o tatou vaai faalemafaufau e faapea, tatou te le iloa le mafuaaga ua faaseseina ai i tatou pe fenumi ai i faaosoosoga ma iu ai ina solia le agasala. O le a se mea e tatau ona tatou faia? Afai tatou te pauu atu i le faaosoosoga ma le agasala, e tatau ona tatou toe faalelei ma le Atua. I le gagana o tusitusiga paia, e ao ona tatou salamo.

Ua aoao mai Elder Neil L. Andersen o le Korama a Aposetolo e Toasefululua:

“A tatou agasala, ua tatou liliu ese mai le Atua. A tatou salamo, ua tatou toe liliu atu i le Atua.

“O le valaaulia e salamo e seasea lava o se leo o le aoaiga ae o se talosaga alofa e toe liliu ma ia ‘toe-foi’ atu i le Atua [tagai i le Helamana 7:17]. O le augani mai a se Tama agalelei ma Lona Alo Pele e Toatasi ia tatou sili atu nai lo le tagata o tatou i ai, ia aapa atu i se ituaiga olaga maualuga atu, ia sui, ma ia lagona le fiafia i le tausiga o poloaiga. O le avea ai ma soo o Keriso, tatou te fiafia ai i faamanuiaga o le salamo ma le olioli o le faamagaloina. E avea ma se vaega o i tatou, e mamanu ai le ala tatou te mafaufau ma manatu ai.”<sup>4</sup>

O le salamo o se meaalofo matagofie e avanoa i tagata uma o e mananao e toe foi atu i le Atua ma faataga o Ia e mamanuina o latou olaga.

Sa tatou fananau mai ma fua o le faava-vau i o tatou agaga aua o i tatou o fanau a le Atua. E tatau ona tupu lenei fatu. E tupu pe a tatou faaaoga lo tatou faitalia i le amiotonu, a’o tatou faia faaiuga sa’o, ma a’o tatou faa-aogaina le Malamalama o Keriso ma le Agaga Paia e taiala i tatou i faaiuga tatou te faia i le aluga o o tatou olaga. O lenei faagasologa e umi se taimi e fai ai, ae e mafai ona mamanu-ina ai o tatou agaga ma o tatou olaga mai i le aso muamua i le isi.

O le faailoa atu o lo tatou tuuto ma le maelega, o le a foai mai ai e le Alii ia i tatou ia mea ia na le mafai ona tatou mauaina. O le a ia mamanuina i tatou ona e Na te silafia a tatou taumafaiga e faatoilalo o tatou le atoatoa ma vaivaiga faaletagata.

I lena tulaga, o le salamo e avea ma se vaega o o tatou olaga i aso uma. O lo tatou fetagofi atu i vaiaso uma i le Faamanatuga—ia o mai ma le agamalu, lotomauualalo, i luma o le Alii, ma faailoa atu lo tatou faalagolago ia te Ia, ole atu ia te Ia e faamagaloma ma faafou i tatou, ma folafola atu ia manatua pea o Ia—e matuai taua tele.

O nisi taimi i a tatou taumafaiga i aso taitasi ia avea atili e faapei o Keriso, tatou te tauivi ai pea lava pea ma faafitauli lava e tasi. E pei lava sa tatou feaei i se laau na sio i se mauga. E i ai taimi tatou te le iloa ai lo tatou alualu i luma seiiloga tatou te latalata atu i le tumutumu ma toe vaai ifo ai mai tumutumu mauga maualuluga. Ia aua le lotovaivai. Afai o loo e taumafai ma galue ia salamo, ua e i ai i le faagasologa o le salamo.

Na saunoa Elder D. Todd Christofferson o le Korama a Aposetolo e Toasefululua e faapea, “O le faatoilaloina o mausa po o -vaisu leaga, e masani lava o lona uiga o se taumafaiga i le aso ona sosoo ai lea ma le isi ma le isi, atonu e moni ni aso se tele, po o ni masina ma ni tausaga, seia oo ina tatou ausia le manumalo.”<sup>5</sup>

A o tatou agai i luma, ua sili atu ona manino la tatou vaai i le olaga ma lagona le malosi atu o le galue o le Agaga Paia i totonu ia i tatou. Mo i latou o e ua salamo faamaoni ae e foliga mai e le o mafai ona lagona le toomaga, ia faaauau pea ona tausii poloaiga. Ou te folafola atu ia te outou o le a oo mai lena toomaga i le taimi lava a le Alii. O le faamaloloina e manaomia ai le taimi.

Ia tatou faatumauina se vaaiga e faavavau e ala i le faatoilaloina o le tagata o le lalolagi, faamasino e ala i le Malamalama o Keriso, saili le taitaiga mai le Agaga Paia, salamo pe a tatou faia se mea sese, ma faataga lo tatou Tama Faalelagi e suia o tatou olaga i le mea ua Ia fuafuaina mo i tatou. ■

*Mai se saunoaga i le faigalotu Becoming a Work of Art,” a le Iunivesite o Polika Iaga-Idaho i le aso 5 Nov. 2013. Mo le tusiga atoa i le gagana Peretania, asiati i le speeches.byu.edu.*

#### FAAMATALAGA

1. Taiala i Tusitusiga Paia, “Tagata Natura”; scriptures.lds.org.
2. Thomas S. Monson, “In Harm’s Way,” *Ensign*, Me 1998, 48.
3. Taiala i Tusitusiga Paia, “Malamalama, Malamalama o Keriso”; scriptures.lds.org.
4. Neil L. Andersen, “Salamo . . . Ina Ia Ou Faamaloloina Outou,” *Liahona*, Nov. 2009, 40.
5. D. Todd Christofferson, “O Le Iloaina o le Aao o le Atua i o Tatou Faamanuiaga i Aso Taitasi,” *Liahona*, Ian. 2012, 29.



#### O SE FOLAFOLAGA I TAGATA UMA

“Sa faatinoina e le Faaola le Togiola, lea ua saunia ai se auala mo i tatou ina ia mama ai. . . . O i latou o le a salamo ma lafoai agasala o le a iloina o loo faaloaloa mai pea Lona aao alofa mutimutivale. . . . O le taunuuga o Lana taulaga o le faasao-loto lea o i tatou mai aafiaga o le agasala, ina ia mafai e tagata uma ona tafiese le tausalaina ma lagona le faamoemoe.”

Peresitene Boyd K. Packer, Peresitene o le Korama a Aposetolo e Toasefululua, “O Le Mafuaaga mo lo Tatou Faamoemoe,” *Liahona*, Nov. 2014, 6, 7.





O LE  
FAAALOALO  
O LE FAAOLA  
MO

# Tamaitai

**Saunia e Robert ma Marie Lund**

I se vaitaimi na masani ona faia ai tamaitai o ni tagata le taualoa, ua faailoa mai e le Evagelia a Ioane sa taulimaina e Iesu Keriso ia tamaitai ma le agaaloa ma le faaaloalo ma e faapea, e pei ona saunoa mai ai Elder James E. Talmage (1862–1933) o le Korama a Aposetolo e Toasefululua e faapea, “o le siamupini maoae i le lalolagi o tamaitai ma le tulaga faatamaitai o Iesu Keriso.”<sup>1</sup>

O le tusiga lenei ua tulai atu i tamaitai nei i le Evagelia a Ioane: (1) Maria, le tina o Iesu (tagai i le Ioane 2:1–11; 19:25–27); (2) o le fafine Samaria i le vaieli (tagai i le Ioane 4:4–30, 39–42); (3) o le tamaitai na molia i le mulilua (tagai i le Ioane 8:1–11); ma (4) Maria le Makatala (tagai i le Ioane 20:1–18). E ui lava o aafiaga i olaga o nei tamaitai na matuai tele se eseese, ae na faataua e Ioane le silafia e le Faaola o eseese i tulaga o o latou olaga, ma sa ia tusia faamanuiaga na oo mai i tamaitai taitoatasi ona o lona faatua ia Iesu Keriso.

*E ala i le suesueina o  
fegalegaleaiga a Keriso  
ma tamaitai i le tusi a  
Ioane, e mafai ai ona tatou  
malamalama lelei i la  
tatou sootaga e mafai ona  
i ai faatasi ma Ia.*



## O le Faatuatua o Maria na Taimua i le Uluai Vavega Faalauaitele

Na vave faalauiloa mai e Ioane i lana Tusi ia Maria i le au faitau. O lana tala i le uluai vavega faalauaitele a Iesu Keriso i le faaipoipoga i Kana o loo i ai se saafiafiga i le faatuatua o Maria.

O le tulaga o Maria i le faaipoipoga sa foliga mai o se tasi o ia tiutetauave.<sup>2</sup> Ina ua “uma foi le uaina [a le au valaaulia], ona fai atu lea o le tina o Iesu ia te ia, Ua leai sa latou uaina” (Ioane 2:3). O lenei fuaitau ua faailoa mai ai, ina ua tapa atu Maria ia Iesu Keriso mo se fesoasoani, atonu sa ia mafafauina ma le faaloalo se vavega.<sup>3</sup>

O le tali, na fetalai atu Iesu Keriso, “Funa e, se a ea lau na ia te a’u? e le’i oo i lo’u itu aso” (Ioane 2:4). I le faaliliuga musuia a Iosefa Samita o lenei fuaiupu, na fesili atu le Faaola ia Maria po o le a se mea e manao i ai o ia Na te faia ma folafola atu Na te faia.<sup>4</sup> O le faalagiga *funa e* atonu e foliga pa’aa ma le migao i se tagata faitau i onaponei, ae peitai, o lona faaogaina ii e le Faaola atonu sa faamoemoe e faailoa atu ai le uiga faafeagai.<sup>5</sup> Na faamalamalama mai e se tasi o tagata atamai, o le “Funa e, ae le o le Tamaitai,” i le faa-Elenei o se faalagiga o le faaloalo, na faaogaina e oo lava i le faalagiga o tupu tamaitai.”<sup>6</sup> Sa pei lava na fetalai atu o Ia i Lona tina, “Lau afiga e, soo se mea lava e te ole mai ai ia te a’u i le faatuatua, o le a ou tuuina atu ia te oe.” Ua faaalua mai e lenei tala sa silafia e le Faaola ia atugaluga masani na feagai ma tamaitai. Sa faamamalu e Iesu Keriso ia lona tina e ala i le ofo atu e fesoasoani ia te ia i ana avega ma tiutetauave.

Ona faamatala mai lea i le tala le faaauau pea o le faatuatua o Maria a’o ia faatonuina auuana e usitai ia Iesu Keriso: “O se mea lava e fai mai ai o ia ia te outou, ia outou faia” (Ioane 2:5). Sa tutumu kate i vai, ma sa liliu e le Faaola le vai i le uaina e tali atu ai i le talosaga a Maria e fesoasoani e tuuina atu [vaiinu] i le faaipoipoga. O se lesona matagofie ua tatou aoao mai ia Maria: i taimi e manaomia ai [le fesoasoani], saili atu ma faalagolago ia Iesu Keriso, o le ua i ai le mana uma. E pei o Maria, e mafai foi e tamaitai o le Au Paia o Aso e Gata Ai i aso nei ona faalagolago ma le faatuatua ia Iesu Keriso, pe a latou lagonaina le lofituina i o latou tiutetauave.

O lenei tala puupuu e le gata ina aoao mai i le malosi o le faatuatua o Maria, ae ua faamaonia ai foi le faasinomaga moni o Iesu Keriso o le Alo o le Atua e ala i Lana uluai



*O se lesona matagofie ua tatou aoao mai ia Maria: i taimi e manaomia ai [le fesoasoani], saili atu ma faalagolago ia Iesu Keriso, o le ua i ai le mana uma.*





*Ona o lona faatuatua, na maua ai e le fafine Samaria se molimau mai le Agaga ma manao ai e molimau atu o Iesu o le Keriso, le Mesia na folafolaina mai.*

vavega faalauaitete. O le tamaitai e sosoo ai ua faalauiloa mai e Ioane i le tagata faitau o le fafine Samaria.

### **Na Faaali Atu e Iesu Keriso le Faaaloalo i se Fafine mai Samaria**

O le tala o loo i le Ioane e 4 o loo faamaonia mai ai le faaaloalo o Iesu Keriso i tamaitai uma, e tusa lava po o a o latou tulaga faaletagatanuu pe faale-ekalesia. O nisi tagata Iutaia latou te manatu o tagata Samaria e “sili atu ona le mama nai lo o se tagata Nuuese o soo se ituaiga tagatanuu lava”<sup>7</sup> ma teena ai soo se fegalegaleaiga ma i latou. Sa le gata ina taatiaese e Iesu Keriso ia aganuu o lena vaitau, ae ua faailoa mai e Elder M. Russell Ballard o le Korama a Aposetolo e Toasefululua le mamalu na faaeeina e le Faaola i luga o lenei tamaitai: “O le taimi muamua lava na faailoa atu ai e le Alii o Ia lava o le Keriso, sa [faailoa atu lea] i se tamaitai Samaria i le vaieli o Iakopo.”<sup>8</sup>

Ina ua mavae ona femaliuiai i le vevela o le aso, sa afe Iesu Keriso e malolo ma ia maua se vai taumafa. Sa amatalia e le Faaola se talanoaga ma le fafine Samaria i le vaieli e ala i le talosaga atu mo se vai e inu ai. Sa faasolosolo malie lava, e ala i le talanoaga, ona ia [fafine] maua se molimau e uiga i Lona paia. O loo tusia e Ioane sa ta’ua muamua e ia ia Iesu “o se Iutaia,” ona sosoo ai lea ma le “Le Alii e,” sosoo ai ma le “perofeta,” ma mulimuli ai “o le Keriso” (tagai i le Ioane 4:9–29). O le faateleina o ana filifiliga faaaloalo o faalagiga ua faailoa ai na ia atiina ae le faatuatua ia Iesu Keriso ma ua liuaina.

Na aoaoina o ia e le Faaola e faapea, sa ia te Ia le “vai ola” (Ioane 4:10) ma o i latou o e feinu ai o le a le toe fia feinu lava. O le le malamalama, sa atili fesili atu ai le fafine. Ona faailoa atu lea e Iesu Keriso le olaga ua mavae o le fafine Samaria ma lana mafutaga le mama o loo i ai i le taimi lea. E ui lava atonu na ia lagonaina le matamuli, ae atonu foi sa ia lagonaina sa fetalai atu Iesu Keriso ma le faaaloalo, aua sa ia tali mai ma le faautauta, “Le Alii e, ua ou iloa nei o oe o le perofeta” (Ioane 4:19). O le uma ai ona faaalua o ana agasala, ma le leai o se mea na toe natia, sa faaoga ai e le fafine le faatuatua ia Iesu Keriso a’o Ia aoaoina o ia. O se tasi o Ana tali e mafai ona avefa ma se vaega taua i le mauaina o le faaolataga: “Funa e, [po o le lau afioga e], talitonu mai ia te a’u” (Ioane 4:21).

Ona o lona faatuatua, na maua ai e le fafine Samaria se molimau mai le Agaga ma manao ai e molimau atu o Iesu



o le Keriso, le Mesia na folafolaina mai. O le tuua ai o lana kate vai (ua faatusa i ana meatotino faalelalolagi), sa alu atu ai o ia i le aai ma tala'i atu, "Ina o mai ia, ina vaai i le tagata ua na ta'ua mai ia te a'u o mea uma lava ua ou faia: pe le o le Keriso ea lea?" Ioane 4:29). O le aveva ma se meafaigaluega i aao o le Atua, o le faatuatua ma le naunautai faafai-feautalai o le fafine Samaria, na fesoasoani e faamalulu ai loto o isi e talia Iesu Keriso.

O le faailoaina mai o lenei aafiaga, ua faaali mai ai e Ioane e silafia e le Faaola ia tamaitai ma silafia faamatalaga uma o o latou olaga. Ma le isi, e faaaloologia e Ia ia tamaitai uma e tusa lava po o a o latou tulaga. Mo tamaitai o e e le o lagona o i ai se latou mafutaga ma Keriso pe lagona le pei o se tagata tuulafoaia i o latou lava tagata, o le tala lenei ua faaalua ai e silafia e Iesu Keriso ia luitau a tamaitai tai-toatasi ma e mafai ona taliaina ma sii a'e o ia. O le Evagelia a Ioane o loo faamamafa ai lenei manatu e ala i le aoao mai e uiga i le agaalofa o Keriso mo le fafine na maua o mulilua.

### **Na Faaali Atu e Iesu Keriso le Agaalofoa i le Fafine na Molia i le Mulilua**

O le Ioane e 8 ua faaalua ai le eseese o le faiga faalealofoa o le fafine e le au Faresaio ma le faaaloalo agavaivai ma le agaalofa na faaalua e Iesu Keriso ia te ia [fafine]. Atonu i se taumafaiga ia mafai e le au Faresaio ona iloa ma toe aveese mai lo latou faiga faalealofoa o le fafine, na "punou [le Faaola], ma tusi i lona tamatamai lima i le ele-ele, [e pei na te le'i lagonaina atu i latou]" (Ioane 8:6). O le faatinoga o le "tusi i luga o le elele sa o se faatinoga faa-faailoga lauiloa anamua, e faailoa ai le le manao e taulima le mataupu ua folasia."<sup>9</sup>

E ui i lea, sa faaauau pea ona faalavelave le au tusiupu ma le au Faresaio ia Iesu Keriso ma faamaasiasi ai le fafine. Ona o le agaalofa i le fafine, sa "nofo o ia i luga, ma faapea atu ia te i latou, O so outou e leai sana agasala, ia lua'i togi se maa ia te ia. Ona toe punou lea o ia, ma tusi i le elele" (Ioane 8:7-8). O le iloaina o a latou [agasala] ma le tausala-laina e le tagata o ia lava, sa taitoatasi i latou na molia le fafine ma o ese atu i fafo ma le faamaina, ae tuua ai na o le fafine mulilua e faafesagai ma Iesu.

O le mea na lelei ai, sa nofo ai lava le fafine i talaane o Iesu Keriso nai lo o le sola ese. Sa foliga mai sa ia lagonaina le siitia ma le faamalositia i le faaaloalo na faia ai e Iesu



*O le mea na lelei ai, o le fafine o loo i le Ioane e 8 sa nofo ai lava i talaane o Iesu Keriso nai lo o le sola ese. Sa foliga mai sa ia lagonaina le siitia ma le faamalositia i le faaaloalo na faia ai e Iesu o ia.*





*O Maria le Makatala sa filifilia e avea ma tagata muamua e molimau ona faatonuina lea e molimau atu e uiga i le Faaola toetu. E faaauau pea ona faalagolago le Alii i tamaitai i o tatou aso e tutu o ni molimau ia te Ia.*



o ia. Sa ia fesili atu, “Funa e, [po o le, lau afioga e] o ifea i latou e na molia oe? ua le faasala mai ea se tasi ia te oe? Ua fai mai o ia, Le Alii e, e leai lava se tasi. Ona fetalai atu lea o Iesu ia te ia, Ou te le faasala foi ia te oe; alu ia oe, aua e te toe agasala” Ioane 8:10–11).<sup>10</sup>

Ma o lea foi, ua molimau mai le Evagelia a Ioane sa faia e Iesu Keriso ia tamaitai i le agaalofa ma le faaaloalo, e ui lava i a latou agasala. Talu ai ua agasala tagata uma, e mafai ona tatou maua le faamoemoe sili mai le faataitaiga a lenei fafine na faaalua le faatuatua ia Iesu Keriso. E pei lava ona faaalua e le Faaola le finagalo malamalama i lenei fafine i lalo o tulaga o le popole ma le tiga, sa Ia faamafanafanaina Maria le Makatala ina ua Ia maua atu o ia o tagi i le tuugamau.

### O Maria le Makatala Sa Filifilia o se Molimau o le Keriso Toetu.

Ua na o Ioane lava le tusitala Evagelia ua faailoaina mai le tagata muamua na vaai i le Alii toetu, ua faaalua ai e mafai e tamaitai totoa ma atamamai ona maua faaaliga maoae faaleagaga. Na tusia e Ioane, “O le uluai aso o le vaisapati, i le taeao, a o pouliuli lava, ua alu ane ai Maria le Makatala i le tuugamau, ua vaai atu i le maa ua aveeseina i le tuugamau” (Ioane 20:1). O le vaai ua aveeseina le maa, na momo’e atu ai Maria e sue mai se fesoasoani ma logo le au Aposetolo ua leai se tino o Iesu. Sa ia tau atu ia Peteru ma Ioane, o e na tamomoe mai i le tuugamau ma maua ai na o ie na tanumai ai. Ona o ese lea o Aposetolo e toalua, ae tuua toatasi ai na o Maria i le tuugamau.

Sa tagi Maria i le togalaau i talane o le tuugamau: o le manatu o le le iloaina o le mea na tupu i le tino o le Alii atonu na lofituina ai o ia. E ui lava ina sa faaali mai le Faaola ma talanoa atu ia te ia, ae sa na le iloa muamua o Ia. Ae “Ua fetalai atu Iesu ia te ia, Maria e (Ioane 20:16). O se mea na mafua ai ona ia iloa o lona Faaola lea. “Sa vave lava le iloaina. O lona vaitafe loimata na avea ma se sami o le olioli. O Ia lea; ua toetu o ia; o soifua o ia.”<sup>11</sup> Ina ua uma le molimauina o le Alii Toetu, sa talosaina Maria e molimau atu i le au Aposetolo o soifua o Ia.

E ui ina sa le’i mautinoa e le au soo i le taimi muamua (tagai i le Luka 24:11), Ae atonu sa i ai se aafiaga o le molimau a Maria. Mulimuli ane, na faapotopoto ai le au soo e talanoa i mea na tutupu o le aso, atonu na mafaufau loloto i le molimau a Maria, ae maliu atu Iesu “ua tu i totonu, ona fetalai atu lea o ia ia te i latou, Ia outou manuia” (Ioane 20:19).



O leni aafiaga ua faamamafaina ai le maualuga o le manatulia e Iesu Keriso o tamaitai, aua o Maria le Makatala sa filifilia e avea ma tagata muamua e molimau ona faatonuina lea e molimau atu e uiga i le Faaola toetu. E faaauau pea ona faalagolago le Alii i tamaitai i o tatou aso e tutu o ni molimau a le Atua. Na folafola mai Elder M. Russell Ballard, O lo tatou tisipenisione ua le aunoa ma ona tamaitai totoa. E le mafaitaulia tamaitai mai konetineti uma ma mai ituaiga olaga eseese ua faia ni saofaga iloga i le faamoemoe o Keriso. . . . O la’u fesili o le, “Mata o le a avea oe ma se tasi o na tamaitai? Ma pe mafai e outou o alii o loo umia le perisitua ona tali atu i lea lava valaau e tasi?”<sup>12</sup>

### E mafai Ona Tatou Mulimuli i a Latou Faataitaiga.

E ala i le faatuatua ia Iesu Keriso, e mafai ai ona tatou mulimuli i le faataitaiga a nei tamaitai o loo tusitusiga a Ioane. E mafai ona tatou talitonu ua malamalama le Faaola i atugaluga masani o o tatou olaga ma e mafai ona fesoasoani e tauave a tatou avega. E mafai ona tatou talitonu o le a siia’e i tatou e Iesu Keriso e tusa lava po o a o tatou solitulafono. Ma le isi, e mafai ona tatou iloa e mafai e Keriso ona laveai i tatou i o tatou faavauvauga loloto, mafatiaga, ma puapuaga. ■

*E alala tusitala i Iuta, ISA.*

#### FAAMATALAGA

1. James E. Talmage, *Jesus the Christ*, lomiga lona 3 (1916), 475.
2. Bruce R. McConkie, *Doctrinal New Testament Commentary*, 3 vols. (1965–73), 1:135.
3. Tagai i le James E. Talmage, *Jesus the Christ*, 145.
4. Tagai Faaliliuga a Iosefa Samita, Ioane 2:4 (i le Ioane 2:4, vaefaaamatalaga a).
5. Tagai i le James E. Talmage, *Jesus the Christ*, 144–145.
6. I le J. R. Dummelow, ed., *A Commentary on the Holy Bible* (1909), 778.
7. James E. Talmage, *Jesus the Christ*, 172.
8. M. Russell Ballard, “O Tamaitai o le Amiotonu,” *Liahona*, Tes. 2002, 34.
9. I le Dummelow, ed., *Commentary*, (788–89).
10. Ua faaopoopo mai i le Faaliliuga a Iosefa Samita e faapea, mai lena lava taimi, na vivii atu ai le fafine i le Atua ma talitonu ia te Ia (tagai Iosefa Samita Faaliliuga, Ioane 8:11).
11. Bruce R. McConkie, *The Mortal Messiah*, 4 vols. (1979–81), 4:263.
12. M. Russell Ballard, *Liahona*, Tes. 2002, 38–39.





PE A  
ALIA'E  
Masalosaloga  
MA Fesili

*O fesili o se vaega taua o lo tatou tuputupu a'e e faavavau, ma o le sailiga mo tali i le auala a le Alii e mafai ona aumaia ai i tatou ia latalata atili atu i lo tatou Tama Faalelagi.*

Saunia e Adam Kotter

**O**na o le initoneti, ua le o se mea e le masani ai i tagata o le Ekalesia ona fetaii ma manatu e faapea ona luitauina ai o latou talitonuga. O nisi tagata o le au paia ua latou manatu o fesili e tulai mai e faaosososi ai le fiafia ma mafaufau ai pe mata e fetaii le i ai o se fesili e uiga i lo latou faatuatua.

E taua le malamalama e lelei le i ai o fesili. O le mea moni, o le tuuina atu o fesili i le faatuatua e taua i lo tatou alualu i luma faaleagaga. Ae peitai, o fesili faamaoni e le tutusa ma masalosaloga.

### O le va o Fesili ma Masalosaloga

O le a la le eseese e le va o se fesili ma se masalosaloga? O fesili, pe a fesiligia ma se manao faamaoni e faateleina le malamalama ma le faatuatua o se tasi, e tatau ona uunaia. E tele faaaliga anamua ma onaponei ua oo mai o le taunuuga o se fesili faamaoni.<sup>1</sup> O le poloaiga faaletusi paia ia saili ma ole atu ina ia mafai ona maua, o se tasi lea [o aogaga] ua ese le ta'ua soo. O fesili faamaoni o fesili ia e fesiligia ma le "manatu moni" (Moronae 10:4) ina ia malamalama lelei ai ma ia atili usitai atoatoa ai i le finagalo o le Alii.

O se tagata e fesili faamaoni e faaaauu pea ona usisitai a'o sailiili mo tali. O le faatusatusaga, ua ou vaai, a masalosaloga tagata i o latou talitonuga, e masani ona latou taofia lo latou tuuto i poloaiga ma feagaiga a'o faatalitali mo ni tali. O le aga a le tagata masalosaloga e masani lava ona taofi le usisitai pe faatapulaa foi, a'o faatalitali i se iuga o masalosaloga.

E le o i ai se fautuaga i tusitusiga paia po o aogaga a perofeta o uunaia ai le masalosaloga. O le mea moni, ua tumu tusitusiga paia i aogaga o le faafeagai. Mo se faataitaiga, ua poloaiina i tatou e "aua le masalosaloga, aua le fefe" (MF&F 6:36). Ma i le Mamona 9:27, o loo uunaia ai i tatou e "aua le masalosaloga, ae ia talitonu."

O le tasi o faafitauli i le masalosaloga o le naunau lea e usitai *pe afai lena e uma* ona taliina se le mautonu ma ua faamalietia ai tagata masalosaloga. O le ituaiga uiga lena na faaaliga e Korioa, o le na fai atu, "Afai e te faaali mai ia te a'u se faailoga . . . ona ou talitonu ai lea i le moni" (Alema 30:43).

E tuuaititia le malosi o le masalosaloga e faaumatia ai le faatuatua, faamoemoe, ma e oo foi i le aiga i le minute lava e fai mai faamaoni ai se tasi, "O le a ou faia mea ua poloaiina mai e le Alii, e tusa lava pe vave pe afai foi e taliina a'u fesili, ona ua ou osifeagaiga e faia o lea." O le eseese e le va o se [faamatalaga] faamaoni "O le a ou tausia poloaiga *ona . . .*" ma se [faamatalaga] masalosaloga "O le a ou tausia poloaiga *pe afai . . .*" e malosi ma faavavau le taua.

### O Le Mamanu a le Alii mo le Mauaina o Tali

I le avea ai ma se enisinia o upegatafailagi, e tatau ai ona ou mulimuli i ni taiala ua maioio lelei pe afai ou te manao ia mafai ona fesootai upegatafailagi a la'u komepiuta ma isi upegatafailagi. O nisi taimi o nei tulafono e fai si le manaia, ae a mulimuli ia enisinia taitasi o upegatafailagi i tulaga



faatonuina e tasi, e mafai ona matou fatuina se mea e sili atu ona malosai nai lo le mea e mafai ona matou faia pe afai e galue na o le tagata lava ia.

E faapena foi, afai tatou te sailia se tali i se fesili faaleagaga mai le Punavai o le malamalama uma, ona tataua lea ona e mulimuli i Ana tulafono ia maua ai le tali. O lenei faagasologa e manaomia ai i soo se tulaga se mana o ia malamalama i le upumoni ma se naunau e mulimuli i le finagalo o le Alii (tagai i le Alema 32:27). A le o lena, e te oo i le tulaga lamatia o le faatauana o oe lava i tali e te mana o talitonu i ai nai lo o le mauaina o tali moni mai le Atua.

O se mea masani le lagonaina o le atugaluga po o le le mautonu pe a luitauina i se manatu e le masani ai, ae maise lava pe a luitauina ai se talitonuga mausali. O le mea taua, ia aua ne'i faatagaina lena le mautonu e aveese ai i tatou mai a tatou feagaiga a'o faagasolo la tatou sailiga mo ni tali. Ua ou aoaoina mai aafiaga patino e faapea, e le mafai ona fuli o tatou tua i le Atua ona faamoemoe lea e tali mai o Ia i a tatou fesili i a tatou tuutuuga. E manaomia le faatuatua e tausi ai poloaiga a'o iloilo ina lo tatou le mautonu. E ono tau faasooso le taofi pe faatapulaa o lo tatou ususitai a'o faatali ni tali mautu o o tatou atugaluga, ae peitai, e le o le auala lenei o le Alii.

I tulaga e tataua ai, e ao ona tatou fesili muamua ia i tatou lava, "Pe o o'u naunau e fai mea e manaomia ia maua ai se tali mai le Alii, pe ua na o lo'u mana o fai i la'u lava ala? Na aoaoina mai e le Alii lava Ia lenei mamana ina ua Ia fetalai: "Ai se tasi e fia fai lona finagalo, e iloa ai e ia le mataupu, pe mai le Atua, pe ou te tautala fua lava a'u" (Ioane 7:17).

O le laasaga muamua la i le taliina o fesili o le tu "mausali ma le le mafaagaetia i le tausiga o poloaiga a le Atua" (Alema 1:25). Na fesili Elder Neil L. Andersen o le Korama a Aposetolo e Toasefululua:

"E faapefea ona e tumau ma le "mausali ma le le mafaagaetia" i se taimi o le tofotofoga o le faatuatua? E te faatofu oe lava ia i mea moni o loo fesoasoani e fausia le fatu o lou faatuatua: e te faatinoina le faatuatua ia Keriso, e te tatalo, e te mafaufau loloto i tusitusiga paia, e te salamo, e te tausi i poloaiga, ma e auauna atu i isi.

"Pe fetaii ma se tofotofoga o le faatuatua—po o le a lava lau mea o fai, e te le laa ese lava mai le Ekalesia! O le faatau-mamaoina o oe lava ia mai le malo o le Atua i taimi o se tofotofoga o le faatuatua ua tai pei lava o le tuua o le saogalemu o se malutaga malupuipua o afā ae ua oo mai se asiosio."<sup>2</sup>



***O le faatau-mamaoina o oe lava ia mai le malo o le Atua i taimi o se tofotofoga o le faatuatua ua tai pei lava o le tuua o le saogalemu o se malutaga malupuipua o afā ae ua oo mai se asiosio.***

Na aoaoina mai foi Elder Andersen o le "faatuatua . . . o se faaiuga."<sup>3</sup> O le a le faamalosiā e le Alii lou mafaufau po o lou ususitai. E tataua ona e filifilia le faatuatua ma le loto i ai. O lena filifilia e le satia ai lou atamai faamaoni; o le faamaoniga o le faaaloalo faavavau ma paia mo lou faitalia.

### **O Fesili e Faateleina ai le Malamalama**

Ua manatu sese nisi o le i ai o ni atugaluga faamaoni e uiga i le talafaasolopito po o aoaoga faavae o le Ekalesia o le faamaoniga lea e le o ola se tagata e tusa ai ma tulaga faatonuina o le Ekalesia. O le i ai o ni fesili e le faapea ai ua tausalaina oe i se agasala tele. O fesili o ni vaega o le olaga ma e alagata mo lo tatou alualu i luma ma le malamalama faateleina. O le popolega, e le o le pe a i ai ni a tatou fesili, ae pe o le a tatou tausia poloaiga a'o tatou galulue i le faagasologa o faaaliga lea e taitai atu ai i tali.

Ia nofouta e mafai e Satani ona faalautele o tatou masalosologa pe taitai atu foi i tatou ia tauamionuina a tatou agasala. O le a uunaia i tatou e le Agaga Paia i faalogona le lelei pe a tatou agasala, ma e mafai a le o le tatou salamo pe teena foi nei uunaiga. A o aliaie masalosologa, atonu e aoga ona fesili faamaoni ifo ia te oe lava, Pe o i ai se mea o loo o'u faia pe o o'u mana o ai o tetee ai i le talalelei? Afai o lau tali o le ioe, saili le fesoasoani mai lou epikopo. E mafai ona faia ai le eseese a toa! O le faatagaina o ou masalosologa e tauamionuina au agasala, e le o se suitulaga faamanuaina lea mo le salamo.

O nisi foi tagata ua lavelavea i luga o faamatalaga na faia e taitai o le Ekalesia ua faapea ona iu ane e le sa’o, e le faataata i aoaoga faavae ae o lo latou lava manatu faaalai patino. Mo se faataitaiga, na tusia e Peresitene Iosefa Filitia Samita (1876–1972) i le lomiga muamua o lana tusi *Tali i Fesili o le Talalelei*, “E le mautinoa pe o le a faatagaina le tagata e fai soo se meafaigaluega po o se vaa e malaga i le vateatea ma asiasi atu i le masina po o se isi lava paneta mamao.”<sup>4</sup>

Mulimuli ane, i le mavae ai o le tulaeleele o le Apolo i le masina ma le maliu o Peresitene Tavita O. MaKei, na avea ai Iosefa Filitia Samita ma Peresitene o le Ekalesia. I se faatalanoaga ma le au faasalalau, na fesili atu ai se tagata faasalalau ia te ia e uiga i lenei faamatalaga. Na tali Peresitene Samita, “Ia, na ou sese, a ea?”<sup>5</sup>

Na saunoa Elder Jeffrey R. Holland o le Korama a Apotetolo e Toasefululua: “Tatou te [mafai ona] faaogaina ia malosiaga taua faalelagona ma faaleagaga e manatua ai pea se . . . mea na tupu i le talafaasolopito o le Ekalesia lea ua faamaonia ai o le a faigata pea i tagata o le olaga nei ona faatutusa lo latou lelei i faamoemoega faalelagi ua folasia i o latou luma.”<sup>6</sup>

## Sailiga i se Auala Faagaetia

E anoanoai tusi ua tusiaina ma itula e le mafaitaulia ua faaluina i le suesueina o le tala o le Toefuataiga. O lenei mea e masani ona oo atu ai i se malamalamaaga faateleina, ae e mafai foi ona faaosofia ai fesili le logomalie, ae maise lava pe afai tatou te le malamalama i faamoemoega o tagata i lena taimi. E faigofie foi ona lofituina i le sailiga o mea moni ua tuanai ia e ono faauigaseseina pe tatou le maua i le taimi

nei, ae e mafai i taimi uma ona maua faamatalaga moni ma talafeagai mai le Tagata o loo malamalama i mea uma.

O lenei mea atonu o le vaega aupito taua lea o mea uma: *a tatou mausali i le tausiga o a tatou feagaiga ma ola faamaoni i le malamalama ua tatou maua, o le a faamanuia e le Alii o tatou olaga ma tuuina mai musumusuga ia i tatou*. Ua ou lagonaina nei alofa mutimutivale agamalu; o ni aafiaga e ese le patino ma tuusa’o i lo tatou va ma lo tatou Tama Faalelagi. O le malamalama ma le poto. E le mafai e le tele o le faitautusi po o le suesueina o aafiaga ua toatele ni tagata na talatalaina mai ona faatusalia le mana o aafiaga e tuusa’o mai ia i tatou e le agalelei ma le alofa o lo tatou Tama.

O le a faaauau pea ona tulai mai fesili a’o tatou tulituli-matagauina se faiga o le suesueina i aso taitasi o tusitusiga paia ma isi mataupu o le talalelei. A finagalo le Alii e aooina i tatou, e masani ona Ia faia e ala i le tuuina mai ia i tatou o se fesili e mafafau loloto i ai. E oo mai tali e ala i le faamaoni i a tatou feagaiga ma le auuina atu i isi a’o tatou suesue, aua o le ala lena i le mauaina o ni aafiaga patino lea, i le aluga o taimi, o le a tuuina mai ai tali i fesili uma. ■

*E alala le tusitala i Georgia, ISA.*

*O tali i le tele o fesili o le talalelei e mafai ona maua i le [lds.org/topics](https://www.lds.org/topics).*

### FAAMATALAGA

1. Tagai, mo se faataitaiga, Kenese 25:21–23; Esoto 3:11–22; Mosaea 26; Alema 40; 3 Nifae 27; Mataupu Faavae ma Feagaiga 76; 77; 138.
2. Neil L. Andersen, “Tofotofoina o lo Outou Faatuatua,” *Liahona*, Nov. 2012, 40.
3. Neil L. Andersen, “Ua Lava Mea ua e Iloa,” *Liahona*, Nov. 2008, 14.
4. Joseph Fielding Smith, *Answers to Gospel Questions* (1958), 5 vols., 2:191.
5. Manatuaina patino o David Farnsworth; o le faatalanoaga ma le au faasalalau na faia i le aso 23 o Ian. 1970, i le tuanai ai o le ono masina talu ona tulaeleele [le Apolo] i le masina.
6. Jeffrey R. Holland, “O Le Au Faigaluega i le Tovine,” *Liahona*, Me 2012, 32).



### AOAOGA FAVAE MAUTINOA

“E mafai ona ou ola ma ni le atoatoa faaletagata, e tusa lava pe i ai faatasi ma perofeta a le Atua—o le mea lena e tatau ona faamoemoena i tagata o le olaga nei. E mafai ona ou ola ma ni sailiiliga faasaientisi e le’i faamaonia e

feteenai ma le Tusi a Mamona; o le a oo mai lava le taimi e faasa’oina ai na mea. Ma e mafai ona ou ola ma ni talafaasolopito e foliga mai e eseese; o ni mea laiti na i le aotelega atoa o le mea moni. Ae e le mafai ona ou ola

e aunoa ma aoaoga faavae ma sauniga moni na toefuatai mai e Iosefa Samita, e le mafai ona ou ola e aunoa ma le perisitua a le Atua e faamanuia ai lo’u aiga, ma e le mafai ona ou ola e aunoa ma le iloaina ua faamauiina lo’u toalua ma la’u fanau ia te a’u mo le faavavau. O le filifiliga lena o loo tatou faafesagai—o ni nai tali e le’i taliina i luga o le lima e tasi ma le anoanoai o aoaoga faavae mautinoa ma le mana o le Atua i le isi [lima].”

Tad R. Callister, peresitene aoao o le Aoga Sa, “What Is the Blueprint of Christ’s Church?” (Faigalotu a le OAE, 12 Ian. 2014); [cesdevotionals.lds.org](https://cesdevotionals.lds.org).



## E TATAU ONA E TATALO

I le aso 12 o Ianuari, 2010, na faaali mai ai e le Tama Faalelagi ia te a'u Lona mana ina ua solofa ifo se fale sima fogafalefa faataamilo ma luga o a'u, ina ua mavae se mafuie leaga tele na olopalaina ai Haiti.

A'o ou tagi i lalo o le mamafa o mea na solo, na oo mai se leo toafilemu ia te a'u: "Jimmy, aisea e te le tatalo ai nai lo o lou ee?"

Ae peitai, sa le mafai ona taofi lo'u ee, ona sa ou fefe o le a ou oti i totonu o ni nai minute. Sa toe tautala mai foi ia te a'u le leo, lea sa pei o se uo lelei na uunaia au e ala i le nau-nautai tele e fesoasoani mai: "Jimmy, e tatau ona e tatalo."

Sa oo ina le mafai ona [ou] onosaia le tiga o o'u vae, ma sa oo foi ina uma

le okesene i le pogisa lea na siomia ai a'u. Sa toe oo tasi mai foi le leo: "Jimmy, e tatau ona e tatalo."

O le taimi lena na tuu ai loa lo'u tetee atu i ai. I se leo vaivai sa ou faapea atu ai: "Le Tama Faalelagi, ua E silafia lo'u malosi, ma ua E silafia le umi e mafai ona ou onosaia ai lenei tiga. Ou te ole atu i Lau Afio, faamole-mole aveese lenei tiga mai ia te a'u. I le suafa o Iesu Keriso, amene."

O le taimi lava na uma ai ona ou faia lenei tatalo faatauvaa, sa ou moe loa. Ou te le manatua le mea na tupu mulimuli ane ai, ae ina ua ou ala a'e mai se moe gapepe, ua aluese le tiga. O se taimi puupuu mulimuli ane, na maua ai a'u e le au laveai a'o latou sueina tagata na aafia i le faalavelave

i mea na faaleagaina o lo'u ofisa.

Mulimuli ane, sa ou iloa ai mai le afaigaluega e toalima o le fogafalelua o le fale o le Port-au-Prince lea sa ou faigaluega ai, sa na o a'u lava na aumai i fafo mai mea na faaleagaina na ola. Ona o o'u manuaga, sa aveese ai le tasi o o'u vae ma faaluina ai ni nai masina i le falema'i. Ae ou te iloa na uunai a'u e le Agaga Paia e tatalo, ma na tali mai le Tama Faalelagi i lena tatalo.

E mafai ona ou molimau atu e tali mai le Tama Faalelagi ia tatou tatalo i Lana lava ala ma e tusa ai ma Lona lava finagalo—po o fea lava tatou te i ai ma po o le a foi le taimi tatou te tatalo atu ai. ■

Jimmy Saint Louis, Haiti





# O MEA NA OU AOAONA NA SUIA AI LO'U LOTO

Na ua mavae le maliu o le ma atalii e 18 tausaga le matua o Jaxon, sa ou manatunatu loloto i le tulaga ma le faasinomaga o lo'u olaga. Ua i ai sa'u tama i le faavavau, ma na i ai so'u faanaunautaiga malosi ia ou ola i se auala ina ia i ai se aso matou te toe fialia ai i la matou sootaga faaleaiga. Sa ou manafoi ia ou malamalama lelei i tusitusiga paia ina ia mafai ona latou taialaina ai lo'u olaga.

Ou te le o mautinoa lelei po o anafea na amata le naunau i ai o lo'u loto, ae sa faaosoina e le faamoemoe o le toe vaaia o le ma atalii. A'o ou faitau i le Tusi a Mamona, sa amata ona ou matauina auala na faaoga faafaatusa ai le loto o le tulaga o le

olaga o se tagata po o se taitaiga po o se tulaga o se nuu.

O taimi uma lava e ta'ua ai le loto, pe maaa pe faamaluluina, ou te faia ai se fatu laitiiti lanumumu i tafatafa o le fuaiupu. Sa amata ona ou vaaia ni mamamu. Ina ua faamaluluina loto o tagata, sa latou maua le malosi e tau-lima ai faigata, na faateleina lo latou alolofa i isi, ma sa latou agalelei ma agamalu sili atu. Na ou aoaoina o le salamo o le mea lena e suia ai loto a'o tatou valaau atu i le Faaola ma Lana taulaga togiola.

Sa ou fialia i se faigamalaga mata-gofie i le Tusi a Mamona. O mea na ou aoaoina na suia ai lo'u loto, lea ua suia ai lo'u olaga. O mea na ou aoaoina ua fesoasoani foi ia te a'u i la'u

matata faalegaluega a'o o'u lagolago atu i ulugalii e ala i o latou luitau. Ua oo ina ou malamalama ai e mafai ona ou aoaoina ma faamanatu atu i ulugalii e uiga i mataupu faavae masani lea e aumaia ai le faamalieina faaleulugalii ma le felata'i moni. Ae seiloga la te aumaia se loto faamaluluina i la laua faaipoipoga, e laitiiti lava se avanoa mo le suiga e tupu ai pe tumau ai.

Talu mai le taimi na ou faia ai fatu i tafatafa o fuaiupu o la'u Tusi a Mamona, ua ou toe foi soo ai e toe faitau na fuaitau ma faaauau ai ona aoaoina mai na fuaiupu. Ua ou mauaina foi ni fuaitau fou e ta'ua ai le loto lea na ou misia i le faitauga muamua, lea e faamanatu mai ai o le a i ai i taimi uma se mea fou i tusitusiga paia e aoaoina, malamalama ma faaoga.

Ae o le mea e sili ona taua, ua faamanatu mai ai ia te a'u le alofa o lo'u Tama Faalelagi ma lo'u Faaola. Ona o lena alofa, o le a ou faatasi ai ma lo'u aiga e faavavau. Ua ou iloa lena mea ma lo'u loto atoa, lea ou te matuai faafetai ai lava. ■

Darcy Logan, Alaska, USA

Sa oo ina le mafai ona [ou] onosaia le tiga o o'u vae, ma sa oo foi ina uma le okesene i le pogisa lea na siomia ai a'u.





**A**uma ona faamama vave ma polesi seevae o la'u soa, ona ou toe tuua faalelei lea i le mea sa i ai.

## O SEEVAE SELESITILA A LA'U SOA

I tausaga ua mavae, ina ua ou tuua le Nofoga e Aoaoina ai Faifeautalai i Provo, sa ou taunuu atu i Florida ma le lagona saunia ma le fiafia e amata i totonu o le misiona. Ina ua ou feiloai i la'u soa fou, sa tele ni mea sa ma fiafia i ai na tutusa ma na foliga mai le ma soa na fetau lelei.

Ae peitai, ina ua mavae ni nai vaiaso, na faapea ona ou matauina ai ni eseeseega. Mo se faataitaiga, sa ou sauni i aso uma ma te o e talai tuitui [i fale o aiga], ae sa tau le fiafia tele la'u soa e tuitui i faitotoa. O le mea moni, e ui lava o ia sa soa sinia, ae sa filifili lava na te le faia ni mea se tele.

Sa ou matauina foi sa pei na tele lava ina talanoa la'u soa e uiga ia te ia lava. Sa tulaga lelei lona aiga i mea tautupe, ma e tele ni aafiaga na ia oo i ai, ia ou te le'i oo i ai ona o o'u tulaga mauualalo.

O nei mea na amata ona tutupu ai ni lagona faalelelei ia te a'u, lea na toetoe lava a oo i le tulaga o le inoino. O le i ai o le lagona inoino i la'u soa na aafia ai lo'u faaleagaga, ae maise lava a'o ou taumafai e aoao atu le talalelei. Na tatau ona ou faia se mea. O le taimi muamua sa ou mafaufau e talanoa atu i la'u soa ma ia faapa uma atu i ai o lo'u le fiafia. Ae sa ou filifilia se isi auala.

O taeao uma lava e auuai ai ona ma taele ma la'u soa ma sauni mo le aso. A o i ai o ia i le faletaele, sa tonu ia te a'u ou te tolotolo atu i vae o lona moega ma faaiila ona seevae e uumi luma. A uma ona faamama vave ma polesi, ona ou toe tuua faalelei lea o ona seevae i le mea sa i ai. Sa ou faia lenei mea i taeao uma i le pe a ma le lua vaiaso.

I le taimi lea, na ou matauina ai ua amata ona aluese atu lo'u inoino. A

o ou auuina atu i la'u soa, sa amata ona liua lo'u loto. Sa leai sa'u tala na fai atu ia te ia e uiga i la'u tama'i auuina. Ae peitai, i se tasi aso, na fai mai ai la'u soa, sa pei na faamanu-iaina o ia i ni "seevae selesitila" ona sa foliga mai sa le'i palapala lava.

Sa ou aoaoina ni lesona maoae se lua mai lenei aafiaga. Muamua, sa ou aoaoina o le faafitauli moni lava sa i totonu o a'u lava—e ui lava o le mafuaaga o o'u lagona na sau mai fafo. Na lelei lava la'u soa.

Lona lua, sa ou iloaina e masani lava ona tatou auuina atu ia i latou tatou te alolofa i ai. Ae ou te le'i iloaina o lea lava mataupu faavae e aoga foi i le isi itu: e oo ina tatou alolofa ia i latou tatou te auuina atu i ai. ■

Michael Reid, Arisona, ISA

# ILOAINA O LE SIUFOFOGA O LE PEROFETA

Se po o se tasi Aso Sa pe a ma le tolu masina talu ona ou siitia mai mai lo'u atunuu moni o Mekisiko i le Iunaite Setete ou te aoga ai, sa titi solo lava la'u leitio i nisi o alaleo faasalalau i le taumafaiga e su'e ni musika lelei o le Aso Sa. A o o'u faalogologo i nisi o alaleo i le lotoifale, sa ou faalogoina se leo masani ma tuu ai loa.

Sa ou masalosalo o le leo o le siufofoga o Peresitene Gordon B. Hinckley (1910–2008), o le sa Peresitene i le Ekalesia i lona vaiata. Sa ou iloaina sa le o se mea na masani ai lo'u mafai ona iloaina o lona siufofoga. Sa masani ona ou faalogologo i konafesi aoao, faeasaite a le Ofisa o Aoga a le Ekalesia, ma isi faasalalauga a le Ekalesia e ala i le leo o faamatalaupu Sipaniolo e tautatala i luga a'e o le leo o le failauga. Ae o lea na ou iloaina le siufofoga i luga o le leitio o Peresitene Hinckley.

Sa le'i lelei tele la'u Igilisi e malamalama ai i le mea na ia saunoa mai ai, ae sa ou faalogologo pea i le leitio. O lona siufofoga sa aumaia ai se lagona o le toafilemu. Ina ua uma

le lauga, sa fai mai le tagata faasalalau o le leitio, "Na faatoa o tatou faafofoga atu nei ia Peresitene Gordon B. Hinckely."

Sa ou iloa e fetalai mai le Alii e ala i Ana auauna ma e tusa pe oo mai le savali i Lona siufofoga po o siufofoga o Ana perofeta, ua tutusa lava (tagai i le MF&F 1:38).

Sa ou mafaufau i le leo masani ai ona ou iloaina le siufofoga o Peresitene Hinckley. O le faia o lea mea, na ou iloa ai sa ou manao i taimi uma ia mafai ona ou iloa le siufofoga e

faaoga e le Alii e fesootai ai ma Lana fanau—e tusa lava po o le a le auala.

Na fetalai le Faaola, "O a'u mamoe e faalogo mai i latou i lo'u leo, ua ou iloa foi i latou, ua latou mulimuli mai foi ia te au," (Ioane 10:27).

I se lalolagi ua tumu i le tele o leo—tele o "alaleo"—e titi solo ai, e faamoemoe e mafai i taimi uma ona ou faaogatasiina ia iloa ai le siufofoga o lo'u Leoleo Mamoe ma Ana auauna ma ia naunau e mulimuli i a latou fautuaga. ■

Miriam Ruiz, luta, ISA

A o o'u faalogologo i nisi o alaleo i le lotoifale, sa ou faalogoina se leo masani ma tuu ai loa.





# O Mea na Tatou **Aoaoina** mai i o Tatou **Matua**

**Ua faasoā mai e le au talavou matutua auala o loo latou faaaogaina ai lesona ua latou aoaoina mai o latou matua.**

## FILIGA E GALUE

I lo'u aiga sa ou aoao ai e galue malosi. Sa faaaoga e lo'u aiga se faiga na matou ta'ua o le "lisi filiga." I le amataga o le masina, matou te mauaina ai se lisi o feau eseese, e pei o le fufuluina o ipu, tausiga o solofanua, ma isi lava mea. Matou te maka faasa'oina ia feau pe a uma ona matou faia, ma a oo i le faaiuga o le masina, na tuuina mai ia i matou ni tupe mo a matou galuega filiga e faavae i le tele o maka faasa'o na i ai i luga o le siata. Mai leni mea, ua ou aoaoina ai ia galue ma le filiga ma ia faautauta i mea tautupe.

Peter Stegeby o Västerbotten, Suetena





## TULAGA FAAMATUA AMIOTONU

I le avea ai ma se matua e toatasi, sa tele lava ni galuega a lo'u tina e fai, ae sa ia faaavanoaina i taimi uma se taimi e fesoasoani mai ai ia te a'u, faamafanafana a'u, pe tau lava o le faalogo mai ia te a'u. O le iloaina sa i ai o ia iina i taimi uma sa matuai taua tele, ma ou te manao e tuu atu foi lena mea i sa'u lava fanau i le lumanai.

Ina ua toe faaipoipo lo'u tina, sa filifili lona toalua fou e avea ma tama ia i ma'ua ma lo'u tuagane matua. I se taimi e le'i mamao mulimuli ane, na auai mai ai se uso laitiiti i le matou aiga, ae ou te le'i lagonaina lava sina eseese i le alofa ma le agalelei sa ia tausia ai i matou uma e pei lava o lana lava fanau. E faafetai i ona uiga faaalua, na mafai ai e i ma'ua ma lo'u tuagane matua ona tutupu ae i se aiga malosi ma lotogatasi faapea ma le perisitua i totonu o le aiga. O le aso sa faamauina ai i matou o se aiga sa ese le faapitoa. O ana faaitaiga agalelei ua aoaoina ai a'u e faapea, o se tama e le na o se tulaga e i ai oe—o se tulaga e avea ai oe.  
Amanda Cornelius o Stockholm, Suetena



## PUIPUIGA FAALELAGI

A'o ou laitiiti, sa faigaluega lo'u tama i se mea mamao ma o taimi uma lava e oo mai ai i le fale ae ua matuai pogisa. Ou te ala lava seiiloga e sau o ia i le fale. Ae i se tasi aso, sa matuai tuai mai ai lava, ma sa le mafai ona ou maua o ia i le telefoni. Sa matuai o'u fefe lava. Sa ou manatuaina na aoaoina a'u e o'u matua e tatalo e le aunoa ma ia ole atu mo se fesoasoani i soo se taimi ou te fefe ai, o lea na ou tootuli ai ma tatalo ina ia mafai ona foi saogalemu mai lo'u tama i le fale. Sa ou te'i, ona a'o faaiuiu la'u tatalo, sa ou faalogo atu i le pasika a lo'u tama i fafo. Sa matuai o'u faafetai i lo'u Tama Faalelagi mo le puipuia o lo'u tama.

I le avea ai ma se talavou matua, soo se taimi lava ou te le mautonu ai pe fefe, o le tagata muamua lava e oo mai i lo'u mafaufau o le Tama Faalelagi. Ou te iloa e faatasi mai e le aunoa o la ia te a'u ma e faafofoga mai o la i a'u tatalo.  
Rohini Krishnan o Bangalore, Initia



## TATALO

I se tasi po na ou alu atu ai i le potu o o'u matua e fesili atu i lo'u tama e uiga i se mea, peitai, sa tootuli o ia i le tatalo, o lea na ou aluese ai ma toe foi mai i ni nai minute mulimuli ane ma maua atu o ia o loo i ai lava i lea tulaga e tasi. Sa ou filifili loa ou te sauni ou te moe, ma le manatu e mautinoa lava e oo ane i le taimi e uma ai ona tapena lo'u moega ua uma foi lana tatalo. Sa ou toe foi atu i le potu o o'u matua pe a ma le 10 minute mulimuli ane ma tau atu o loo tatalo pea o ia! O le vaaia o lena faataitaiga mai lo'u tama ua faamalosia ai la'u molimau. Sa sasaa moni atu lona loto i le tatalo i le Tama Faalelagi.

Jen Hansen o Idaho, ISA



## FAAIPOIPOGA I LE MALUMALU

Ou te faafetai ona sa faasoa mai e o'u matua le tala i le la mafutaga ia te a'u. Sa avea i la'ua ma se uo lelei i le 14 o o la'ua tausaga, ma sa la ola a'e ma aoga faatasi. I le aluga o taimi, na tuputupu a'e le la faauoga i le alofa moni, ma sa faaipoipoina i la'ua i le malumalu. Ua ou fuafua e mulimuli i faataitaiga a o'u matua o le faaipoipo i le malumalu ma e faamoemoe o le a ou maua foi le fiafia ma le alofa moni e pei ona la mauaina.

Pasăre Ana Maria o Prahova, Romania





## O SE AIGA E FAATOTONUGALEMU IA KERISO

O loo avea i taimi uma lesu Keriso ma oga-totonu o le mafutaga a o'u matua. La'ua te taulai atu i le fatuina o se aiga e mafuta ai le Agaga ma tuu le faamuamua mauuluga i le susesueina o tusitusiga paia, tatalo faaleaiga, ma afiafi faaleaiga.

Sa valaauina lo'u tina e faiaoga asiasi i se tina talavou o le sa feagai ma se tauiviga o se teteaga sa le'i mamao atu. Sa masani ona ou sau i le fale o vaai e lo'u tina le fanau tama laiti e toalua a lea tamaitai. O nisi taimi matou te afe ai i le fale o lenei tamaitai a'o matou o e faagasolo ni a matou fuafuaga, ma e tuu ai e lo'u tina se faamatalaga puu-puu i le faitotoa. Ou te matuai faafetai i le faataitaiga a lo'u tina o le alofa mama " e le sailia e ia ana lava" (Moronae 7:45).

E aoao i taimi uma o'u matua ma faa-aoga o la'ua tomai fou ma malamalama e atinae ai le malo o le Atua. Ona o a la'ua faataitaiga, ua ou faia ai foi aoaoga ma se mea e faamuamua i lo'u lava olaga. O le faataitaiga a o'u matua ua taitaiina ai a'u e faaipoipo atu i se alii o le foi o loo i ai lesu Keriso i le ogatotonu o lona olaga.

Rachel Nielsen o Iuta, ISA



## AMIO ATUA

A'o ou laitiiti na totoina e o'u matua i totonu ia te a'u le alofa mama mai lo'u Tama oi le Lagi. Na amata ona ou iloa o la a'o usuina mai e lo'u tina ia te a'u le "O Le Atua Lo'u Tama" (*Viiga*, nu. 184), ma i le aluga o taimi, o faataitaiga a o'u matua na avea ma o'u uunaiga sili na oo ina [ou] iloa ma alofa ai i lo'u Tama oi le Lagi e ala i auaunaga ma e ala i le auai faamaoni i sauniga ma gaoioiga a le Ekalesia.


Marlin Ortega Vásquez o Managua, Nicaragua

## FAALAGOLAGO ATU I LE TAMA FAALELAGI MA IESU KERISO

Toeitiiti o soo se mea lava e mafai ona lipea e lo'u tama. A'o ou talavou, sa ou fesili ai ia te ia pe na mafai faapefea ona ia toe faia lelei ni mea. Sa ia fai mai, "A'o le'i amata ona ou galuega, ou te faia se tatalo e talosagaina ai le Tama Faalelagi e fesoasoani mai ia te a'u. Ona faatoa ou galue loa lea. O lana faataitaiga ua aooina ai a'u ia lotomauualalo ma ia saili atu i musumusuga faalelagi.

Ina ua lagona e lo'u tina le lotovaivai, sa ia sailia le faamalologa ma le toafilemu i aao o le Faaoala. Ina ua ou oo foi i ni taimi faapena, sa ia uunaia a'u ia ou mafaufau loloto i le mana o le Togiola. I le avea ai ma se talavou matua, e faaauau pea ona ou sailia le filemu ma le alofa mautinoa o le Faaoala e ala i le mulimuli i ana faataitaiga amiotonu.

Isak Malm o Jönköping, Suetena





# O Se Taunuuga Fou

## Saunia e Amancay Kotecka-Miño

**O**nisi taimi e pei ai lo'u olaga o se malaga faifai pea e tasi a le vaalele. O lo'u tina o le Ekuatoa ae o lo'u tama o le Polani. Sa ou fanau i Ekuatoa, ae ina ua 10 o'u tausaga sa matou siitia atu i Sepania. Sa na o le lua tausaga sa matou nonofo ai iina. Ina ua 12 o'u tausaga sa toe aluese foi lena vaalele, o le taimi lenei mo Polani. Sa ou momoo ia faamautu, uo ma ni aiga e latalata mai, ma ia lava loa ia faatofa.

## Feiloaiga Muamua ma Alii Faifeautalai

Sa tuitui mai le matou faitotoa. Sa ou tatalaina ma iloa ai ni alii talavou se toalua na tutu ai. O lo'u faavalevalea, sa ou tapunia ai le faitotoa a o le'i faia mai se la tala.

"Toe tatala le faitotoa ma faamalie i ai ua e sese," o le faatonu mai lea o le leo o lo'u tama mai le pito i tua o le fale. "Ma te le'i aoaoina oe e fai faape nei tagata!"

O le lagonaina o si faavalevalea laitiiti, sa ou tatalaina ai le faitotoa. "Ou te faamalie atu," o la'u mumu-mumu lea.

Ou te fia iloa e uiga ia te outou, e uiga i a outou talitonuga. Faamole-mole susu mai i totonu," na valaaulia ai e lo'u tama. Sa faailoa mai e alii

talavou i laua lava o ni faifeautalai mai Le Ekalesia a Iesu Keriso o le Au Paia o Aso e Gata Ai. Sa ou faalogologo ma le musua i la laua savali—i le 13 o o'u tausaga, sa leai sa'u filifiliga ae ia auai.

E fa masina na asiasi mai ai na faifeautalai i lo'u aiga, aoao mai aoaoga faavae o le Ekalesia toefuataiina a Iesu Keriso. "Matou te faaaloalo ma faa-memelo i lo oulua lototele, ae e le mafai ona suia la matou tapuaiga," o le tala lea na iu ina fai atu ai lo'u tama ia i laua, ma matou te le'i toe vaai lava na alii faifeautalai.

## O Se Naunau e Maua le Upumoni

E lua tausaga na tuanei, ma o le suiga o tulaga faaleaiga na faamalosi ai a'u i se faanoanoaga o'oo'o. Sa tuua e lo'u tama ia Polani i le suega o se galuega o lea na taapeape ai lo matou aiga. Sa matuai o'u manao lava e saili le Atua. Sa faasolo ina atili faamaoni a'u tatalo, i le augani atu i le Tama Faalelagi e fesoasoani mai ia te a'u ia ou maua Lana mafutaga.

O se tasi aso na ta'u mai ai e lo'u tina, "Sa fesili mai se tagata e igoa ia Garling ia te oe. Sa ou fai i ai e toe valaau mai i le vaiaso lea." Sa ia iloina o se faifeautalai ma sa le'i fia faalogo o ia i le savali, o lea sa le'i manatu ai e manaomia ona vave tali atu i ai.

**O lo'u olaga atoa na pei o se tietiega vaalele e le uma. Sa ou momoo mo se filemu ma le mautu ae sa le'i mauaina lava seia oo ina ou liliu moni atu i le Alii.**

O le afiafi o le Aso Faraile lena na ou toe faalogoina ai le tu'itu'i i le faitotoa. O le taimi lenei sa ou tuuina atu ai i avefeau se faafeiloai faamaoni ma se ataata. "E talia lava oulua i totonu o lo'u fale, ae e tatau ona oulua silafia e le avefa lava a'u ma se Mamona," sa ou ta'u atu ai ia i la'ua.

Ae sa aoao lava a'u e alii faifeautalai—i aoauli o Aso Faraile uma mo le ono masina. O le tele o kuki a lo'u tina ma le afe o fesili mulimuli ane, na amata taliina ai a'u fesili loloto uma. Na foliga mai o soo se taimi lava na asiasi mai ai faifeautalai, na faapipiina ai foi ma se isi fasi paso o le olaga. O le fiailoa lava, na iu ai ina ou faia le mea na talosaga mai ai faifeautalai ou te faia: tatalo ma fesili atu i le Tama Faalelagi pe moni a la'ua upu ma le Tusi a Mamona. Sa la faamautinoa mai ia te a'u e tali le Atua i tatalo.

## Faamautinoaga ma le Faalotolotolua

A o o'u tatalo ma suesue loloto atili i tusitusiga paia, sa oo ina avea nei aoaoga faavae ma mea suamalie i lo'u loto. Mo ni masina sa ou musu lava, ma le manatu na ou manaomia se faamaoniga mausali, na tatau ona

lo'u papatisoga, sa aluese lo'u talitonuina o la'u tali. Sa ou toe oo i mea o le lalolagi ma sa ou popole ina ne'i le taliaina e e pele ia te a'u la'u filifiliga ina ia papatisoina.

Na faasolosolo malie lava, o a'u mea sese ma faaiuga na ou tutuli ai i musumusuga a le Agaga. Sa iu ane a'u

lo'u ita. Mulimuli ane, sa ou toe tootuli ai i le tatalo, sa faia ma le loto atoa a'u upu: Lo'u Tama Faalelagi, ia faia Lou finagalo, ae le o lo'u loto."

O lena tatalo na faailoga ai le amataga o lo'u toe foi mai i le Ekalesia, lea na ou iloaina o le a manaomia ai le salamo. O le Aso Sa lena, mo le taimi muamua i le toetiiti atoa o le tausaga, na ou auai ai i le sauniga faamantuga. O le aso na sosoo ai, sa ou toe filifili ai loa e papatiso.

Sa fesoasoani mai le Alii ia te a'u i la'u faagasologa faigata o le toe foi i le mea sa ou iloaina ua moni. Ua ou faauigaina nei na tulaga faigata o nisi o faamanuiaga aupito sili ona matagofie mai le Atua. Na te lei faagaloina a'u. Sa faafofoga mai o ia i a'u talosaga ma faatalitali mai mo a'u ia ou iloa Lana tali. Sa Ia fesoasoani mai ia te a'u i mafatiaga uma sa ou onosaia, faamaalosia ma puipuia a'u. I le faagasologa sa ou maua ai le manino faateleina i le uiga o le misiona paia a Keriso ma Lana Togiola.

Sa ou papatiso ia Aperila 2011. Na aluese mai la'u vaalele talu mai lena taimi—o lenei ua ou nofo nei i Farani, o lona uiga o isi foi suiga e tele. Ae peitai, ua ou faafetai nei ia te Ia mo lo'u olaga ma mo tulaga na Ia faatagaina a'u ou te ola ai. Ona o la'u molimau i le Togiola a Iesu Keriso, ua ou malamalama ai nei e le o tuua na o a'u, e tusa lava po o a taunuuga o le a sosoo mai o le olaga. Ou te le iloa pe o le a toe malaga ese la'u vaalele. Ae pau le mea ou te iloa, o la'u taunuuga fou o le auala sa'o lena e tau atu i le ola e faavavau faatasi ma le Tama Faalelagi ma Lona Alo, o Iesu Keriso. ■

*E alala le tusitala i Farani.*



[ou] iloa mea uma e uiga i le talalelei ona faatoa auai ai lea i lenei Ekalesia. Mulimuli ane, ona tautala mai lea o afiga a le Faola i le Ioane 20:29 i lo'u loto: "Amuia o e le vaai mai, a e talitonu mai pea." Sa tonu ia te a'u ou te papatiso.

Sa manaomia e o'u matua ou te faatali seia ou matua ona papatiso ai lea, ae o le taimi na faatalitali ai sa fesoasoani i lo'u alualu i luma ma le malamalama i le talalelei. O le mea na faanoanoa ai, a o latalata i le aso o

tusitusiga paia i le vaega pito maualalo lava o la'u pusa ma sa iu foi ina ou le toe tatalo.

## O le Faamanuiaga o le Salamo

Sa le'i tulaga lelei lo'u olaga--na tele naua loimata ma le le fiafia. Sa faigata ona malamalama pe aisea na oo ai lo'u aiga i le tele o le mau tofofoga. E oo tonu lava i lo'u tausaga mulimuli i le aoga maualuga, ae tatau loa ona tuua e o'u matua ia Polani. O le manatu o le toe me'i foi na mafua ai

# MALOSI E SILI ATU NAI LO LO TATOU LAVA MALOSI

*O le mana gafatia o le Togiola e faamalosi ai i tatou  
e fai ma ia amio lelei ma ia galulue ia sili atu i o tatou  
lava manao taitoatasi ma gafatia masani.*



**Saunia e Elder  
David A. Bednar**

O Le Korama  
a Aposetolo e  
Toasefululua

Ou te masalo ua sili atu le masani o le toatele o tagata o le Ekalesia i le natura o le mana faaola ma faamama o le Togiola, nai lo le mana faamalosi ma gafatia. E ese le iloa o Iesu Keriso na afio mai i le lalolagi e maliu mo i tatou—o se itu taua faalefaavae i le aoaoga faavae a Keriso. Peitai, e tatau foi ona tatou iloa talisapaia le finagalo o le Alii, e ala i Lana Togiola ma le mana o le Agaga Paia, ia *ola* i totonu ia i tatou—e le gata ia taitaiina ai i tatou ae ia faamamanaina ai foi i tatou.

Ua silafia e le toatele o i tatou afai tatou te faia ni mea sese, tatou te manaomia le fesoasoani e faatoilalo ai aafiaga o le agasala i o tatou olaga. Ua totogi e le Faaola le tau ma ua mafai ai ona tatou toe mama e ala i Lona mana togiola. O le toatele o i tatou ua malamalama lelei o le Togiola e mo e agasala. Ae, ou te le mautinoa, pe ua tatou iloa ma malamalama o le Togiola e mo le au paia foi—mo alii ma tamaitai lelei o e e usiusitai, agavaa, ma filiga ma ē o loo taumafai ina ia lelei atu ma auuuna atu ma le faamaoni sili atu? Atonu tatou te talitonu sese e ao ona faia le malaga mai le lelei i le lelei sili atu, ma avea ai i tatou lava o ni au paia, e ala i lo tatou lava naunautai, finafinau, ma le lotopulea, faapea ai ma o tatou gafatia e mautinoa lava le faatapulaaina.

O le talalelei a le Faaola e le faatatau i le na o le aloese mai le leaga i o tatou olaga; ae e faatatau foi i le faia ma le avea ma ni tagata lelei. Ma o le Togiola ua tuuina mai ai le fesoasoani mo i tatou e faatoilalo ma aloese ai i mea leaga ae ia faia ma avea ma tagata lelei. E maua le fesoasoani mai le Faaola mo le malaga atoa o le olaga nei—mai le leaga i le lelei i le lelei sili atu ma ia suia ai o tatou natura moni.

Ou te le o fautuaina atu e faapea o mana togiola ma gafatia o le Togiola e ese ma motu ese mai. Nai lo o le na, o nei itu e lua o le Togiola e fesootai ma tutusa; la te manaomia ona faagaoioia i le taimi o vaega uma o le faigamalaga o le olaga. Ma e faavavau le taua mo i tatou uma ona iloa o nei elemene taua e *lua* o le faigamalaga i le olaga nei—o le tuu ese o le tagata o le lalolagi ae avea ma se au paia, o le faatoilaloina o le leaga ae avea ma se tagata lelei—e ausia e ala i le mana o le Togiola. O le naunautai ma le lotopulea o le tagata lava ia, lotomau ma le unaiga, fuafua lelei ma le faatutuina o sini e manaomia, ae e matuai le lava lea mo i tatou e faamaeaina ai ma le manumalo ia lenei malaga i le olaga faitino. E moni lava, e ao ona tatou faalagolago “i



galuega, ma le alofa mutimutivale, ma le alofa tunoa o le Mesia Paia” (2 Nifae 2:8).

### Alofa Tunoa ma le Mana Gafatia o le Togiola

I le lomifefiloi o le Tusi Paia, ua tatou iloa ai o le upu *alofa tunoa* e masani ona faaaoga i tusitusiga paia e faauigaina o le mana gafatia:

O le [alofa tunoa o] se upu e ta’ua soo i le Feagaiga Tuai, ae maise lava i tusitusiga a Paulo. O le manatu autu lava o le upu o le, *auala faalelagi e maua ai le fesoasoani po o le malosi*, lea e ala mai i le alofa mutimutivale matamau ma le alofa o Iesu Keriso.

“E ala mai i le alofa tunoa o le Alii o Iesu, ma mafai e ala i Lana taulaga

togiola, o le a siitia ai tagata i le tino ola pea, e maua e tagata uma lona tino mai le tuugamau i se tulaga o le ola e faavavau. *E faapena foi e ala i le alofa tunoa o le Alii, ona maua e tagata taitoatasi*, e ala i le faatuatua i le Togiola o Iesu Keriso ma le salamo i a latou agasala, *maua le malosi ma le fesoasoani e fai ai galuega lelei, ia semanu e le mafai ona latou tausisia pe ana tuu e fai i a latou lava ala. O lenei alofa tunoa, o se mana gafatia lea e mafai ai e alii ma tamaitai ona maua le ola e faavavau ma le faaeaga pe a uma ona latou faia le mea sili latou te mafaia*” (Bible Dictionary, “Grace”; ua faapoopo le faamamafa).

O le alofa tunoa o le lagolago faalelagi po o le fesoasoani faalelagi lea e

matuai manaomia lava e i tatou taitoatasi e agavaa ai mo le malo selesitila. O lea la, o le mana gafatia o le Togiola e faamalosi ai i tatou e fai ma ia lelei ma ia galulue ia sili atu i o tatou lava manao taitoatasi ma gafatia masani.

I a’u suesuega patino o tusitusiga paia, e masani ona ou tuuina i ai le faaupuga “mana gafatia” i soo se taimi ou te tau ai i le upu *alofa tunoa*. Mo se faaitaiga, mafaufau i le fuaiupu lenei lea ua tatou masani uma ai: “Ua matou iloa e faaolaina i tatou i le alofa tunoa, pe a uma mea uma e mafai ona tatou faia” (2 Nifae 25:23). Ou te talitonu e mafai ona tatou aoaoina ni mea se tele e uiga i lenei tulaga taua o le Togiola pe afai o le a tatou tuuina i ai le “mana gafatia ma le malosi” i





taimi uma tatou te tau ai i le upu *alofa tunoa* i tusitusiga paia.

### Faataitaiga a Nifae

O le faigamalaga o le olaga nei o le sau mai i le leaga i le lelei i le lelei sili atu ma ia suia ai o tatou natura moni. Ua tumu le Tusi a Mamona i faataitaiga o soo ma perofeta o e na silafia, malamalama, ma sa suia e le mana gafatia o le Togiola i le faia o lena faigamalaga. A'o tatou malamalama lelei i lena mana paia, o le a faapea ona matuai faateleina ma faatamaoaigna o tatou manatu faale-talalelei. O manatu faapena o le a suia ai i tatou i ni auala tulaga ese.

O Nifae o se faataitaiga o se tagata na silafiaina, malamalama, ma faalagolago i luga o le mana gafatia o le Faaola. Manatua foi na toe foi atalii o Liae i Ierusalem e aumai Isamaeli ma lona aiga i la latou faigamalaga. Sa fulitua Lamana ma isi o le vaega sa malaga faatasi ma Nifae mai Ierusalem e foi atu i le vao, ma sa apoapoai atu Nifae i ona uso ia faatuatua i le Alii. O

le vaega lena o le latou faigamalaga na saisai ai e uso o Nifae o ia i maea ma fuafuaina lona fasiotiga. Faamolemole e maitau le tatalo a Nifae: “Le Alii e, e tusa ma lo’u faatuatua ia te oe, sei e laveaia a’u mai lima o o’u uso; ioe, *foai mai ia te a’u le malosi ia mafai ai ona ou motusia o nei maea* ua noatia ai a’u” (1 Nifae 7:17; ua faaopopo le faamamafa).

Tou te silafia le mea e masalo ou te tatalo ai pe ana faapea na saisai a’u e o’u uso? “Faamolemole aveese atu a’u mai lena mea leaga I LE TAIMI NEI!” E faapitoa ona manaia ia te a’u ona sa le’i tatalo Nifae ina ia suia ona tulaga. Ae, sa tatalo o ia mo le malosi e sui ai ona tulaga. Ma ou te talitonu o le ituaiga tonu lena o tatalo sa ia tatalo ai ona sa ia iloina, malamalama, ma na aafia i le mana gafatia o le Togiola.

Ou te manatu o filifili sa noatia ai Nifae, sa le’i faamaneta ona toulu ese mai ona lima ma tapulima. Ae, ou te manatu sa faamanuiaina o ia i le finafinau ma le malosi patino na sili

atu i lona gafatia e masani ai, ma “i le malosi o le Alii” (Mosaea 9:17) sa ia galue i ai ma milo ma toso ia noataga, ma iu ina mafai moni ona ia motusia ia maea.

O le aafia o lena mea na tupu mo i tatou taitoatasi e tuusao lava. A o tatou malamalama ma faaoga le mana gafatia o le Togiola i o tatou olaga patino, o le a tatou tatalo ma saili mo le malosi e sui ai o tatou tulaga nai lo le tatalo mo o tatou tulaga e sui. O le a avea i tatou ma sui e galulue nai lo o ni mea faitino e taugalueaina (tagai i le 2 Nifae 2:14).

### E Silafia ma Malamalama le Faaola

Ua tatou aoaoina i le Alema fuai-upu e 7 le auala ma le mafuaaga ua mafai ai e le Faaola ona tuuina mai le mana gafatia:

“Ma o le a afio atu o ia, ma mafatia i *tiga* ma *puapuaga* ma *faaososoga* o ituaiga eseese uma; ma o le a oo ia te ia nei mea, ina ia mafai ona faataunuuna o le upu ua fai mai, o le a ia ave i ona luga *tiga* ma *ma’i* o ona tagata.

“Ma o le a ia ave i ona luga le oti, ina ia mafai ona ia tatalaina fusi o le oti ia ua noatia ai ona tagata; ma o le a ia ave i ona luga o latou *vaiwaiga*, ina ia mafai ona faatumuina ona loto i le alofa mutimutivale, e tusa ai ma la le tino, ina ia mafai ona ia silafia e tusa ai ma la le tino, le ala e fesoasoani ai i ona tagata, e tusa ma o latou *vaiwaiga*” (Alema 7:11-12; faaopopo le faamamafa). Na puapuagatia le Faaola e le gata mo a tatou amioletonu ae mo le le tutusa, le le sa’o, le tiga, le mafatia,



ma lagona atuatuva e luitauina ai i tatou i le tele o taimi.

E leai se tiga faaletino, leai se ita o le loto, leai se puapuaga o le agaga, leai se ma'i po o le vaivai e te oo i ai pe ou te oo i ai i la tatou malaga i le olaga faitino e le'i oo muamua

i ai le Faaola. I se taimi o le vaivai tatou te ono tagi atu ai, E leai se tasi na te iloina pe faape'i. E leai se tasi e malamalama i ai. E leai se tasi e iloa." Atonu e leai se tagata soifua na te iloa. Ae ua silafia ma malamalama atoa i ai le Alo o le Atua, aua sa Ia

lagonaina ma tauave a tatou avega a'o le'i tatou tauaveina. Ma ona ua Ia totogiina le tau faaii ma tauaveina lena avega, ua ia te Ia le tiga-alofa atoatoa ma e mafai ona ia faaloaloa mai Lona aao o le alofa mutimutivale ia i tatou i le tele o vaega o lo tatou olaga. E mafai ona Ia aapa mai, pa'i mai, fesoasoani,—e tamoe moni mai ia i tatou—ma faamalosi i tatou ina ia sili atu nai lo le mea e mafai ona tatou faia ma fesoasoani ai ia i tatou e faia le mea e le mafai ona tatou faia i le na o lo tatou faalagolago atu i lo tatou lava malosi.

“O mai ia te au, o outou uma o e tigaina ma mafatia i avega, o au foi e malolo ai outou.

“Ia outou amoina la'u amo, ma ia outou faaa'oa'o ia te au, aua o au le agamalu, ma le loto maulalo, ona maua lea e outou o le malologa mo outou agaga.

“Aua e avegofie la'u amo, o la'u avega foi e mama ia” (Mataio 11:28–30).

Ou te molimau atu e uiga i le, ma le agaga faafetai mo le taulaga e le iu ma faavavau a le Alii o Iesu Keriso. Ou te iloa o loo soifua le Faaola. Ua ou iloa Lona mana faaola ma Lona mana gafatia, ma ou te molimau atu o nei mana e moni ma avanoa mo i tatou uma taitoatasi. Ioe, “O le malosi o le Alii” e mafai ai ona tatou faia ma onosaia ma faatoi-lalo mea uma a'o tatou fetaomi atu i luma i la tatou faigamalaga o le olaga nei. ■

*Mai le “O Le Togiola ma le Malaga i le Olaga Faitino,” Liahona, Aperila 2012, 12–19.*







**Saunia e Randall L. Ridd**  
Fesoasoani Lua i le Au Peresitene Aoao o Alii Talavou

# Aua le Faamasino I LE UA SAUNIA

*E te le iloa po o ai ua saunia e maua le talalelei.*

O le a ou manatuaina pea le 'aiga i le afiafi a le mafutaga lona 40 a la'u aoga maualuga. Sa ou naunau lava e vaai i uo tuai ou te le'i toe vaai i ai i le tele o tausaga ma iloa ai po o a ni mea na tutupu i o latou olaga talu mai le aoga maualuga.

A o matou talanoa i se laulau ma le toa 8 pe toa 10 o isi tagata o le vasega i le taimi o le taumafataga, na fai mai se tasi o a'u uo ua leva o Greg Link, ua uma ona papatiso o ia i le Ekalesia i le pe a o le 20 ma ona tupu o ona tausaga.

Ona ia fesili mai lea i se fesili matuitui: "Aisea na leai ai se tasi o outou na ofoina mai ia te au se Tusi a Mamona i le aoga maualuga? Tou te le'i manatu o a'u o se tagata na ono tatau mo le Ekalesia?"

Na fai mai se tasi uo ua leva—o le sa le o se tagata

o le Ekalesia, "Na semanu e avatu ma oe se tasi o a'u [Tusi a Mamona]; na pe a ma le 50 na tuuina mai ia te a'u!"

Sa ou le magagana. I aso la i le aoga maualuga, ana e fai mai ia te a'u e faapea o le a papatisoina Greg ma avea ma se failauga faamalosiua faamanuiaina, semanu ou te le talitonu i ai. Sa ou fiafia tele ia Greg. O ia o se ituaiga uo faamaoni e mafai ona e tapa i ai pe a e manaomia o ia. Ae sa ou iloaina sa fiafia e pati, ma sa talenia foi i le faasala soo. Sa leai ma so'u manatu o le a i ai sona manao e faalogo e uiga i le Ekalesia. O le mea malie la, sa ou talitonu lava o le isi uo, lea sa ou faasoaina i ai le talalelei ma tuuina atu i ai se kopi o le Tusi a Mamona, o le a i ai se aso e auai ai. Ae o le mea moni, e te le iloa po o ai ua saunia e talia le talalelei ae o ai e le'i saunia.

Sa ou lagonaina si matamuli laitiiti ina ua uma lena talanoaga ma Greg aua o a'u, e pei o le toatele o isi, ou te le'i faasoaina atu le talalelei ia te ia. Sa ou fesili atu ia te ia pe na faapefea ona auai i le Ekalesia. O lana tala lenei:





*Sa me'i atu lo'u aiga i le Aai o Sate Leki, Iuta, ina ua tusa ma le 11 o'u tausaga, ae ou te le'i auai i le Ekalesia seia oo i le 24 o o'u tausaga. O le toe tepa i tua, sa mafai ona ou iloa ai le pogai na leai ai se tasi na faasoaina mai le talalelei ia te a'u. Sa le o a'u o se faaumea auro i le itu i fafo. O le mea moni, o a'u o se tamaitiiti sa fai si malovale. Sa ou aafia i fusuaga ma sa masani ona faasala soo a'u i le aoga.*

*Sa i ai ni a'u uo o le AAG, ae sa na o le toatasi lava na talanoa e uiga i le Ekalesia. Ia ona sa ou taufaalili ia te ia e uiga i le faitauina o le Tusi a Mamona pe a tausitama.*

*Ae sa ou fiailoaina ia mea. Sa ave a'u e lo'u tina i se lotu Kerisiano i le lotoifale. Ae sa i ai se taimi na ou fesili ai ia i latou pe aisea na le afio mai ai Iesu i le Atu Amerika. Sa pei na talie mai ia te a'u mo le fai atu o se fesili faapena, o lea sa ou le toe fesili lava i ai i se mea.*

*O ni tausaga mulimuli ane, sa tonu ia te a'u o le a ou asiasi atu*

*i le nofoaga autu o tagata asiasi i le Lotoa o le Malumalu i le Aai o Sate Leki. Sa i ai iina se faataitaiga o se vaaiga o Keriso i Amerika. Na faafuasei ona ou manatuaina a'u fesili e uiga i lena autu mai tausaga o lo'u talavou. O le taimi lena na taia ai a'u i le Agaga, ma na ou iloa ai ua ou saunia e faalogo.*

*Sa tumau lava ia te a'u faataitaiga a a'u uo mai le aoga maua-luga. O le mea moni, o tagata sa sili ona ou faaaloalo i ai o AAG. O Randy Ridd ma lona faletua sa aoga uma i la'u aoga. O i la'ua o ni faataitaiga maoae, o ni tagata lelei tele. Sa i ai se aafiaga tele o lena mea ia te a'u i se taimi mulimuli ane. Sa ou mafaufau faapea, "Afai na talitonu Randy e moni lenei mea, atonu la e taua."*

*Ou te le iloa po o le a se mea na ono tupu pe ana faapea sa laua faasoa mai ni mea se tele atu e uiga i le talalelei i lena vaitaimi. Atonu na semanu ou te le'i sauni. Ae o le toe tepa i tua, maimau pe ana laua [faasoa mai nisi mea se tele]. Ou te iloa e ono i ai se aafiaga ia te a'u.*



## **E SAUNIA E LE ALII ANA FANAU**

"E alofa le Alii i Ana fanau uma. E finagalo o la ia maua e i latou uma le atoatoaga o Lana upumoni ma le anoanoai o Ana faamanuiaga. Ua la silafia le taimi latou te saunia ai, ma e finagalo o la ia tatou faalogo ma usitai i Lana taitaiga i le faasoaina atu o Lana talalelei. A tatou faia faapea, o le a tali mai i latou ua saunia i le savali a Le na fetalai mai, 'O A'u mamoe e faalogo mai i latou i lo'u leo . . . ua latou mulimuli mai foi ia te a'u' (Ioane 10:27)."

Elder Dallin H. Oaks o le Korama a Aposetolo e Toasefululu, "Fetufai Atu le Talalelei," *Liahona*, Ian. 2002, 9.

Ou te lagona le faafetai tele ona sa i ai se aafiaga lelei o a'u faataitaiga ia Greg. Ae semanu e sili atu le lelei o o'u lagona, pe ana ou faia i ai se mea i lena vaitaimi. Ana ou faasoaina atu le talalelei po o le Tusi a Mamona pe tau lava foi o le valaaulia o Greg i se gaoioiga, semanu na sua ai lona olaga. Atonu e ono auai vave ai i le Ekalesia. Atonu foi na ono ave sana misiona.

Ua ou aoaoina o le avea ma se faataitaiga lelei e taua moni lava, ae faapena i le

tiutetauave o le faasoa atu o le talalelei. Ua poloai mai le Alii ia i tatou ina ia faia faapea, "O atu ia outou i le lalolagi uma, ina talai atu ai le talalelei i tagata uma lava" (Mareko 16:15).

Ia aua laia le fefe e faasoa atu. Ae o le mea sili, aua ne'i vavevave ona faamasino po o ai ua saunia ae o ai e le'i saunia. Atonu e faateia oe i le tagata ua faamaluluina lona loto, e tusa lava pe o lena fiafua o loo natia loloto i le mea e le mafai ona e iloa atu ai. ■

# IA MAUA LE LOTOTELE E FAASOA ATU AI LE TALALELEI



**E** manaomia le lototele e faasoa atu ai le talalelei i se tagata ese. Tau lava o le fesili i se faifeautalai faamisi-ona fou. O nisi taimi e sili atu le lototoa e manaomia e fai atu ai i au uo pe latou te fia iloa e uiga i le Ekalesia, le Tusi a Mamona, po o tatou talitonuga.

E te mafaufau faapea: Ae faapefea pe a latou le mananao ai? Ae faapefea pe a latou le fiafia ai? Ae faapefea pe a latou ula mai ai ia te a'u? Ae faapefea pe a latou fai mai, ua feita ia te a'u ma e le toe fia vaai lava ia te a'u?

Aua le popole. E le o le mea moni lena o le a tupu. Atonu o le a na ona faapea mai o au uo, “Leai, faafetai.” Ae aua le te'i pe a tali mai nisi, “Ua lelei, faamatala mai

nisi mea ia te a'u”—ae maise lava pe afai o loo e ola i le talalelei.

Na saunoa mai Elder M. Russell Ballard o le Korama a Aposetolo e Toasefululua: “O i tatou o tagata o le Ekalesia toefuataiina a Iesu Keriso, ua faamamanaina ma auina atu e le Alii lava Ia e saili, fafaga, ma aumai ma le saogalemu i totonu o Lana Ekalesia i latou o e o loo saili e fia iloa le upumoni.”

Mai lena vaaiga, o le faasoaina atu o le talalelei e “faigo-fie ma manino.” Ae na ioeina e Elder Ballard, “o le galuega faafaifeautalai e mafai ona luitauina ma o nisi taimi e tau-faafefe ai.”

**MUAMUA**, *tatalo na o oe lava ma faatasi ma lou aiga* ina ia fesoasoani mai le Alii ia te oe e saili ni auala e faasoa atu ai le talalelei. (Tagai i le faalava o loo i le autafa e iloa ai le mea na faia e se tamaitai talavou i Pasila.) Ma le isi, ole atu i le Alii e taitai atu oe ia i latou o e ua sauni.



**LONA LUA**, *avea ma se faataitaiga*. I se lalolagi ua olopalaina ona tulaga faatonuina, o le a faapea ona matauina e au uo ia lou susulu. O lou lava tulaga agavaa o le a tuuina atu ai ia te oe le lototele ma le malosiaga faaleagaga.



**LONA TOLU**, *faaoga le faatuatua ma faalagolago i le Alii* ma ia faaali atu e le aunoa le alofa i isi.





E mafai faapefea ona tatou faatoilaloina lenei fefe? E tolu auala ua ta'ua i lalo na fautuaina mai e Elder Ballard:

“Fai mai nisi o le au paia, ou te fefe e faasoa atu le talalelei ina ne'i o'u faatiga ai i se tasi,” o le saunoaga lea a Elder Ballard. “O mea ua tutupu ua faaalua ai, e le feita tagata pe afai o le faasoa na faaosofia e le agaga o le alofa ma le popole alofa. E faapefea ona ita se tasi pe a tatou fai atu se faaupuga faapenei: ‘Ou te fiafia lava i le auala ua fesoasoani ai la'u ekalesia ia te a'u' ona faapoopo atu lea ma soo se mea e faatonu ai e le Agaga?”<sup>1</sup>

O le tiute e faasoa atu le talalelei e a tagata uma o le Ekalesia--e aofia ai ma oe. O lea ia lototele ma tuu atu i le Alii e faamanuia i au taumafaiga. ■

#### FAAMATALAGA

1. M. Russell Ballard, “O Le Matafaioi Taua a Tagata o le Ekalesia i le Galuega Faafaifeautalai,” *Liahona*, Me 2003, 38, 39–40.



#### O LE LOTOTELE O E TALITONU

“Faatasi ai ma le lototele o o tatou talitonuga, e tatau ona tatou tautino atu, faatasi ma le Aposetolo o Paulo, ‘Aua ou te le ma i le tala lelei ia Keriso’ (Roma 1:16). Ma, i lena lava lototele e tasi, ia tatou mulimuli ai i le fautuaga a Paulo: “Ia fai oe ma faaa’oa’o i e ua faatuatua, i le upu, ma le amio, ma le alofa, ma le loto, ma le faatuatua, ma le le gaioia” (1 Timoteo 4:12).

Peresitene Thomas S. Monson, “Ia Faamalosia ma Loto Tele,” *Liahona*, Me 2014, 69.

## O LE MEA AUPITO TAU A O LOO IA TE A’U

Saunia e Mariana Santos

I le konafesi a le autalavou a siteki tuufaatasi, sa tofu maua ai e i matou uma se Tusi a Mamona ma sa valaaulia i matou e tuuina atu i se tasi. Sa ou manao e avatu la’u [Tusi a Mamona] i le tagata pese ma siva ou te fiafia lava i ai.

Ina ua ou iloa o le a fai sana konaseti i le matou nuu, sa ou mafaufau o le avanoa lelei lava la lenei, O ana konaseti taitasi e i ai se lulu e filifili ai ni tagata lagolago se 15 e o atu i tua o le tulaga e feiloai ia te ia. Na toetoe lava a le mafai ona filifilia, ae na ou lesitala lava.

O ni nai vaiaso a’o le’i faia le konaseti, sa ou tusia ai la’u molimau i totonu o se Tusi a Mamona ona ou tatalo lea. Sa ou faamatala atu i le Tama Faalelagi o le a faigata ona ou mauaina se avanoa, ma sa ou manaomia Lana fesoasoani.

O le taimi lava na ou fai atu ai “amene,” ae tatagi loa ma la’u telefoni i se valaau mai le ofisa o le alii pese. Sa filifilia a’u!

I tua o le tulaga i le aso o le konaseti, sa ou tuuina atu ai i le alii pese le tusi. Sa ia susueina ma faitau i la’u molimau: “Sa ou faaaluina se taimi tele e mafaufau ai i se meaalofo taua, ma aoga mo oe. Sa ou iloaina e tatau ona ou tuuina atu ia te oe se mea e taua ona o mea o loo i ai ae le ona o lona tau. O le Tusi a Mamona lenei; o le mea aupito taua o loo ia te a’u. O le a taua foi ia te oe pe afai e te faitau i ai.”

Sa ia fusiina a’u ma fai mai o le a ia faitau i ai. Sa le mafai ona taofiofi o’u loimata!

O se aafiaga e seasea tupu le tuuina atu o se Tusi a Mamona i se tagata lauiloa. Ae o le faasoaina atu o le tusi e tatau ona fai ma se aafiaga masani. Na mafai ona ou tuuina atu i se uo i le aoga, se tuaoi, po o soo se isi lava.

O le tuuina atu o se Tusi a Mamona, tuuina atu o a tatou molimau, talanoa e uiga i le Ekalesia, ma le avea ma se faataitaiga, o o tatou tiute ia. E le tatau ona tatou mama e faasoa atu le talalelei a Iesu Keriso.

*E alala le tusitala i Pasila.*



# IA MANATUA

## o le Latou Filifiliga Lena

O le faitalia e a tagata uma lava, e aofia ai i latou o e e te valaauliaina e aoao e uiga i le Ekalesia.



### IA TUU ATU SOO LE VALAAULIA, MA IA VALAAULIA TAGATA UMA.

Talu ai e faigata ona iloa mua-mua po o ai o le a fia iloaina pe le fia iloaina foi le talalelei, ia faasoa atu e le aunoa au valaaulia ma ia faasoa atu i ni tagata se toatele e te mafaia ai, ae ia gauai faapitoa atu i uunaiga a le Agaga. Tatou te manuia o ni faifeautalai pe a tatou valaauliaina tagata e aoao ma talia le upumoni.

A 'o e valaauliaina isi e aoao e uiga i le talalelei, e taua ona iloa o loo i ai foi o latou faitalia e filifili ai pe talia pe leai lau valaaulia. O lou faamanuiaina e le fuaina i le latou tali mai; e fuaina i lau tautinoga e faasoa atu.

Afai la o le faamanuiaina e le fuaina e ala ia i latou o e fai mai ioe, po o e na papatisoina, o le a la le mea e *tatau* ona e taulai atu i ai a'o e fatuina ni sini mo le galuega faafaifeautalai? Taula'i atu au vaaiga i mea e mafai ona e faia nai lo o le ala e tali mai ai isi. Ia manatua, o loo ia te oe foi le faitalia. E mafai foi ona e filifili e:



### TUMAU I LE AGAGA FAAUO.

Afai e teena e se tagata se valaaulia e aoao atili, ia faaaauu pea ona e faaaloalo ma agalelei. Ia faatumauiina pea faauoga pe afai e maualuluga pea ia tulaga faatonuina. Ia faasafua atu le alofa faaKeriso i tagata uma e te mafaia ai, e tusa lava pe latou te le malamalama i mea uma e te talitonu i ai ma faia.

### IA TUMAU LE FAAMAONI.

Na sili ona lelei le fetalaiga a le Faaola: "Ia faapea ona pupula atu lo outou malamalama i luma o tagata, ina ia latou iloa la outou amio lelei, latou te vivii atu ai i lo outou Tama o i le lagi." (Mataio 5:16). Ia alofa i le talalelei ma ola i le talalelei, ma o le a le umi *ona* e maua lea o ni tagata o e e fia iloa le mafuaaga ma o e ua saunia e talia le talalelei.



## FAATUATUA E FAASOA ATU

“Tatou te faaaloalogaia filifiliga ma le taimi a tagata taitoatasi. Na fetalai mai le Alii, ‘Ia tuu atu i tagata uma taitoatasi e filifili mo ia lava’ (MF&F 37:4). O le leai o se fiafia mai o se tagata e le manaomia ai ona faaitiitia a tatou sootaga o faigauo ma le alofa. Pe taliaina ni valaaulia pe leai a o outou valaauliaina isi e ‘o mai ina matamata,’ o le a outou lagonaina lava le faamaoniga a le Alii ma, faatasi ai ma lena faamaoniga, e maua ai sina fuataga faaopoopo o le faatuatua e faasoa atu ai pea lava pea o outou talitonuga.”

Elder Neil L. Andersen o le Korama a Aposetolo e Toasefululua, “O Se Vavega Lava,” *Liahona*, Me 2013, 79.

## Auala e Avea Ai ma se Faifeautalai Faamanuiaina

O e saili mo isi motugaafa o auala e avea atili ai ma se faifeautalai faamanuiaina? Tagai i manatu maoae e IO o loo i le itulau e IO o le *Tala'i La'u Talalelei: O Se Taitala mo le Galuega Faafaifeautalai* (2004).

## IA FINAFINAU PEA MA LE ONOSAI.

E pei ona faaalai i le tala o loo i le itu taumatau, o nisi taimi e manaomia ai ni valaaulia se tele ona faatoa oo lea i le taimi tatau. Ia faaauu pea ona tatala le faitotoa, faaauu pea ona faaauo atu, ma aua ne'i faavaivai. O loo silafia e le Alii au taumafaiga ma o le a Ia faamanuia ia te oe. (Tagai MF&F 98:2.) ■

## SA OU FAI ATU PEA LAVA PEA

Saunia e Meiry Susana da Silva Rosa

**S**a ou iloa e tatau ia i tatou uma ona faasoa atu le talalelei, ae e le'i faamanuiaina ai lava a'u. Ona oo lea, i le taimi o se mataupu faaSipaniolo sa ou aveina, sa ou feiloai ai i se alii talavou e igoa ia Tiago. Sa avea i maua ma se uo ma sa masani ona ma savavali faatasi atu i le fale mai le aoga. I se tasi aso sa ma ui atu ai i luma o se falesa o le AAG sa le'i leva ona fausia.

Sa ou faapea atu, “Ua avea au ma se tagata o le Ekalesia a Iesu Keriso o le Au Paia o Aso e Gata Ai mo ni nai tausaga.” Sa ou faasoa atu ia te ia nisi o mea tatou te talitonu i ai, ma ta'u atu ia te ia le faamanuiaina tele o i matou ma lo'u aiga ona o le talalelei. Sa ou valaauliaina o ia e auai mai i sauniga o le Aso Sa a sau i le 9:00 i le taeao.

Na oo i le Aso Sa ma sa ou faatalitali ma le naunautai, peitai sa le'i sau o ia. O lena vaiaso, sa ou toe valaauliaina ai o ia. Sa faaauu pea leni mea i vaiaso uma mo le lua pe tolu masina. Sa ia ta'uina mai ia te a'u i taimi uma se mafuaaga na le sau ai: “Na ou moe umi,” “Sa ou lelava,” “Sa i ai faafitauli.” Ae sa faaauu pea ona ou fai atu ia te ia, ma sa foliga mai sa le'i afaina ia te ia.

I le taeao o se tasi Aso Sa, sa ou saofai ai i se nofoaumi e lata i le pito i tua o le falesa. Sa i ai lava nai minute na totoe ona faatoa amata lea o le sauniga ae valaau malie mai loa e se tagata i lo'u igoa. Sa ou tilotilo atu i le faitotoa, sa i ai iina Tiago!

“Pe ou te le'i folafola atu ea ia te oe e i ai se aso ou te sau ai?” na ia fai mai ai. Sa auai o ia i le sauniga faamanatuga, ma i lo'u te'i, sa nofo foi mo isi sauniga na totoe ma sa foliga mai sa fiafia ina ua ou faailoa atu o ia i faifeautalai. Sa amata ona latou feiloai soo. Sa faaauu ona ma talanoa ma Tiago a'o ma savavali atu i le fale mai le aoga, ae o a ma talanoaga sa faatatau i upumoni sa ia aoaoina. Sa mafai ona ou taliina fesili ma tuu atu i ai la'u molimau. Mulimuli ane, ona maua ai lea o lana ia lava molimau ma auai i le Ekalesia.

O le taimi nei o loo avea a'u o se faifeautalai faamisiona i le Misiona a Pasila Santa Maria. Ae ou te le'i alu atu mo le galuega faamisiona, sa auina atu foi e Tiago lana talosaga e fia avea ma se faifeautalai faamisiona, ma o loo auauna atu nei i le Misiona a Pasila Manaus.

Talu ai nei lava na ou mauaina ai se tusi mai ia te ia. “Faafetai lava mo le valaauliaina pea lava pea o a'u e sau i le lotu,” na ia tusi mai ai. “O le a faavavau lou agaga faafetai.” Ua ou fiafia e le gata ina faasoa atu le talalelei i aso uma, ae i le iloa foi o loo faia e Tiago lea mea e tasi.

*O le tusitala e sau mai São Paulo, Pasila.*



Faataitai i auala faigofie nei e 11 e faasoa atu ai le talalelei i talanoaga o aso uma.

# TUU ATU VALAAULIA

MA

# TOE TULITATAO

A fai e te manao e faasoa atu le talalelei ae e te popole pe e te le o mautinoa foi le auala e fai ai, o le tusiga lenei e mo oe. O le faasoaina atu o le talalelei e sili atu nai lo na o le valaaulia o uo e feiloai ma faifeautalai. O se manatu manaia tele lena, ae e tele isi mea e mafai ona e faia e "valaaulia ai isi e o mai ia Keriso" (*Tala'i La'u Talalelei: O Se Taitala mo le Galuega Faafaiifeautalai* [2004], 1). Ma e faigofie atu nai lo le mea o loo e mafaufau i ai. Atonu o le a fesoasoani se tala faatatau i le lakapi faaAmerika.

O tagata taaalo lelei e iloa le auala ma le taimi e pasi ai le polo i tagata o le latou au ia latou maua ai se avanoa e o ai i luma. O le valaaulia o isi e aoao e uiga i le talalelei e pei lava o le pasiina o le polo, ae nai lo le tuuina atu ia i latou o se avanoa e sikoa ai, ua e tuuina atu ia i latou se avanoa e o mai ai ia Keriso.

O nai faataitaiga nei e te amata ai: Tatalo mo musumusuga ma ia fatufatuai a'o e fetuunaia nei manatu ia fetuunaia ma manaoga a au uo po o tulaga. Ona faamalosiua atu lea ia i latou!



### Valaaulia se uo i le Mutuale

E i ai sau uo e matuai fiafia i taaloga. A e faalogo loa o le vaiaso lenei o le gaoioiga a le Mutuale o se po o taaloga, ona e iloa lea o le avanoa lelei tele lea e valaaulia ai o ia.

### Valaaulia se uo e lua te matamata i le konafesi aoao

O loo e faalogologo i se lauga mai le konafesi aoao i luga o lau MP3 a’o e savali atu i le aoga. Ua fesili atu se uo po o le a le mea o loo e faalogologo i ai. E te tau atu ia te ia le mea sa’o—o loo e faalogologo i saunoaga a se perofeta soifua a le Atua. “O le a le uiga o lena mea?” ua fesili atu ai lau uo. E te faamalamala atu e uiga i perofeta ma aposetolo i aso nei, ona e fesili atu lea i lau uo pe fia auai atu faatasi ma oe ia Aperila e faalogologo i mea o loo saunoa mai ai na taitai.

### Faasoa atu se tusiga mai le *Liahona*

O se tasi o tusiga mai se lomiga lata mai nei o le *Liahona* ua faamanatu atu ai ia te oe se talanoaga sa oulua faia ma se tasi o au uo. Ia e faasoa atu ia te ia lau kopi o le mekasini (po o se sootaga i luga o le initoneti) ma valaaulia o ia e faitau i le tusiga.

### Ta’u atu i se tagata e uiga i le Tusi a Mamona

O loo i ai se sini a le tou uarota e faitau le Tusi a Mamona i le faaiuga o le tausaga, ia alu ma ave au tusitusiga paia i le aoga. Ua iloa atu e se tasi o au uo lau tusi ma fesili atu pe o le a le mea e faatatau i ai, ona e faamatala atu loa lea po o le a le Tusi a Mamona ma faasoa atu lau molimau e uiga i ai.

*Faitau le tala a Kenifi o loo mulimuli mai i le tusiga lenei e iloa ai le mea na tupu ina ua vaايا se tagata o le Ekalesia i le aoga ma se Tusi a Mamona.*



**VALAAULIA MA TOE TULITATAO**

“O lau molimau lea a o tatou galulue faatasi, i le sailia o le tasi, valaaulia, ma tulitatao faatasi ma le faatuatuaina ma le faatuatua, o le a ataata mai le Alii i o tatou luga ma le faitau selau o afe o fanau a le Atua o le a maua le faamoemoe ma le filemu i Le Ekalesia a Iesu Keriso o le Au Paia o Aso e Gata Ai.”

Elder M. Russel Ballard o le Korama a Aposetolo e Toasefululu, “Toe Tulitatao,” *Liahona*, Me 2014, 81.

### Valaaulia se uo e lua te o i se siva a le Ekalesia


Ua valaaulia oe e lau uo lelei e te lua tafafao i le Aso Faraiile nei, ae e i ai se siva a le Ekalesia i le po lena. Nai lo o le teena o lana valaaulia, tago e valaaulia o ia i le siva!

### Valaaulia se uo i le lotu

Na talosagaina oe e te aoaoina atu se vaega o le lesona i le Aso Sa. A fesili atu sau uo po o a au mea e fai i le faaiuga o le vaiaso, nai lo o le faamisi o au fuafuaga o le Aso Sa, ia e faamatala i ai o le a e aoaoina atu se vaega o le lesona i le lotu. Ua fiafua lau uo, o lea ia e valaaulia o ia lua te o mai faatasi ina ia faalogo o e aoao atu.

### Faaali atu i lou uo le [Mormon.org](http://Mormon.org)

E tele ni fesili a au uo e uiga i o tatou talitonuga, o lea ia e faaali atu ia i latou le [Mormon.org](http://Mormon.org) e fesoasoani e tali ai a latou fesili.







## LAASAGA LAITI I LE ALA O LE LIUA

I le aso muamua i la'u aoga fou, sa ou matauina ai se teineitiiti o le na ese mai isi [teineiti]. Sa faigata lona aiga faaleaiga, ma o taimi uma lava sa taufa'alilili i ai isi tamaiti aoga. Talu ai sa sosoo lana loka ma la'u loka, o lea sa le'i umi ai ae ou masani lelei ia te ia. Sa lelei o ia, ae sa i ai sana amioga le lelei o le palauvale.

Sa ou faamalamalama atu ia te ia o'u talitonuga ma tulaga faatauaina o loo aoaoina i le *Mo le Malosi o le Autalavou*. Sa fialia tele i ai o ia. Sa ou valaaulia o ia i le Mutuale mo ni nai vaiaso, ma sa galue malosi o ia e faatoilalo ana amioga o le palauvale.

Sa iu ina ou tuuina atu ia te ia se kopi o le *Mo le Malosi o le Autalavou* ma se kopi o le *Faamaoni i le Faatuatua*. O le aso na sosoo ai i le aoga, sa fai mai ai o ia ua tele ni mea fou ua ia aoaoina i na tamaitusi e lua. Sa ou valaaulia o ia i le Mutuale i le po lena, ma a'o tapena a matou mea ina ua uma le [Mutuale], sa faapea mai o ia, "Hana e mafai ona ou papatiso?"

Sa ou le toe minoi. Ou te le'i fesoasoani lava i se isi ia auai i le Ekalesia. Mo se taimi, sa na ona ou tutu iina—sa le mafai ona ou tautala—ae na iu lava ina ou taitaiina lona lima ma ma savavali atu i se tasi o le au peresitene o Alii Talavou, o le sa fesoasoani i la'u uo e faafesootai faifeautalai ina ia mafai ona amata ana tapenaga mo le papatisoga.

Sa matuai ou lagona le fialia ona na filifili la'u uo e papatiso. Sa ese le matagofie o le mafaufau e faapea na ou fesoasoani ia te ia i le ala o le liua. Sa amata ona faaputuputu ni manatu o ni auala e fesoasoani atu ai i isi ia uia lena lava auala.

*Hannah Christensen, Idaho, ISA*

### Faasoa atu se mau i se tesi

I le taimi o lau suesuega o tusitusiga paia i le taeao, ua e tau ai i se fuaiupu o le a sili ona aoga i se uo sa oo i ni taimi faigata talu ai nei. Ua e auina atu ia te ia se tesi e faailoa atu ai o loo e mafaufau atu ia te ia ma na e tau i se mau atonu o le a fialia i ai.

### Valaaulia se tagata i le taumafataga o le afiafi

E fai e Tama lana supokeli lauiloa i le vaiaso lenei! Ua e matauina se tamaitiiti fou i lau aoga e foliga mai e tau leai ni ana uo, o lea na e filifili ai e valaaulia o ia i le taumafataga a le tou aiga. Afai o le po o se Aso Gafua, atonu e te talosagaina e nofo pe a uma mo le afiafi faaleaiga.

### Fai atu i se uo e fesoasoani ia te oe e galulue i se galuega faatino o le Alualu i Luma o le Tagata Lava ia po o le Tiute i le Atua.

A o e fuafuaina lau galuega faatino tele, e te iloa ai o le a e manaomia le fesoasoani, o lea ia e filifili e talosaga atu i nisi o au uo le lolotu e fesoasoani atu. O lenei mea e mafai ona e maua ai le avanoa e faamatala atu ai le pogai e te auauna atu ai, ma e mafai foi ona e maua le fialia i le auauna atu faatasi.

### Tuu atu i se uo le *Mo le Malosi o le Autalavou*

Afai e fesili atu se uo ia te oe pe aisea e te ola ai i tulaga faatonuina faapitoa, tuu atu ia te ia se kopi o le *Mo le Malosi o le Autalavou* ma talanoa i le ala e fesoasoani ai le ola i tulaga faatulagaina e te lagona ai le fialia sili atu.

*Faitau le tala a Hana o loo i le tusiga lenei e iloa ai le auala na ia faasoa atu ai le tamaitusi lenei i se uo.*





## E TE FIA AOA O E UIGA I LA'U TAPUAIGA?

Sa i ai se mea na ese e uiga ia Aperila. Sa le mafai ona ou iloa, ae po o le a lava, sa o se eseeseega lelei. Sa iu ina ou iloaia o ia o se tagata o le Au Paia o Aso e Gata Ai.

I se tasi aso i le malologa umi, sa ou saofai ai i se laulau avanoa—sa avanoa vagana ai o tusi a Aperila sa i ai i se faaputuga laititi. O le pito i luga o le faaputuga sa i ai le Tusi a Mamona. Sa ou aapa atu ma sii a'e i luga.

“O loo ou tilotilo i lau tusi,” sa ou fai atu ai ia Aperila ina ua taunuu mai i ni nai minute mulimuli ane ma lana laulau meaai. “Ua lelei.” o lana tala lea, ma si ona te'i laititi.

Sa ou faitauina ni nai itulau ma sa ou maofa ai. Ou te talitonu i le Atua, ae ou te ta'ua foi au o se tagata e fiafia i le

faasaienisi. Ae peitai o le mea na ou faitauina, sa i ai se lagona moni e uiga i ai. E mafai moni lava ona tupu. Ma afai na tupu moni lava, ona a lea? Sa faaosofia ai lo'u loto e mafaufau i ai.

Ina ua uma le periota o le malologa umi, sa ou toe faafoi atu ia Aperila lana tusi ae ou alu i la'u vasega na sosoo ai. Sa ou fiafia i mea na ou faitauina i le Tusi a Mamona, ae sa ou matamuli e talanoa atu ia te ia e uiga i ai.

Ina ua mavae ni nai vaiaso, sa sau ai Aperila ia te a'u i le taimi o suesuega i le falefaafiafia ma se vaaiga pau i ona foliga. “E te fia aoao moni lava i la'u tapuaiga?” na ia fesili mai ai. Sa ou fia aoao ma o le mea lene na ou ta'uina atu ia te ia. “E i ai se fonotaga

faapitoo i le Aso Faraile nei mo tagata o e fia iloa e uiga i le matou Ekalesia,” na ia fai mai ai. “Sa ou faapea pe e te fia alu i ai.”

Sa ou fia alu. I le fonotaga, sa faamalamalama ai e le peresitene o le misiona nisi o aoaoga faavae atu o le Ekalesia. O mea uma sa ia fai mai ai na fetau ia te a'u. E le'i leva ae amata ona fai a'u lesonea a faifeautalaiti. Ou te le'i liliu mai i le taimi lava lene, ae i le mavae ai o anapogi ma tatalo, sa ou mauaina la'u molimau ma papatisoina loa.

Ua matuai ese lava lo'u olaga mai le mea na semanu e i ai pe ana ou le taliaina le talalelei toefuataiina. Ma o se eseeseega lelei.

*Kenneth Hurst, Alapama, ISA*

## Aua nei galo e tulitatao i ai

A uma ona valaaulia, o le isi laasaga e sosoo ai o le toe tulitatao. I le lapaki faaAmerika, o tagata taaalo lelei latou te iloa e le'i uma le latou galuega i le taimi latou te pasiina ai le polo—e tatau lava ona latou minoi pea ma ia avanoa [mai tagata o le isi au].

O le tulitatao e mafai ona faigofie e pei lava o le fesili atu i tagata o lau vasega po o a ni o latou manatu e uiga i le mau sa e faasoaina atu po o a foi ni lagona o lau uo ina ua uma ona lua o i le lotu.

Mo se faataitaiga o le auala na suia ai e le toe tulitatao le olaga o se alii talavou, siaki le tala a Kenifi.

Pe a e toe tulitatao i le maea ai o le valaauliaina o isi e aoao e uiga i ou talitonuga, ua e faaali atu ai e te popole mo lo latou fiafia. O le a latou lagonaina lou manao faamaoni e fesoasoani ma o le a latou lagona le lagona lelei e fesili atu ia te oe nisi fesili i le lumanai. ■



*Pe o se mealilo lenei sa  
tatau ona taofia e Luisa?*

# Faamatalaina

**Saunia e David Dickson**

Mekasini a le Ekalesia  
E faavae i se tala moni

*“Pei na ou alofa ia te outou, ia faapea  
na outou fealofani” (“Ia Fealofani,”  
Viiga, nu. 195).*

**N**a tapuni e Luisa lana tusi numera  
ina ua ta le logo. Ma le isi, sa le'i  
mafai ona taulai atu o ia i fesili i le  
itula e tasi ua mavae atu.

Sa nanati atu i fafo isi tamaiti aoga  
uma. O le vasega mulimuli o le  
Aso Faraile. Sa masani lava ona  
lagona e Luisa le fiafia ona o le  
faaiuga foi o le vaiaso. Ae o le aso,  
sa le mafai ona ia lagonaina se mea ae  
na o le popole. Sa le'i mafai talu mai le  
malologa umi. O le taimi lena na fesili  
atu ai lana uo lelei, o Salota ia te ia:  
“E mafai ona e taofia se mealilo?”

O le taimi lena, na faalagolago atu  
ai Luisa ma luelue [lona ulu] ma le  
naunautai. Sa lelei o ia i le taofiofia o  
mealilo. Sa mafaufau o ia, e mautinoa  
lava o le a ta'u mai e Salota ia te ia e  
uiga i se tamaitiiti aulelei na  
fia alu i ai.

Ae peitai o le mealilo  
a Salota, sa leai ma se  
malie.

Sa faasalavei ane se  
leo i mafaufauga o Luisa.  
Sa emo ma ea a'e i luga mai





# MEALILO



“O se uo, e popole. O se uo, e alofa. O se uo, e faalogo. Ma o se uo e aapa atu.”

Peresitene Thomas S. Monson, “Ia Laveaiina,” *Liahona*, Iulai 2001, 57.

lana kesi. “Na i ai sau fesili e uiga i le meaaoga, Luisa?” na fesili atu ai lona faiaoga. Ua tuua e isi tamaiti aoga uma le potu.

“Leai,” o le tali atu lea a Luisa. Sa tau atu lana vaai i mata o le faiaoga. E *tatau lava* ona ia ta’uina atu i se tasi! Ae peitai na faatauto o ia e Salota e aua le tauina.

“E tatau ona ou alu e pu’e le pasi,” o le oso vave atu lea a Luisa. Sa ia faamaulu lona ofutele ma topetope atu i fafo i le ea malulu o le taumalulu.

O le taimi atoa na alu atu ai le pasi i le fale, sa lagona e Luisa le popole o lona loto o lea sa tau le mafai ai ona ia onosaia. Sa pei e fufusi lona fatafata, sa pei e faigata ona manava.

Sa le mafai e Luisa ona taofi le mafaufau i le mealilo a Salota. I le malologa umi, na fai atu ai Salota sa ia faia se mea matautia. Sa le mafai lava e Luisa ona talitonu i le mea na ia faalogoia. Sa faapea ua masani o ia i lana uo lelei! Sa le mafai ona ia vaai faalemafaufau e mafai ona fai e Salota se mea taufaafefe faapena. Ina ua uma le malologa umi, sa faatauto e Salota

ia Luisa ia aua lava ne’i tauina atu i se isi.

Ae faapefea pe a lavea ai Salota?

Sa taumafai Luisa e poloka i fafo taliega ma talanoaga sa siomia ai o ia i totonu o le pasi a’o moeiini ona mata ma tatalo i lona loto.

“Faamolemole, le Tama Faalaelagi, fesoasoani mai ia ou iloa le mea e tatau ona fai. Ou te le manao e ita la’u uo ia te a’u. Ae ou te le manao foi e tupu se mea leaga ia te ia. I le suafa o Iesu Keriso, amene.”

O le savali atu i le fale na pei e umi nai lo le mea na masani ai. Mata e le iloa e Tina se mea ua faaletonu pe a oo atu Luisa i le fale? O le a sana tala e fai atu i ai?

O le tilotilo atu i le kiona i luga o le elele, na manatua ai e Luisa le taugaaisa na la amataina ma Salota ma nisi tamaiti i le paka i le vaiaso na te’a. Sa matuai malie tele lena mea! Sa mafaufau o ia i isi mea la te fiafia ma Salota e fai faatasi. Tafa-fao faatasi. Savaliga sopo. Faiga o meaaoga. Taaalo i taaloga

Mata o le a faapei pe afai e ta’u e Luisa lana mealilo ma le toe manao ai Salota e toe aveva o ia ma ana

uo? O le manatu na atili fufusi ai le manava o Luisa.

Ona oso ae lea o se isi ona manatu O le taimi nei o le mea e sili ona taua o le mea lea e sili ona lelei mo *Salota*—ae e le o le mea e ono mafaufau i ai Salota e uiga ia te ia. E manaomia e Salota se uo moni, o se uo o le a fesoasoani ia te ia ia saogalemu. Na iloa e Luisa sa faia e le aunoa e Iesu mea e sili ona lelei mo isi, e tusa lava pe na le fiafia ai isi tagata ia te ia.

Sa iloa e Luisa le mea na tatau ona ia faia. E tatau ona ia talanoa ia Tina e uiga i ai. O le a valaau atu o ia ia Salota ma ta’u atu i ai lona popole ma e tatau ona fesoasoani mai se tagata matua. Ma atonu foi o le a talanoa atu ai Salota i lona tina.

Sa mama teisi le loto o Luisa a’o savali atu o ia i le faitotoa pito i luma.

“Tina?” o lana valaau lea a’o savali atu i totonu. “E mafai ona ta talanoa?”

Atonu o le a iu ina ita Salota, ae na iloa e Luisa o le mea sa’o lenei e tatau ona fai. O le a aveva o ia ma se uo moni.

O nisi mealilo e matuai taua tele mo le taofiofia. ■



Saunia e Jan Pinborough  
Mekasini a le Ekalesia

# O AFEA e Tatau ona Ou Ta'uina Ai?



## *Pe afai o se tagata o loo—*

Taalo i se taaloga lamatia  
Faaaogaina ni fualaa e le o i latou  
e anaina  
Aai, feinu, po o le sogisogi i mea e le masani ai  
Faatigaina i o latou tino  
Faia o se mea latou te le mananao e iloa e tagata matutua

## *Pe afai o se tagata o loo—*

Taumafai e faaoso oe e fai se mea mai le lisi o loo i luga  
Faaali atu ni ata o tagata e le o faia ni lavalava  
Fai atu ia te oe e tilotilo pe tago atu i o latou tino pe faataga i latou e tilotilo atu pe tago atu i lou tino  
Fai atu ia te oe e nana se mealilo e uiga i se mea e te maua ai ni lagona le lelei  
Faasaunua pe tautala le mafaufau atu ia te oe po o se isi tagata—o lona tagata, e ala i le tesi feaveai,  
po o luga o le initoneti

## *Afai o se mea—*

E te lagona ai lou le sefe po  
o ni lagona le lelei  
E foliga e le fetai pe e  
te maua ai se lagona  
“aue-auoi”  
  
Faalogo i le Agaga Paia ma  
ia e talitonuina ou lagona!

## **O Ai e Tatau ona Ou Ta'uina Ai?**

I se matua, matua o matua, po o se tagata o tausia [oe]  
I se faiaoga o le aoga po o se faufautua  
I se faiaoga po o se taitai o le Ekalesia  
I se uso po o se tuafafine matua  
I se fomai  
I se uo e mafai ona fesoasoani atu ia te oe e ta'u i se tagata matua  
  
E le tatau ona e lagona le tuua na o oe ma se mealilo. E mafai e se tagata matua ona fesoasoani atu ia e iloa le mea e fai. Ia faaauau pea ona ta'u i tagata seia oo ina e maua le fesoasoani o loo e manaomia.  
Ia toa! E te malosi. O lou tautala e ta'u atu e mafai ai ona fesoasoani ia te oe ma isi ia saogalemu! ■

## MOLIMAU FAAPITOA



Saunia e Elder  
Robert D. Hales

O Le Korama  
a Aposetolo e  
Toasefululua

*O sui o le Korama a  
Aposetolo e Toasefu-  
lulua o ni molimau  
faapitua a Iesu  
Keriso.*

# Aisea e tatau ai ona tatou **FAALOGOLOGO** i le konafesi aoao?



*Mai le "Konafesi  
Aoao: Faamalosia o  
le Faatuatua ma le  
Molimau," Liahona,  
Nov. 2013, 6–8.*

Ou te tautino atu, afai  
o le a outou faalogo,  
o le a outou lagonaina  
le Agaga.

E mafai ona tatou  
faalogoina le afioga a le  
Alii ua faatatauina ia i  
tatou lava.

E ala atu i konafesi  
aoao e faamalosia ai  
o tatou faatuatua ma  
faalolotoina ai a tatou  
molimau.

Afai tou te tatalo ma se  
manaoga faamaoni ia  
faafofoga i le siufofoga o  
lou Tama Faalelagi i savali  
o le konafesi, o le a outou  
iloaina o loo la fetalai atu  
ia te outou e fesoasoani  
ia te outou.



Ua faia e Iesu Keriso le faataita-iga atoatoa mo i tatou e mulimuli ai. E mafai ona e faaaogaina le gaioiga leni e aoga atili ai e uiga ia te la ma sauniuni ai mo le Eseta. Amata i le numera 1 i le Aso Sa a'o lumanai le Eseta. I aso taitasi, faitau e uiga ia Iesu ma tali le fesili. Ona 'oti ese lea o le ata e fetavi i ai ma faapipii i luga o le siata.



# Sauniuni mo

1

1. Na mulumulu e Iesu vae o Ona soo ma faamafanafana atu ia te i latou i le fetalai atu, "Aua le atuatuva'e o outou lotu, aua foi tou te matatau" (Ioane 14:27). O le a se mea e mafai ona e faia e au'aua atu ai pe faamafanafana atu ai i se uo i leni aso?

2. I le Tausamaaga Mulimuli, sa aoaoina ai e Iesu Keriso ia Ona soo i le ala e fai ai le faamanatuga. Sa la fetalai atu ia i latou, "Tou te faia le mea nei e fai ma faamanatuga ia te au" (Luka 22:19). O le a se auala se tasi e mafai ai ona e faaalalo atili i le faamanatuga?

2

3. Ina ua amata e Iesu le Togiola i le Faatoaga o Ketesemane, sa la faia le mea na finagalo ai le Tama Faalelagi na te faia, e ui lava ina sa faigata tele. Sa tatalo o la, "Ia aua le faia lo'u lotu, ao o lou finagalo" (Luka 22:42). O le a se auala se tasi e mafai ai ona e usiusitai atili ai i le lotu, aoga, po o le aiga?

3



# le Eseta

4

4. Ina ua savaina e tagata Iesu i le taimi o le Faasatauroga, sa la fetalai atu, “Lo’u Tama e, ia e faamagaloina atu ia te i latou; aua ua latou le iloa le mea ua latou faia” (Luka 23:34). Aisea e tava ai le faamagaloina atu o isi tagata?



5. Sa faamautinoa e Iesu o le a tausia lona tina pe a maliu o Ia. Sa la fetalai atu ia Ioane, “Faauta o lou tina,” po o le ia fai Maria ia pei lava o lona lava tina (Ioane 19:27). O le a se mea e mafai ona e faia i le aso e fesoasoani ai i ou matua po o e o tausia oe?

5



6

6. A’o lei maliu o Ia, sa tatalo atu Iesu i le Tama Faalelagi ma fetalai atu, “Ou te tuuina atu lo’u nei agaga i Ou aao” (Luka 23:46). E mafai faapefea ona e faia au tatalo ia sili atu ona faapitoa?



7. Ina ua mavae Lona maliu, sa toe soifua mai Iesu! O le pogai lena tatou te faamanatuina ai le Eseta. Na asiasi atu Keriso i Ona soo ina ua mavae le Toetu ma fetalai atu, “Aua foi e te masalo vale, a ia e talitonu” (Ioane 20:27). Aisea e tava tele ai le Eseta?

7





# MALAMALAMA

E faavae i se faatalanoaga na saunia e Richard M. Romney

Mekasini a le Ekalesia

O lou igoa o Magnolia. Ou te alu i se uarota e tautatala faaSipaniolo. O se tasi aso na sau ai Mia i la'u vasega Peraimeri. E na o le Igilisi e tautala ai. Sa ou manao e fesoasoania Mia ia lagona le taliaina, o lea na ou filifili ai e fesoasoani ia te ia. O le a avea au ma ana faamatalaupu!

## TELE MEA E TUTUSA AI

*Na faatoa uma ona papatisoina ma faamauina i ma'ua uma. Ma te fiafia uma i musika, ae maise lava i viiga ma pese Peraimeri. Ma te fiafia uma i afiafi faaleaiga. Ma o i ma'ua uma foi e fiafia e faitau tala o loo i totonu o le Liahona.*

## TULITULI ATU

*O le taimi muamua sa faigata ona tulituli atu i le taimi na ou faamatalaupu ai mo Mia. Ona faalemu lea o le tautala a faiaoga ia lava ai se taimi mo a'u. Sa matou maua uma se lagona lelei i le mafai ona matou fesoasoani ia Mia.*

## TUU MAI LOU LIMA!

E faapefea ona faaalua lou alofa e ala i le fesoasoani atu i isi? Tusi lolomi le ata o lou lima ma auina mai ia i matou lau tala ma le ata, faatasi ma le faatagaga a ou matua. Asiasi i le liahona.lds.org po o le imeli liahona@ldschurch.org.

O se faamatalaupu e faaliliuina upu o loo tautala ai se tagata i se isi gagana ese.

**MAGNOLIA**

# Vave

## FESOASOANIGA MUSUMUSU

*O lou igoa o Mia. O o'u matua e tautatala faaSipaniolo, o lea na matou o ai i le uarota e tautatala faaSipaniolo. Sa ou le malamalama po o a tala na tautatala ai tagata. Sa iloa mai e Magnolia ua ou le fiafia. Sa sau i o'u tafatafa ma musumusua mai le faaPeretania i lo'u taliga.*



## AUALA E MAFAI ONA E FESOASOANI AI

Motugaafa mai ia Mia ma Magnolia:

Afai o se tagata:

- E fou i le lotu po o le aoga, fesoasoani ia ona lagona le taliaina.
- E le alu soo i le lotu, valaaulia o ia lua te o faatasi.
- O loo sauaina, tu atu mo ia. Ta'u i lou faiaoga.
- O foliga tuua toatasi, valaaulia o ia e faatasi atu ia te oe.
- Manaomia se uo, fai atu ia te ia e avea o ia ma au uo. Faatasi ai ma le faatagaga a ou matua, valaaulia o ia e alu atu i lou fale lua te taaalo ai.

Afai e sili atu ma le tasi ni gagana e tautala ai, ofo atu e faamatalaupu.

## UO LELEI

*Ina ua uma le Peraimeri, sa ou fesili ia Magnolia pe fia avea ma a'u uo. Sa fai mai o ia ioe. Mai lava i le taimi lena, na avea ai Magnolia ma a'u uo ma a'u faamatalaupu. Sa fesoasoani mai ia te a'u e maua foi isi uo.*

## FAI LE MEA E FAI E IESU

*E mafai e tagata uma ona fesoasoani i tagata, e pei ona sa fesoasoani mai Magnolia ia te a'u. Tatalo. O le a fesoasoani le Tama Faalelagi ia te oe e iloa po o ai e fesoasoani i ai. E pei lava o le pese "Pe ana Tu le Faaola i Ou Autafa" (Uo, Oke. 1993, 14). E mafai ona tatou taumafai e fai le mea e finagalo Iesu tatou te faia. ■*

**MIA**



# O le Tala i le Tagata Poto ma le Tagata Valea

## O LE A LE FAATAOTO?

O le faataoto o se ituaiga tala faapitoa. E faamatala mai ai mea faigofie, e pei o se timuafa po o se penina, o mea e masani ai. Sa faamatala atu e Iesu faataoto, e fesoasoani ai i tagata ia malamalama i upumoni faaleagaga. O se tasi faataoto o loo i le Mataio 13:44–46. O le a le mea o aoo mai ai e uiga i le taua o le talalelei? E mafai ona e mauaina isi faataoto?

Saunia e Jean A. Bingham

**I** se tasi aso na finagalo ai Iesu e aoo atu i tagata auala e tutumau malolosi ai e tusa lava pe tutupu ni mea faigata. Sa Ia faamatala atu ia i latou se tala e uiga i se afa malosi, i se tagata poto, ma se tagata valea. Ina ua oo mai le afa, sa le'i pau i lalo le fale o le tagata poto aua sa fausia i luga o se papa. Ae na pau le fale o le tagata valea ona sa fausia i luga o le oneone.

Sa aoo atu e Iesu le taua o le i ai o le faatua-tua ia te Ia ma mulimuli i Ana aoaoga. Pe a tatou atinaeina se molimau malosi, o le a lava lo tatou malosi e tutu atu ai, e tusa lava po o a ni mea faigata e ono tutupu mai. ■

*E alala le tusitala i Iuta, ISA.*

## PAPA PO O LE ONEONE?

Tusi gaoioiga e pei o gaoioiga o loo i lalo i luga o ni fasipepa. Ia auauai e filifili ma faitau leotele mai. Ia talanoaina pe aisea o le a pei ai le faia o ia mea taitasi o le fauina o se fale i luga o le papa po o le oneone. E mafai faapefea e le faalogo i perofeta ona fesoasoani ia i tatou e mulimuli ai i aoaoga a Iesu ma faia ai filifiliga poto?

Faitauina faatasi o tusitusiga paia	Kopi i meaaoga
Taliaina o se lu'i	Faaofiaina o se tagata fou
Alu i le Lotu	Faaogaina o upu leaga
Tuuaiia o se mea sese i se isi tagata	Taaalo i se taaloga ma se tuafafine po o le uso
Faia o lau meaaoga	Faasoa atu i isi
Faalia o le faaaloalo mo isi	Faaaluina o itula e tele i taaloga komepiuta
Tautala i le sa'o	Aveina o se mea e le o sau mea.
O le nofonofo e le tautala a'o sauaina se isi tagata	Tatalo i taeao uma ma po uma
Faalogologo i le konafesi aoao	Faaofiaina o se tagata e le'i faitauliaina

### FAATUFUGAGA I LE MAA

Filifili se maa lamolemole la faaoga se maka po o se peni, e tusi ai i luga le upu "Iesu Keriso." Talanoa pe aisea e taua tele ai le atinaeina o o tatou olaga i luga o Ana aoaoga. Tuu le maa i se nofoaga e mafai ona e iloa atu ai i taimi uma.



### MOTUGAAFA O TUSITUSIGA PAIA

O le Tusi a Mamona e mafai ona fesoasoani ia i tatou ia malamalama i le Feagaiga Fou. Faitau le Helamana 5:12. O le a se mea na e aoaoina e uiga i le uiga o le upu *papa* mai le faitauina o lena fuaiupu? Su'e le upu "Papa" i le Taiala i Tusitusiga Paia e iloa ai pe mafai ona e maua ni isi fuaiupu e fesoasoani ina ia e malamalama atili ai.


### LAUGA MO LE AIGA

Faitau faatasi le Mataio 7:24–29. E mafai foi ona e tusia se ata o le tala. Ona e talanoa lea e uiga i fesili nei: O a ni mea i o tatou olaga ua faapei o le timu ma le matagi? E faapefea ona faapei le faia o faaiuga e tusa ai ma mea ua lauiloa o le fausia o lo tatou fale i luga o le oneone? E faapefea ona puipuia i tatou ma faama-lolosia i tatou e pei o se fale e fausia i luga o se papa i le mulimuli i aoaoga a Iesu? Talanoa i ni auala e mafai ona fausia ai o outou faatuatua ia Iesu Keriso.

**Pese:** "O Le Tagata Poto ma le Tagata Valea" (*Tusipese a Tamaiti*, 132)

**Mau:** Mataio 7:24–29





**E ALOFA LO’U TAMA FAALELAGI IA TE A’U**  
*Ua la faia o’u mata ou te vaai ai i mea matagofie. Ua la faia o’u taliga ou te faalogo ai i mea lelei. . . . Ua ou iloa ai Lona alofa” (Tusipese a Tamaiti, 17).*



Saunia e  
Bonnie L. Oscarson

O Le Peresitene Aoao  
o Tamaitai Talavou

# TUSITUSIGA PAIA i lalo o Fetu



*“Le Agaga e taitai ai, ma ou iloa ai mea moni” (Tusipese a Tamaiti, 66).*

**A**o ou laititi, sa matou fialia ma o’u tuagane e momoe i fafo i le taimi o le taumafanafana. Matou te fofolaina a matou ato moe i luga o le polotito o le fale, ona su’e lea o mamanu i fetu ma faalogologo i alisi a’o matou faagalegale momoe.

O se tasi po na ma o atu ai ma lo’u tuagane matua o Lale i fafo i le polotito. Sa ma taoto ma vaavaai atu i luga i fetu. O Lale sa le masani ona tautala soo, ae o lena po na ia fai mai ai e manao e faamatala mai ni tala ia te a’u. Sa ia faamatala mai ia te a’u tala mai le Tusi a Mamona, na amata

mai ia Liae ma lona auaiaga na tuua Ierusalem.

Sa ou faalogo muamua i tala mai le Tusi a Mamona i le Peraimeri, ae ina ua faamatala mai e Lale ia te a’u, sa ese lava. Sa pei na sili atu ona mo’i. A’o ou tilotilo a’e i fetu ma faalogologo i lo’u tuagane, sa ou lagona le mafanafana ma le fialia i lo’u loto. E ui ina sa ou le iloaina i lena taimi, sa ou lagonaina le Agaga Paia o ta’u mai ia te a’u e moni le Tusi a Mamona.

O ni nai masina mulimuli ane, sa ou tau ai i lo matou fale i se tusi ata o tala mai le Tusi a Mamona. Ina ua amata ona ou faitauina, sa ou maua foi lea lava lagona mafanafana ma le faagaetia lea na ou mauaina i le

taimi na faamatala mai ai e Lale ia te a’u ia lava tala.

O ni tausaga mulimuli ane, a’o ou taumafai e filifili pe na i ai sa’u molimau, sa fai si o’u le fialia ona ou te le’i mauaina se tali maoae pe malosi. Pe o le uiga ea o lenei mea sa le’i i ai sa’u molimau? Ona ou manatuaina lea o o’u lagona ina ua faamatala mai e lo’u tuagane ia te a’u ia tala mai le Tusi a Mamona, ma sa ou iloaina *na* ou iloa e moni le Ekalesia.

O se molimau e le o taimi uma e oo mai ai i se taimi maoae e tasi. E masani lava ona oo mai i ni taimi filemu se tele lea e musumusu mai ai le Agaga Paia ia i tatou e faapea, o nei mea ua moni. ■



# Moe i le Aso Toonai ma 'Ātaata i le Aso Sa

Saunia e Miche Barbosa

E faavae i se tala moni

*“Ou te lagona le fiafia i taimi uma  
pe a ou alu i le lotu”* (Children's  
Songbook, 157).

**E** fiafia lava Mara e  
faa'ataata tagata. Sa ia  
faa'ataataina lona faiaoga i le  
aoga ina ua sii lona lima e fai  
atu ni fesili. Sa ia faa'ataataina  
lona uso o Masela ina ua ia fai  
atu ni upu lelei ia te ia.

Ona ataata foi lea o Mara.  
E manaia le lagona e maua i le  
fesoasoani i isi ia fiafia.

Ae sa i ai se taimi se tasi i  
vaiaso taitasi e tau le ataata ai  
lava Mara. O lena taimi o le

taeao po o le Aso Sa. O le taimi  
lena e aupito sili ai lava ona  
lelavava ai ia Mara ma Masela.  
O le nanati solo e sauni mo le  
lotu na atili ai lo la to'u. Ona  
sosoo ai lea ma le savaliga umi  
i le lotu. Sa sili atu ma le maila  
le mamao! E masani lava  
ona tuai le taunuu atu i ai  
o Mara ma Masela. La te

misia le vaega muamua o le  
Peraimeri.

“Matou te misia lava oulua pe  
a oulua le vave oo mai iinei,” o le  
tala lea a Sister Lima i se tasi o aso.  
O ia o le peresitene o le Peraimeri  
o le latou uarota i Pasila.





Na iloa e Mara e tatau ona ia vave oo atu i le lotu. Ae e faapefea? Ona i ai lea o se manatu o Mara. O le isi po o le Aso Toonai na sosoo ai, na tonu ai ia Mara e faaitaitai se mea fou.

Nai lo o le ai nanaina o meaai faavaiaiga pe a uma le taumafataga o le po, sa fufulu e Mara ona nifo. O le tele lava o aso e tatau ai lava ona faamanatu e Tina i teineiti e tape le televise ae o e momoe. Ae e tusa foi lava, la te taaalo ma taumusumusu i lalo o o la ieafu seia oo i le leva o le po. O nisi taimi e feala umi ai lava lea e tau le mafai ai ona pupula o la mata. Na tatau ai ona la feminoia'i ina ia aua ai ne'i o la momoe.

O le po lenei sa faamaulu ai e Mara lona ofumoe ma oso sa'o loa lava i luga o le moega. Sa tau le faamanatuina atu e Tina ia te ia. Sa amata ona

tilotilo solo i ata o loo i luma o lana Tusi a Mamona.

“O le a lau mea na e fai?” Sa fesili ai Masela.

“O se suega,” o le tala lea a Mara. Sa tumu lona mafafau i mafafauga fiafia. Ma le isi o lea ua amata ona tautulemoe.

O le mea na sosoo ai na iloa e Mara, ua onono atu le susulu o le la i lona faamalama. Na toeitiiti lava oo i le taimi e sauni ai mo le lotu. Nai lo le

lagona o le inoino, sa lagona e Mara le fiafia. Sa le'i pei e nenefu lona mafafau. Sa le'i lagona e lona tino se lelava.

Sa taunuu atu o ia i le Peraimeri a o le'i oo atu nisi o taitai.

“Faafetai lava mo le avea ma se faaitaitaiga lelei tele i isi tamaiti,” o le tala lea a Sister Lima.

Ia o le taimi la lea o Mara e ataata ai. Sa tonu ia te ia o le a vave alu i taimi uma e moe i le Aso Toonai. O le auala lena o le a mafai ai ona ia faasoa atu le ataata i le Aso Sa atoa. ■

*E alala le tusitala i Iuta, ISA.*







Saunia e Elder  
Orson F. Whitney  
(1855–1931)

O Le Korama  
a Aposetolo e  
Toasefululua

## ATINAE I LUGA O LE PAPA

*E le lava le tele po o le lelei o se  
tusi e taitaia lenei Ekalesia.*

I le tele o tausaga ua mavae na sau ai i Iuta se taitai atamai o se [isi] lotu. . . . Sa auai atu o ia i se sauniga faamanatuga “faaMamona” ma sa tele ni ana faitioga i le auala o loo tatou taulimaina ai le Tausamaaga a le Alii, ae maise lava i lo tatou faaaogaina o le vai nai lo le uaina i na sauniga. Fai mai a ia na ia gatete ina ua ia vaai atu i tagata o mitiina le vai; ma na ia faasino maia le mea moni, aua o le mea moni lava, e tusa ai ma le Tusi Paia, o le Faaola, ina ua Ia faatulagaina le faamanatuga i tagata Iutaia, na faaaogaina le uaina, ma folafola atu o Lona toto lena pe e faatusa i Lona toto. E mafai ona ou faaopoopo atu o le Tusi a Mamona o loo tau mai ai foi na faaaogaina e le Faaola le uaina ina ua Ia faailoa atu le faamanatuga i sa Nifae.

O la’u . . . uo, pe na ia iloaina pe leai, sa mauaina tonu lava le mea taua e iloa gofie ai ma ese mai ai le Ekalesia a le Atua mai isi lotu uma lava i lalo o le la—o lenei, ao faavaeina isi ekalesia i luga o tusi ma tu masani ma aoaoga a tagata, o lenei Ekalesia e atinae i luga o le papa o Keriso, i luga



o le mataupu faavae o faaaliga e vave oo mai ma auuai mai pea. E le faia e le Au Paia o Aso e Gata Ai ni mea ona o loo lolomiina i se tusi [o tusitusiga paia]. Latou te le faia ni mea ona sa ta’u atu e le Atua i tagata Iutaia e fai; latou te le faia foi pe tuua se mea e le faia ona o faatonuga na tuuina atu e Keriso i tagata o sa Nifae.

So o se mea lava e fai [alohaia] e lenei Ekalesia e fai ona o le Atua, o loo fetalai mai le lagi i o tatou aso, ma ua poloaiina lenei Ekalesia e faia. . . . O le faavae lena o le Ekalesia a Keriso. Afai tatou te faaaogaina le vai nai lo le uaina i le faamanatuga o le Tausamaaga a le Alii, ua faia ona ua poloaiina ai e Keriso. [tagai i le MF&F 27:1–4].

O faaaliga faalelagi e fua lava i tulaga ma manaoga o tagata, ma mai lea suiga i lea suiga ao agai i luma le galuega a le Atua i lona taunuuga. E

le lava le tele po o le lelei o se tusi e taitaia lenei Ekalesia.

I le faia o lenei tala, ou te tautala ma le ava e tatau ai i afioga tusitusia a le Atua, lea o loo lolomiina i tusi, o se vaega o na tusi atonu ua tuai, ua maea ona faataunuaina lona faamoemoega ma ua taatia i le fata, [e pei o taulaga i manuvaefa; tagai i le 3 Nifae 9:19–20], ao le isi vaega o loo malosi, tumu i le ola, ma fetui tonu i lo tatou tulaga o i ai nei—o lo tatou tulaga o i ai nei o le atiina ae. Ae oo foi i lenei vaega e tatau ona faamatalaina sao. E le tatau i se tagata ona finau mo mea o loo i totonu o tusi, e ala mai i le fofoga taumomoli o le Atua, o le e saunoa mo Ia ma faamatalaina Lana upu [tagai i le MF&F 1:37–38]. O le faia faapea o le faananau atu lea i tusi mate nai lo le perofeta soifua, e masani lava o se tulaga sese lea.

O le mea na fetalai atu ai le Alii i le au Iutaia ma sa Nifae i le 2,000 tausaga talu ai po o mea na Ia fetalai mai ai i le Au Paia o Aso e Gata Ai i le 50 po o le 60 tausaga talu ai, e leai lava sona malosi i le taimi nei vagana ua fetui tonu lava ma faaaliga o aso-nei, faatasi ai ma faatonuga lata mai a le Alii i Ona tagata e ala mai i Ana au-auna filifilia pe tofiaina; ma o i latou e le amanaiaina lenei mea moni o le a ono oo i puapuaga. ■

*Mai se saunoaga na tuuina mai i le konafesi aoao i le aso 7 o Oke. 1916, e pei ona toelolomiina i le “Atinae i luga o le Papa,” Liahona, Iuni 2010, 12–13.*

# MALAMALAMAAGA



## **O le a le matafai oi a le tama i le avea ai ma se matua?**

“E tuuina atu e tama ia faamanuiaga ma faatino ia sauniga paia mo le la fanau. O le a avea nei mea ma ni mea faaleagaga taua i o latou olaga. E aafia patino lava tama i le taitaiina o tatalo faaleaiga, faitauina o tusitusiga paia i aso uma, ma afiafi faaleaiga i vaiaso taitasi. E fausia e tama ni tu masani faaleaiga . . . O manatuaga o nei taimi faapitoa e faatasitasi ai o le a le galo lava i le la fanau. E faataunuu e tama faatalanoaga fai soo taitoatasi ma le la fanau ma aoao i latou i mataupu faavae o le talalelei. E aoao e tama ia atalii ma afafine i le taua o le galue ma fesoasoani ia i latou e faamautu ni sini taua i o latou lava olaga. E fai e tama se faaitaiga o auunaga faamaoni i le talalelei. Faamolemole ia manatua, o lou valaauga paia o se tama i Isaraelu-lou valaauga sili ona taua i le olaga nei ma le faavavau atoa.”

---

Elder L. Tom Perry o le Korama a Aposetolo e Toasefululua, “Mauaina o le Filemu Tumau ma le Fausiaina o Aiga e Faavavau,” *Liahona*, Nov. 2014, 44–45.



# Faapotopoto Faatasi ma Aiga, Uo, ma Tuaoi

Mo le Konafesi Aoao Lona 185 o Le Ekalesia a Iesu  
Keriso o le Au Paia o Aso e Gata Ai

**Aperila 4–5, 2015:** Sauniga aoao mo tagata uma

**Mati 28, 2015:** O le sauniga aoao a tamaitai mo tamaitai ma teineiti e tai valu tausaga ma matutua atu

**Aperila 4–5, 2015:** O le sauniga perisitua mo alii ma tama e tai 12 tausaga ma matutua atu

O sauniga uma e faia i le Maota Autu mo Konafesi i le Aai o Sate Leki, ma e faasalalauina i falelotu i le lalolagi atoa. E mafai ona e maimoa pe faalogologo tuusa’o i le konafesi i le tele o gagana i luga o le LDS.org ma i ni gagana faatapulaaina i luga o le BYUtv, i tulaga o le Mormon Channel, ma le alaata YouTube o le konafesi aoao a le AAG. O saunoaga e teuina o le a maua i luga o le LDS.org ma le polokalama o le Gospel Library.

